





東萊詩集 序目



別 41-4

0 1 2 3 4 5 6 7 8 9 10

A 1 2 3 4 5 6 M 8 9 10 11 12 13 14 15 B 17 18 19

Kodak Gray Scale

G Y M

© 2007 TM KODAK



文集莫盛於唐亦莫盛於

本朝唐則韓退之柳子厚

淺草文庫

本朝則歐陽文忠公實爲之冠是數公固出類拔萃
巍巍乎不可尚已編次而行於世退之則李漢子厚
則夢得文忠公則東坡先生或其門人或其故舊又
皆與數公深知蓋知之不深則歲月先後是非去
取往往顛倒錯亂不可以傳近世張文潛秦少游之
流其遺文例遭此患知與不知之異也

東萊呂公居仁以詩名一世使山谷老人在其推稱
宜不在陳無已下然即世多歷年所而編次者竟無
人焉墨客詞人相視太息曰居仁所謂知我者希則

我者貴歟

儀真沈公宗師名卿之子少卓犖有奇志方黨禁未解時不顧流俗專與元祐故家厚居仁尤知之往來酬唱最多

沈公之子公雅以通家子弟從居仁游居仁稱之甚乾道初元幾就養吳郡時公雅自尚書郎擢守是邦暇日哀集居仁詩略無遺者次第歲月爲二十通銀板置之郡齋蓋居仁之知沈氏父子也深故公雅編次之也備幾亦受知於居仁者也公雅用是屬幾題其後竊自伏念與居仁皆生於元豐甲子又相與有連雅相好也紹興辛亥幾避地柳州

居仁在桂林是時年皆未五十居仁之詩固已獨步

海內幾亦妄意學作詩居仁一日寄近詩來幾次

其韻因作書請問句律居仁察我至誠教我甚至且

曰和章固佳

本中

猶竊以爲少新意又曰詩卷熟讀

治擇工夫已勝而波瀾尚未闊欲波瀾之闊須令規

模宏放以涵養吾氣而後可規模既大波瀾自闊少

加治擇功已倍於古矣幾受而書諸紳今三十有

六年顧視少作多可愧悔既老且病無復新功而居

仁之墓木拱矣觀遺文爲之絕歎因記居仁教我之

言於篇末使後生知前輩相與情實如此且以見幾於

居仁之言雖老不忘也乾道二年四月六日贛州

曾幾題

東萊先生詩集目錄

呂本中居仁

第一卷

暮步至江上

題張君墨竹

陰

符離諸賢詩

德操充之皆約九月間見過今皆未至次林出

門悠然有感

遊劉氏園

上元

柳

喜雨

舍東舊有花數百株自去歲大雨道路阻絕不

復可尋感嘆成詩

送文潛歸因成一絕奉寄

謝人送牡丹

宿州初暑

夏日書事二首

寄吉州若谷叔

寄汪信民

同諸子遊城東園

楊道孚墨竹歌

謝無逸秦處度諸人皆許省試後見訪冬夜有

懷作此詩寄之

歲晚

晚步至江上

訪晁進道歸

怨歌行

雪盡

三月一日泊舟宿州城外因縱步至城北遂隔

天慶觀道士留飲乃歸

宿青陽驛

游南山歸簡張嘉父博士

書懷

客居書懷奉寄介然若谷子仲兼簡信民

小園

謁雍道正

春日即事

寄前鎮西楊法曹

飲酒

讀史

戲呈七十七叔

偶作

謁陶朱公廟

睡

夢

讀陶元亮傳

寄壁上人

寄壁公道友

用前韻寄商老

又寄無逸信民

奉荅壁公兼簡諸友

得李去言詩次韻荅之

督山伯蕭遠和詩并示舍弟

用寄壁上人韻寄范元實趙子仲及從叔知止
兼率山伯同賦

夜作呈諸公

第二卷

山陽寶應道中與汪信民兄弟洪玉父杜子師
張益中日夕過從自過高郵不復有此樂
也因作此詩寄懷

春日

知止歎傲軒

暑夕乍涼二絕

寄知止二絕

遊北李園三絕

遊北李園

寄李愬去言

贈汪莘叔野

新冬

贈謝無逸

贈張若虛

贈信民

符離行

探梅呈汪信民

奉懷張公文潛舍人二首

答無逸惠書

寄知止才仲

寄張益中

元日示沈宗師四首

梅

苦陰

贈浹上人

正月十二日夜作

咸安公主

明妃

正月十三日河堤上作

昨日晚歸戲成四絕呈子之兼煩轉示進道丈
上元夜招沈宗師不至聞已赴郡會作二絕戲之
浹上座求枯木庵詩戲成兩絕贈之

正月末雪中小酌

次韻張生

追成舊作

又不得才仲書因成兩絕寄之

晚晴

連日與上人會話密庵清座附火乃有山居

氣息因成一詩奉呈

上人屢言郛郛南塔之勝予蓋樂之而未能

往也

夜座有懷

晚春即事

廣陵道中寒食日二絕

就甯子儀求酒

第三卷

廣陵

沈宗師甚喜江梅而微貶酴醾因成一絕

勸張李二君酒

庵居

小園即事

登舟

張禕秀才乞詩

效古樂府三首

讀太真外傳

簡甯子儀二絕

書寄溪上人

呈愚上人

贈浹上人一上人

雨後月夜懷沈宗師承務

秋夜示李十

中秋日沈宗師約遊城西泥雨不果因成四十一

字兼寄趙子仲

桃花菊

九日晨起

王氏郊居

對菊

雨後至江上有懷諸子

登南樓

歲晚作

弔古塚

奉送子之還京師

外弟趙子仲數以書來論詩因作此答之

過子之泊船舊亭

望金陵偶成兩絕

烹茶

西樓

寄信上人

秦處度與一上人同宿密庵處度為一畫斷崖

枯木

寄謝無逸并汪叔野兄弟

月下

劉穆之

戲贈道浹上人

喜章仲孚朝奉見過十韻

觀穽子儀所蓄維摩寒山拾得唐畫歌

寄朱時發

寄穎昌諸叔

謝人送瓊花白沙人謂瓊花爲無雙花戲成兩絕
觀穽子儀朝奉山堂諸石三絕

十一月五日與才仲弟相別于白沙東門之外
悵然久之不能自釋乃知謝安石作惡之
語不爲過也因成八詩奉寄可見別後氣
味亦可并示京洛間親舊也

第四卷

山水圖歌

庚寅年正旦郡中客次作

題李伯時維摩畫像圖

遣懷三首

符離阻雨

伍員祠

東園

寄琦監院

即事戲答季一

湘竹

有懷宿州城北因作詩寄才仲

示沈宗師二首

夜坐戲成兩絕呈迪吉宗師二友

戲成兩絕奉簡章仲孚兼呈宗師

老松

揚州雍熙寺納涼

訪張鑑秀才兄弟

邵伯埭路中

寄周司理

山光寺前泊舟值雨

步月有懷

揚州留一士人

送一上人之京師

擬古二首

潘邠老嘗得詩云滿城風雨近重陽文章之妙

至此極矣後託謝無逸綴成無逸詩云病

思王子同傾酒愁憶潘郎共賦詩蓋爲此

語也王子立之也作此詩未數年而立之

邠老墓木已拱無逸窮困江南未有定止

感嘆之餘輒成二絕

寄李商老

雨中作

示內

寄外弟趙柟材仲

京師贈大有叔

寄蔡伯世趙才仲五絕

寄范子

春風

聽琴

雨後

送山伯良佐東歸以務道期息塗爲韻

河水清贈良佐兼寄商老

同季一天紀過沈宗師北莊因成長韻

郵上祈雨

清風

學視

寄舍弟

斷雲

如臯道中

第五卷

初去白沙再望路中江南諸山慨然有懷

赴濟陰留別一公

五月五日泊舟北神與關聖功唐充之李元輔

作別意殊惘然端午日行次洪澤把酒北

望已如異世事矣因念屈大夫之死正是

此日慨然有感於心輒成長韻奉寄李民
師翁士特來可求和也

贈唐充之兼簡益中

夜雨

出門見明月

往歲在白沙見江上往來祠神者殺猪羊鵝鴨

日夕相屬也有感於心後至濟陰因成長
韻當託白沙故人投之廟前庶幾神少知
自戒乎

濟陰野次

毛彥謨容膝軒

濟陰寄故人

晁叔用得古鏡二一以遺法一上人澄徹可愛
底水隱然蜃樓突起又作杯渡禪師像
翻翻然衣動正在中流間也一求記於
予因爲作歌

別離行

李念七久不見過二絕

往年與關止叔相別甬上止叔見勉學道甚勤
且曰無爲專事文字間也及今五年矣尚
未有所就因作詩見志且以自警言也

六月初三日雨後步至城東

得楊州書

歸計未成作詩寄懷

閱舊詩卷有懷

高郵道中荷花極目平生所未見

高郵遇大熱作

題孫廣伯主簿家壁

贈孫廣伯

與吳迪吉諸人赴晁季一陳塘范園之遊因成

十韻

送晁季一罷官西歸

侯羸

昭君

戲呈外弟趙才仲

城北別江子之

訪晁季一

吳君求詩因作四韻寄之并簡小吳與甯生

古劍歌

初夏即事

偶作

癸巳自南京過泗上

泗上贈楊吉老二首

題甯應張氏草堂

學仙行

冬日訪朱深明博士二首

第六卷

初別清源姑才仲弟過楚丘作

宿楚丘懷石子植顏平仲趙才仲

發召伯埭二首

余病不能疏食懼有五味口爽之責作詩自戒

南山

與諸弟諸季同登塔山愚壁以事不能來因成

二絕

春日二首

東園

即事

和李二十七食蛙聽蛙二首

題秦惇秀才園亭

別夜

寄題蘇州靈巖

呈甘露印老

壁上人欲行爲雨止戲成一絕用前韻

江口送壁上人一絕

送朱時發

送寧子儀

唐張瑄書記梁時婦黃鼎因侯景亂沒北齊

爲小校胡兒所虜生二子後附海舶歸聞
鼓角得聲乃如是會稽郡鼎先在梁許嫁
張固及歸固適爲剡令求與相見不可乃
遣令送之宣城鼎在齊時作秋風曲渡海
時又作詩三章瑄書稱其詞淒怨自瑄時
已不傳

夜坐呈吳迪吉

與李去言諸人分題得之字

訪秦氏北莊

喜于仲兄弟至偶成四十字

春日

甲午送甯子儀歸洛

讀舊詩有感

別後寄舍弟三十韻

記夜

夜坐

寄唐充之二十韻

竹西亭

邵伯路中逢御前綱載末利花甚衆舟行甚

急不得細觀也又有小盆榴等皆精妙奇

美之觀因成二絕

飲秦少方家

孫量臣約遊軋明借秦少方韻見贈復次韻寄之

春晚郊居

外姊趙夫人智量

一作諒

以良人沒祝髮感歎成詩

代贈

又代贈

臨川王坦夫故從谿堂先生謝無逸學北行過

廣陵見余意甚勤其行也作詩送之

登淮南樓

題淮上亭子

夏夜大雨呈若谷叔并晁叔用江子之一上人

贈一上人

久雨路絕賓客稀少聞后土祠瓊花盛開亦未

果一往也

同狼山印老早飯建隆遂登平山堂

舟行次靈壁二首

己亥上元數同晁季一叔用清坐不出

寄李商老

晚至城南

第七卷

汴上作

初抵曹南四首

言志

學道

和趙承之

曹州後園夜行

風吹蒲葦叢三首

曹南試院懷向子諲兄弟兼呈張擴

試院中作二首

擬古

正月十五日試院中烹茶因閱漢碑

試院夜坐

清都行

試院中呈王曹惠子澤教授張彥實

寄知止

印纍纍

曹南過五丈河堤入城訪顏岐夷仲清談之乃歸

雪夜

曹南官舍書事

早出

寄江端本子之晁冲之叔用

兩鶴行

陵城歌曹州城北十里古陵城坡冢纍然即定

陶恭王丁傳陵也余往來過之傷嗟再三

因爲作歌

早至天寧寺即趙州受業院也

曹南寄親舊

大雪不出寄陽翟寧陵

興寧陵叔弟別後有懷兼寄趙主仲二首

大雪不出

自曹南至陽翟追懷江上舊遊呈叔弟

自陽翟至寧陵與虛已叔諸弟別還曹未久知

止復來偶成二十八字

試院中作

去冬試院中嘗作詩云衣敝虱可拾髮垢櫛不

下披衣坐牆角尚有微火跨平生足拘窘

今日幸閑暇新文加點竄欲歇不能罷雖

微塵事妨頗畏俗子罵出門見諸老此語

君可畫今年復入試院職事多窘迫者簿

書滿前如赴蹈湯火也再次前韻

雨後數與李仲輔兄弟往來且約十七日同過

士特因成長韻

首夏二首

第八卷

問晁伯宇疾二首

商村河決

新霜行

將去曹南連得江是書數存歿諸友遂成六韻
精衛詩

寧陵弟相送至南京因成四韻寄季子之叔用
十一月一日步河堤上

留侯

送韓撫東則赴棣倅

讀秦碑

次韻答曹州同官兼簡范寥信中

龔彥承觀軒

畫馬圖

堤上

將赴海陵出京沿汴覓舟候送客不至遂行

京師新鄭與諸晁兄弟往還前後數詩

本中將爲海陵之行念當復與予之作別意殊

憤憤偶得兩詩上呈并告送與壯輿叔用也

鴈

赴海陵行次寶應

一作過
白田

海陵雜興八首

往來送迎城南道中二絕

家叔舍弟與黎介然會于符離因用兩絕奉寄
病中夜聞雪作時堯明有廣陵之行未歸思爲

數語奉寄久之未就他日堯明歸携詩相
過飄然有馭風凌雲之氣因以前詩答之
次韻堯明貢院詩

海陵夜作

第九卷

秋夜行

臘梅

牧牛兒

洞庭

細雨

王陽

題趙丞瑞蕙菰圖

即事

寄晁以道

轎上口占二首

次韻遜叔直閣見寄兼請堯明同和

再和兼寄奉符大有叔

雨後至城外

龐公

衛青

雜詩三首

秋日三首

橙二首

寄京師親舊

和成士穀鹿女泉詩

春申君

秋日三首

和成士穀海安道中見寄

送虞談季然之官京師

海陵病中五首

次韻李叔友賀堯明登第叔友丹陽人也本中

得其人之詳於王堯明恨未之識也堯明

擢第叔友作詩賀之堯明令繼作既喜叔

友能不妄許可又喜堯明進退取捨皆中

乎道也三首

次韻堯明見和因及李蕭遠五詩

西歸舟中懷通泰諸君

寄馬巨濟察院時監泰州酒得官祠歸南京

寄趙十弟

叔度李明學問甚勤而求於余甚重其將必有

所成也因作兩詩寄之

與李宏子植同過信中飲薛荔亭下夜深乃

散別後奉懷遂成長韻

秋日呈顏夷仲

謝任伯夫人挽詩

贈筆工安伋

寄共城賈秀才

題大名官舍

第十卷

秋日即事四首

閏月九日

惡木

江上二首

寄外弟蔡明善

秋夜

地

謝新酒螭蟹

寄諸子

湘水

頃與知止相別於曹州西門外蓋今十四年矣

聞嘗自澶淵過此感歎

雙廟

歸自成園

與諸舍弟游董村

見信民舊書有感

同叔用宿子之家

隄上

游西池歸

出順天門歸陽翟二首

新鄭路中

離新鄭

宿潁昌范氏水閣

聞南寇已平歡快之甚作詩五十韻

還韓城三首

秋日至孟明莊

韓城紀事五首

陽翟冬夜

孟明田舍

雪後

宿田舍

除日

將游嵩少題石淙

登太室絕頂

與崔德符田元邈別後奉寄

出遊

董村歸路馬上口占

嘲拄杖

木煎

有客

李文若季敵訪余高安留連累日臨行贈之
木芙蓉

第十一卷

食筍

白鬚

宿劉固寺佛殿下即劉伶墳也

懷衛道中寄京師諸友三首

河堤

寄濬州張掞

田家樂

梅

寄崔德符

還家

即事

讀易

復往大名三首

開德道中

陽翟道中

長葛道中遇周原仲

簡叔易益謙兄弟

贈益謙兄弟

題蘆鴈扇

遊西宮有感

送一書記果公作天寧化士

京城圍閉之初天氣晴和軍士棄城不以爲難
也因成四韻

守城士

聞軍士求戰甚力作詩勉之

丁未二月上旬四首

兵亂寓小巷中作

圍城中故人多避寇在鄰巷者雪晴往訪問之
坐語既久意亦暫適也

城中紀事

讀易

無題

懷京師

讀司馬公集解太玄

黃池西阻風

景德北牕

昭亭廣教寺

昨日之熱一首贈趙彥強

又贈

題涇縣水西

宿秋霜閣後方丈

水西與李彥恢相從余將取旌德趨徽州彥恢
先歸旌德相候彭元任亦自太平縣來相
送遇於三溪驛遂同過旌德道中呈二子
三首

休寧縣與汪致道諸公別後晚宿黟縣界魚亭

驛二首

寄宣城故舊

祈門道中四首

桂林別珂首座二首

答趙祖文陳夢授

寄趙十一弟

第十二卷

浮梁道中見小松數寸者極多然皆與蓬蒿雜

出不能即長也余傷之作詩寄范四弟

自祈門至進賢路中懷舊三絕

離洪州渡江西至翠微寺紫清宮

宿翠微寺

發翠微寺

送宋仲安往虔州

與仲安別後奉寄

題筠州僧房

離筠州

題園悟與惇兄法語

建城道中

行至醴陵寄故人

將至南嶽先寄演公禪師善公華嚴

避寇南行

貞女峽

山水圖

連州陽山歸路三絕

陽山道中遇大風雨暴寒有感

答朱成伯見贈四首

連州行衙水閣望溪西諸山

贈歐陽處士

嶺外懷宣城舊游

余避地訥嶺寄書宜章孫氏賊去則盡失之感

歎有作

過嶺將至江華先寄朱成伯二首

端午日北還至斛嶺寄連州諸公

山居素飯

寺居早起

寺居即事三首

贈夏庭列兄弟

墨梅

賀州聞席太光陳去非諸公將至作詩迎之

一有次韻字

送周靈運入閩浙

次韻錢遜叔見寄

贈宗真上人

第十三卷

全州與解子中向伯恭相會

初至桂州二首

桂州邂逅拜見仲古龍圖吉父學士別後得詩

書懷奉寄

次韻吉父見寄新句

桂州水西

斷橋

贈嶺東陳秀才

衡州逢解子中別後奉寄

范縣丞惠雙鷄

王撫幹失去毛裘

四十二弟將還賓州相過夜話

呈折仲古四首

次韻王撫幹見惠

次韻王漕見贈并寄曾吉父二首

次韻折仲古見贈

再用前韻奉和

夜坐有感

送密上人歸江西

送常子正赴召二首

頌送山上人遊南華

山頌送譚師直歸湖南

送能化主還法輪

送夏少曾兄弟

本中將爲江浙之行念當與夢覯遠別感歎傷

懷因成長韻奉呈

贈日者張直夫

永州西亭

浯溪

送元上人歸禾山

贈一上人

贈珪公杲公四首

次韻錢遜叔清江圖後二首

次韻錢遜叔獨鶴圖一首

次韻錢遜叔畫圖

送一上人

錢遜叔諸公賦石鼓文請同作

和邢子堅韻

第十四卷

戲呈東林雲門二老

佛日縱步相尋索歸甚苦戲成絕句

東林珪雲門杲將如雪峯因成長韻奉送

贈童堯詢蔡楠謝敏行

和范仲熊舜元遊橘園見梅

答錢遜叔

一本有訪戴圖三字

與錢遜叔飲酒分韻得鳥字

贈別范一哥

送謙上人回建州三首

與范益謙炳文叔儀步月

一云與諸步月

陸庭元紹意齋

病中口占示益謙四弟

竹夫人

郊居

送楊蒙秀才往樂平

寄題暨尚卿雙蓮亭

簡范信中鈐轄三首

次韻李仲輔簽判

西施舌

和秦楚村直閣韻

和展鉢詩

鼓山

王傅巖起樂齋

寄范四弟十弟

一無十
弟二字

春日紀事寄內外諸弟三首

寄諸弟

游鳳池

題孫子紹所藏王摩詰渡水羅漢

送荀與何晉之

次韻李伯紀園亭

送林之奇少頴秀才往行朝

鄭昂用岑參太白胡僧歌韻作楞伽室老人歌

寄杲老

贈王周士諸公

贈范信中

會稽石道叟教授南劍兵火搶攘之餘興治郡

學尺椽片瓦皆其所自經營未暮月而

學成遠近賴之又祠前輩賢者以風厲多

士使遊其間者望之而心化由是而入堯

舜之道不難也古之教者蓋多術矣五帝

憲三王有乞言憲賢於乞言也道叟知之

矣呂本中爲作詩叙本末云

寄計議弟張彥實錢元成夏庭列

寄內弟并示仲輓諸公

簡范信中

第十五卷

再簡范信中兼呈張仲宗

寄晁恭道鄭德成二漕

連得夏三十一斐兄弟范十五仲容趙十七頌

達書相與甚勤作詩寄之

送錢子虛撫幹往洪州赴新任二首

題晁恭道善境界圖

簡乾元珪老

贈楊紹祖

謝宇文漳州送茶

夏日

過劉忠顯公鄉縣作

夏日深居二首

乾元副寺欲還雲門

慶堯侍者以詩相贈偶成絕句謝之

渴雨簡張仲宗二首

謝楊紹祖惠玉友

與李似宗別後奉寄

作雨不成早暑愈甚未能就道

聞鵲

荔子

乾元真歇數約他日同庵居

將發福唐

一云別李叔
易兼簡士珪

聽雨

末利

聞二弟召對

夜涼早起尋李貽季陸慶長所惠詩有作
聞大倫與三曾二范聚學并寄夏三十一四首

別法一上人

別後寄珪粹中

一作
鼓山

哭王元邁

別林氏兄弟

本中欲謀它日復來福唐之東山林少穎請作
詩以記因成兩絕

謝人送陳家紫

閑居感舊偶成十絕乘興有作不復銓次

溫泉

一作福
州湯院

將去福州

初秋

奉呈鼓山雲門二老

從叔巽叔覓茶

福建界首寄福州親舊

嚴州九日坐上贈胡明仲常子正

方允迪挽辭二首

程伯禹夫人挽詩二章

送范師厚宣諭四川

贈了老

第十六卷

送楊晨當時赴夔漕

送徐沐稚山赴江西漕

將發金陵奉懷張彥實

初離建康

一云鍾山寄范四弟諸人

寓會稽禹迹寺

會稽初秋四首

錢遜叔侍郎奉京師舊墳改葬天柱謹成挽

詩一首

重陽日西興寄臨安親舊

范伯言藥隱

一云送范彥行歸西山

題趙祖文盤谷圖

送胡明仲知永州

孫肖之短堂

贈孫肖之

朱成伯秀野堂

次秀亭韻二首

甘棠樓

師奴病化

舟行至桐廬

示兒

陳朝奉坐化

嚴州春晚

予將爲三衢之行下塔僧惠道求詩留題因

戊絕句遺之

將適三衢而七弟欲往臨安臨行作詩奉送

椿閣

弋陽魏令賞音亭

建安熊述之爲今建德不言而治將適二衢留

詩美之二首

擬古樂府

己未重陽

李城拙軒

清御軒

將往城南觀音阻雨未果

余迪漫浪齋

無題四首

邊愁

招范四弟

衢州路中

憶福州舊居菊花

求趙表之墨

陋巷

示聞生

簡何居厚

謝人送酒

第十七卷

聞蔡九弟十四弟到行在

贈蔡九弟十四弟

病中

病中曾端伯見訪

無題

送曾吉父

次曾吉父蘭溪三絕

窮臘有懷

病中聞諸范日赴飲會

深居

慶大悲閣成

贈人

送廣東漕范子儀

夜聞諸生讀因成寄趙十七姪

夜坐

簡李巽伯

追記昔年正月十日宣城出城至廣教

病中上元

三衢上元

贈人

官閑贈人

正月十七日

病中得舍弟信

疥

正月十九日暴熱

即事

送向仲吉往江西

寄臨川親舊十首意到輒書不復次序

奉懷李立范文戲成兩絕句錄呈

病中寄胡原仲劉致中

才元相過三衢偶成近體詩一首奉呈

無題

寄人三首

寄祁居

贈人四首

寄朱希真

寄向縣丞

病中

山城

病夫

無題

偶成兩絕句奉寄文若庭列

寄閩中親舊

廖用中世綵堂

劇暑

即事

秋日

懷秋

贈范十八

秋日

讀書

宿昔

謝人送詩

水仙二絕

第十八卷

處暑

教授鄭國村挽詞

無題二首

潘義榮惠木犀二首

次潘都尉富季申冬日探梅韻二首

次韻木犀二首

謝潘義榮送菊二首

畜犬

疥

潦倒

贈人

無題

寄京口使君

再贈

贈友

歲暮

戲成二絕句

久病二首

偶作二絕

謝滕尉送梅

遊山

李丞相挽詞三首

以一縑寄范四弟

江梅

鼓山頌法眼語在裏即求出云大家合眼跳黃

河戲成四韻奉答

夜深歸家聞鄰家小兒讀書可喜有作

梅花

無題二首

贈李元亮之子季子

二月七日與群從遊陳氏園

懷許子禮

雪

報暉庵

贈莊季裕

李尚書挽詞

李器之履齋

野寺

辛酉立春

雪夜

謝方倅惠炭

即事四絕

贈人

辛酉之冬周提宮墜惠竹隔

寄張仲宗

周仲固尚論齋

吉州段秀才粟庵

自如齋

醉經堂

題焦寺丞詩冊三絕

暴飲

次葉守喜雨

無題

次韻曾宏甫木犀

贈鄭侍郎二首

第十九卷

次曾宏甫九日韻

先日贈曾宏甫二絕

送徐止秀才歸小葉

次葉守韻

送曾宏甫知黃州四絕

題范才元畫軸後

送尹少稷賢良還懷玉山

寄題曾黃州重修睡足齋

重陽前一日作

春晚

寒食二絕

閑居即事

偶出謝客

蔬食三首

戎殺八首

寄祁居之

送韓念八迪功

謙上人清湍亭

送韓臨亨提舉

和伯少穎迂仲將歸福唐偶成數詩欲奉寄無

便未果也辰叔常季南還因以奉送

送范才元

贈魏邦達張彥素

送南上人

贈曾吉甫

贈魏邦達張彥素

次韻汪教授木犀

送詹慥秀才

靜軒

贈吳周保

尹少稷方齋

送義先上人歸古田

送范十八

徐師川挽詩三首

即事六言七首

楊雄

嚴君平

賈誼

晉二絕

畜犬雪童黠甚勝人壬戌夏暴死作詩傷之

又作二絕

秋日

懷雪童

即事

念舊

和汪教授

癸亥歲正月二首

寄蔡伯世李良宇

贈魏承事二絕

送魏縣丞之官餘杭

葉尚書普光明庵

焦復州惟正寄鼎復兩州喜雨詩來以近體詩

一首寄之

送范十八還江西効白樂天體

晁公詩九經堂

送瑞印上人歸福州

第二十卷

尤美車在玉山縣小葉村喻子才作尉時名之

取歐陽文忠公醉翁亭記所謂林壑尤美
望之蔚然者後數年舊軒既毀復作寺僧
移軒山下汪聖錫要詩叙本末因成數句
成之

金溪董需彥光凌岑庵

盛華彥光立壑軒

送昆公慶西歸

曾吉父橫碧軒

送邢道州趙邵州歸湖南

送方豐之秀才歸福唐

向敦武挽詞

向簽判母挽詩

贈眼醫張子驥郎中

送晁侍郎知撫州

晁留臺劉夫人挽詩三首

贈鄭侍郎

送宗紀上人歸福州

郡會分韻得蠻字

郡會賞牡丹分韻得裳字

次蔡楠韻

送三提舉赴淮東七首

送財用歸開化二首

謝范子儀見寄因次其韻

謝周侍郎送木瓜

謝幽巖長老送荔枝二首

撫州俞隱居挽詩

贈汪信民之子如愚

謝曾台州送梅

送范子儀將漕湖北五首

梅花二首

周承務卿求諸己齋

送程伯禹歸浮梁

寄題王珉中玉通判夢山堂

去冬以紙衾遺劉彥冲劉有詩來謝以二絕

句答之

送曾季直下第歸臨川

送趙十一弟之官南安


寄劉彥冲兼寄胡原仲劉致中

去歲嘗以紙被竹簡遺劉致中後爲大水所


漂致中有詩以二絕句答之

吳傳朋游絲書

東萊先生詩集目錄



卷之三



東萊先生詩集卷第一

呂本中居仁

暮步至江上

客事久輸鷗鷺，孟春愁如接鳳凰。
臺榭陰不礙帆影，過雨氣却隨潮信。
來山似故人，堪對飲花如遺恨。
不重開雪籬風榭，年年事辜負風光取次回。

題張君墨竹

崇寧五年宿州

張卿畫竹，今成癖。笑語揮毫，不作難斂見。
高標起蕭瑟，坐今炎暑變荒寒。筆頭似有千年韻，
曾次猶須萬斛寬。歲晚雪霜君記取，此君懷抱要重看。

陰

風森爽，遽如許。天飛蕭條殊未佳，密迺留陰鎖苔。

一涯唯有雙叢庭下菊殷勤還作去年花

符離諸賢詩

窮居日荒涼杜門與世絕親故日夜踈詩書固宜缺
符離雖陋邦賢士稍羅列德操青雲器議論輩前哲
外貌發英華中心瑩冰雪介然特立士勁氣剛於鐵
攘臂辨是非孰能逃區別信民粹而和名利誠難悅
汨沒稠人中獨抱雲松節偉哉二三子寔乃邦家傑
我來從之遊內顧慙踈拙欣然對三益放懷歌數闕
已矣不須言渠當爲君說

德操充之皆約九月間見過今皆未至扶杖

出門悠然有感

病着文書懶出門偶扶藜杖看行雲屋頭日在轉花
影水面風來散穀文不厭莫城千嶂合稍令明月萬
家分小庭留得清秋在已見霜紅未見君

游劉氏園

大觀元年宿州

暖日溫風破淺寒短青無數簇幽蘭三年止酒償春
意可忍花梢戴面看

上元

步履荒園日已昏呼兒當逕掃苔痕春愁不作遊人
地細雨殘梅過上元

金帶雨過平橋嬋娟千絲復萬條張令當年成底事風流十似女兒腰

喜雨

天乞幽人一夜涼故教微雨送斜陽暝陰籠樹山更好爽氣侵人土自香多病不眠唯藥裹居閑長坐只繩床五年謬作江湖客幾對鱸魚憶故鄉

舍東舊有花數百株自去歲大雨道路阻絕不復可尋感歎成詩

無數新花替舊叢兔葵高卧占春風向來桃李成蹊處今在陂塘渺莽中

送文潛歸因成一絕奉寄

水天空闊片帆開野岸蕭條送騎回重到張公泊船處小亭春在鎖青苔

謝人送牡丹

晚風初淅嫩鵝黃小雨仍添百和香折與病夫元不稱玉瓶留待治游郎

元作渾

宿州初暑

暑氣侵人始欲愁簾櫳窮巷不堪憂亂蟬泊雨林塘靜密邇吹花草樹幽春盡茆簷深著燕日高田水故飛鷗莫欺湫隘無餘地待借元龍百尺樓

夏日書事

小行畏蛇蝎端坐困蚊蚋終日方丈間茫然但昏睡

豈惟病本兼恐添藥費小園新雨餘蔬畦共風味
飽聞簷門柳清陰妙無對便思携杖往行歌
千秋陶淵明此意渠亦會

寄吉州若谷叔

念我江西老斲輪久無漫臯與揮斤千金莫買蛾眉
笑留寄溪堂病主人

溪堂無逸所居也是時聞無逸窮甚而吉州俸稍增故有此語

寄汪信民

時信民在京師有宗子博士之除

萬里江南兩外船長腰秔米縮頭編廣文繫馬無由
去更有何人贈酒錢

同諸子游城東園

昔聞城東園欲往常不欵今來天氣佳茶甌起衰懶
杖藜出門去如膜開病眼木葉犯新霜瓜田帶餘暖
川源疑有無風雲遞舒卷不期魚鳥會偶逐鷗鷺遠
淺水亂菰蒲荒亭半苔蘚青山近在望更悟秋意晚
同行三子詩語各蕭散不愁罰觴難苦恨白日短
千秋高陽池令人憶山簡

楊道孚墨竹歌

君不見渭川之陰卧龍橫千秋良取者誰文湖州十
年筆意開黃壤只今妙手唯楊侯楊侯盡竹盡真跡
勿奪造化令人愁滿堂迴頭看筆擾擾雲煙亂晴
日大叢縱橫高入雲斜風落葉秋紛紛小叢猗猗
無旁水長根走蒼石門前車馬汗成川何得陰風

動向壁楊侯噓笑辭未工此意不與丹青同粉黛初
無一錢費酒多能使千家空鞭棰遠寄動盈屋我
子盡無田窮剡溪寒膝不難致須君放手爲雙叢須
君放手爲雙叢與我俱隱南山中

黛一作繪

謝無逸秦處度諸人皆許省試後見訪冬夜

有懷作此詩寄之

八年去東都觸事無一好沉綿淹歲時憂慮滿懷抱
欲歸故里間稀復舊耆老悠悠歲欲盡忽忽身向老
小堂佳有餘所恨來不早飢蟲語夜霜踈星亂衰草
支撐壞壁高側轉寒木小詩書久弃置詞林迹如掃
佳人何時來路遠音信少庭蔭冬開花扶杖起千竅

春風回馬首清尊待君倒先期留酒錢仍須具梨棗

歲晚

野竹新開徑踈籬自著行暮寒收雨雪落日散牛羊
生事顏公拙才名謝弈狂藥囊無奈汝春到莫相妨

寒一作雲

晚步至江上大觀二年真州

浦口生春綠未酣南山初見碧嶰巖巖風聲入樹翻歸
鳥月影浮江倒客帆破甑不堪充酒券短蓑真欲撥
朝衫往來泥雨城南路可見輕鷗定不亢

訪晁進道歸

樹陰殘雪半成泥尚想狂花一尺圍小雨似酥黃草

畫澄江如練白鷗飛未辭酒炙爲公費政恐親知見面稀南市津頭行艤子無人識我醉中歸

怨歌行

借君手中板爲君歌一辭辭中宛轉君不曉爲君說盡長相思輕霜夜度吳城暖楓葉蘆花秋意晚萬里春隨驛使歸十年夢逐佳人遠當時笑語似見劇象牀玉手無消息古岸風江千里船咫尺春愁那得憐君不見信陵門下客侯嬴不用今頭白

雪盡

大觀二年宿州

雪盡寒仍在園荒春欲歸晴空落鴈小古木聚鷗稀肺病猶堪酒囊空合典衣碧雲愁不見千里故山薇

三月一日泊舟宿州城外因縱步至城北遂

過天慶觀道士留飲乃歸

水霜連暮春旣雨寒愈重扁舟纜荒亭淺水咽微凍今晨稍和柔始覺芳意動經旬厭於東樂事須一縱籃輿無俗情鷗夷當賓從千花犯濃雲紅紫相餞送未知滕薛長乃若鄒魯閑娉婷北門柳別淚作淒痛陵陂少荒蕪亦未妨耕種道人喜我來清談破昏夢彈琴不須絃風林助吟諷嫩玉擣香杭浮蛆撥春甕嘉蔬剪朝露奇果市新貢西鄰亦可人明窓碾雙鳳人生一飽適此外更何用七年城北交事真朱阮共長詩不成篇臨行當三弄瓊瑤報木桃爲子末後供

宿青陽驛

燈火客帆盡人煙村市幽晚風號古木高岸東黃流
物色淮山近春光霧雨愁棲遲舊游地來豁十年憂
游南山歸簡張嘉父博士

吾生復何往樂身亦忽忽寶塔千帆外春城萬壑中
亂花綠側逕晚照落斜空坐想西倉老掀髯一笑同

選一作岸

書懷

柱腹文書未補飢積瘕潜塊不堪悲見曹怪我踈愚
甚不見田光盛壯時

客居書懷奉寄介然若谷才仲兼簡信民

客愁如長河浩蕩去不息未來已相關千里在咫尺
抱疾寄他鄉終年守岑寂中虛耗神志內熱損筋力
長虞二豎嬰復有寒餒迫怪渠甌上煙愧尔囊中帛
平生所讀書已如不相識坐貽鄉黨笑敢辭塵埃沒
舊游今幾時轉眄忽陳迹死者不復見墓草春已碧
生者天一涯未免陳蔡厄見曹乳臭在瞑目紛黑白
雖無未見書頗多雖黃筆出言輒周孔而不辨菽麥
啾啾要酬和內顧頗牽率坐令懷抱惡更覺天宇窄
忽忽十年事俯仰同戲劇從來肺腑親翻手胡與越
獨餘二三子肝膽猶鐵石尚怪東郭貧亦訝懷祖黠
西軒來何時簞瓢共飢渴念君不能已飯再三歎

誰能明予心皎皎霜夜月

小園

小園常在眼春事已天涯雨暗堤前路苔深林外家
曲池通小徑密樹隱殘花長愧隣翁酒囊空尚可賒

謁雍道士

雍有古畫甚衆盡爲郡掾
取去雍游貴人門甚熟

紛紛乾沒混泥沙暫遣塵言掛齒牙妙畫已歸三語
掾妙畫一作妙手壯游空記五侯家古壇背日藏芳草小樹

留春放晚花能共山翁同活計隔沐分聽一池蛙坐

遣一作坐伶暫
一作不遣

春日即事二首

隱几虛堂俗客稀片心眞與道相宜風搖柳帶千絲

亂雨勒花心十日期瘦病才蘇休強酒良辰雖好少
題詩賈生詞賦常流落歸去來兮在幾時

病起多情白日遲強來庭下探花期雪消池館初春
後人倚欄干欲暮時亂蝶狂蜂俱有意兔葵燕麥自
無知池邊垂柳腰支活折盡長條爲寄誰

寄前鎮西楊法曹

楊子文章老更新狂吟寡和過陽春雙聲疊韻俱難
敵指物程形似有神畫馬已無韓幹肉草書眞得伯
英筋可憐一首閑居賦解道連蜷能幾人

飲酒

人三百歲能幾何顧我把酒胡不歌窮通大抵夢南

柯我復夢中多蹉跎自古英雄亦何有往事紛紛不
如酒嗟子真得酒中趣幾度尊前揖星斗病起槐陰
鶯已老今日相逢還草草忽忽數日是行人且向尊
前一傾倒人生樂事亦難并明月清風況都好

讀史

陳壽謂諸葛將略非所長私恨寫青史千古何茫茫
謗議終自破公論不可當是非儻可定青蠅果何傷
戲呈七十七叔

大阮愛我詩謂我能詩矣我詩來無極愛之終不已
吾非聖者也但智慮多耳賜始可言詩吾智由商起
偶作

去年芳草又萋萋休歎王孫猶未歸更見春深送春
鴈三三兩兩傍雲飛

謁陶朱公廟

悠悠千載五湖心古廟無人鎖綠陰爲問功成肥遯
後不知何術累千金

睡

終日題詩詩不成融融午睡夢頻驚覺來心緒都無
事牆外啼鶯一兩聲

夢

夢入長安道萋萋盡春草覺來春已去一片池塘好
讀陶元亮傳

我父陶彭澤解言歸去來醉眠猶遣客却使世人猜
我愛陶彭澤不求絃上聲琴中如有趣曾遣幾人聽
寄壁上人

出門厭交情袖手看世故紛紛駒過隙忽忽豹隱霧
生平喜退縮未到心已悟尚餘好事人相就討新句
雖非琢肝腎終自費調護君看雪霜根豈受桃李妬
胥疏老支離骯髒舊賓傳何縣兩行纏遠泛一大鄒
從君乞妙語一洗詩酒污

寄壁公道友

符離城裏相逢處酒肉如山放手空已見神通過鷓鴣
子未應鮮健勝龐公且尋扇子舊頭角一任杏花能
白紅破箬笠前江萬里無人曾識此家風

用前韻寄商老

先生昔據道玄峰咳唾珠玉家爲空只今江西二三
子可到元和六七公雙鬢只期它日白千花猶是去
年紅須君吸盡西江水不假扶搖萬里風

道玄一作通玄扶搖

鵬搏一作

又寄無逸信民

文字撐腸不療窮詩來想見左書空雖非問道賭狂

屈

壁公數識二子學道不進

猶勝遺書訪子公銀杯久拚浮大白

桃花且看舒小紅記取浮盃無剩語忘年說似馬牛風

奉答壁公兼簡諸友

江山取別太匆匆對面難尋一段空顧我自無黃閣
樣如君合是黑頭公客塵衮衮催前浪俗眼紛紛替
舊紅炙日茅簷那接膝重來肯借一帆風

得李去言詩次韻答之

歌呼屢回曹相國牋書或似魏司空半生懷抱向餘
子千載風流獨此公未用反身藏白黑更須着眼辨
青紅無人與助求田費雅稱謝家林下風

督山伯蕭遠和詩并示舍弟

愛閑多病老封戎看子垂天上碧空懶墮未須攀此
老典刑政爾賴諸公酒如震澤二春渌詩似芙蓉五
月紅坐此逃彈天可恕不應獨許我乘風

用寄壁上人韻寄范元實趙子仲及從叔知

止兼率山伯同賦

故人瓶錫各西東吾道從來冀北空病去漸於文字
懶南來猶覺歲時公江回夜雨千巖黑霜着高林萬
葉紅政好還家君未肯莫教慚愧北窗風是時范元
實游蜀未
歸知止
得官
三子皆
奇士故
以此意
風調之

夜作呈諸公

風江舞暮帆野樹散歸鳥寒燈上壁角疎星綴林杪
歸來靜無事猶坐搜點藁放筆有新功無人與傾倒
不知新恨多但覺舊愁少石鼎倚殘爐茶煙看清鼻
明窗尋酒錢折簡喚諸老野樹
作常樹

東萊先生詩集卷第

東萊先生詩集卷第二

呂本中居仁

山陽寶應道中與汪信民兄弟洪玉父杜子
師張益中日夕過從自過高郵不復有此樂
也因作此詩寄懷

日日南風沙打圍掛帆端爲故人回長空渺渺水無
際遠樹冥冥花自開疾病久辜鸚鵡杓江山稍近鳳
凰臺月明雪霽山陰道尚想王郎乘興來

李太白有鸚鵡孟龜

鸚鵡杓二物名雖異其用則一也故得借用亦以發諸公一笑

春日

春風未雌雄尊酒自賢聖燕巢樓閣間鶯語花柳靜
知止獻傲軒

貧人九鼎猶不足淵明一軒長有餘人生趣向各天壤
鷗鷺鵲鷺猜鷄雛中郎妙處世不識風期自與常人殊
開軒便有千載韻友葛天氏無懷徒坐看松菊換時節
免葵挑樹紛榮枯五年却走各南北千里懷想空煩紆雙
魚沉浮久不至三徑寂寞今何如文章潦倒付丘壑疾病
蹭蹬思江湖何時共坐北風裏煩君小摘園中蔬

暑夕乍涼二絕

三旬埃鬱得清風領袖猶翻汗摺紅已是寬清無俗夢
更移涼簟月明中

暮蟬蕭瑟下斜陽已似茅簷氣噉衣團扇未須憂棄

置竹奴猶可助清涼

寄知止二絕

少年樂事未全諧疾病侵凌已不堪尚喜步兵頻入夢
夢中猶復似曹南

竹林還往風流絕剡縣交游氣味疎今代高人多惜

費千金未抵一行書

去秋知止與石子植皆許見過已而俱不來

游北李園三絕

雨映煙籠萬竹蟠枯條高下不堪看非千秋後多霜露
自是芙蓉不耐寒

去馬來舟絕往還此中情味却相干明年知是明寒食
行約花梢月下看

壁間詩字有疑塵庭下梅梢又作春獨有城南汪教
授當時同是看花人

壁間有鏡
德操詩

游北李園

小徑縱橫出紫苔綠陰高下綴黃梅榴花却是多情
思宿留薰風未肯開

寄李怱去言

東南之望廬山英李郎落落奇後生鳳凰麒麟在郊
藪芝蘭玉樹生階庭文章初如濫觴水行見萬里通
滄溟汪侯愛君筆不停謂君詩似秋風清世間兒子
甘縮手蘇過趙抃俱抗行少年才氣乃如此後來定
是賢公卿伊昔先朝文物盛君家諸父當朝廷外兄

復是不世才奇祥異瑞相輝映翻雲覆雨十年後昏
昏醉夢須君醒我生未壯日向衰疾病侵凌心已灰
眼中之人不易見千變百技常追隨詩書深藏半鼠
矢筆墨高卧封蛛絲功名已矣付公等田園肯放吾
先歸

贈汪莘叔野

汪子官不進四海漫聲名有弟極磊落氣宇和而清
三冬文史足十年書劍成出言見環穎府庫森五兵
於身則已拙泛如池中萍輕肥置度外辛苦抱遺經
乃知佳子弟必由賢父兄念子初來時我方疾病嬰
相從四寒暑所歷不可聽昏昏醉夢裏得君時一醒

擁爐共殘火軟語當盃譜君亦不我厭爲我雙眼青
勿云軀幹小氣吞橫海鯨懸榻念文學開遲憶淵明
二子風流遠感君兄弟情窮通有時節此士尔勿輕

新冬

西風吹禾黍落日在陋巷杖藜訪新冬霜樹眇空曠
人煙村舍西行旅古原上晚山晴更好秀色常在望
居間得真趣日欲就踈放豈惟憎俗徒庶自免朝謗
東鄰酒初熟清香亂盆盎徑須騎牆頭挈榼獻窮狀
吾生足羈旅久病非少壯銀杯多羽化布帆且無恙
雖非陶潛隱不負徐邈暢

多一作驚
且一作保

贈謝無逸

君不見城南千樹桃君不見澗底百尺松松生偃蹇
卧霜雪桃李一笑隨春風百年澗底終自苦桃花猶
得暫時紅嗚呼志士每如此衡門高卧不見用心雖
無瑕飢欲死

贈張若虛

病憶江湖去書無尺寸功平時宴人子忽是富家翁
活計呻吟裏交情夢寐中獨餘張處士相近數過從
贈信民

五年客符離端坐受貧病從來踈出門今乃懶成性
官多豪富郎分明與時競取醉不論錢定無塵生甑
豈但相娛樂頗復自賞聖汪侯雖官居笑語怯豪橫

折腰衆人後瓊林自瑋瑋育後足官府眼前謔恭敬
偷閑過草堂遣興眯浪浮雖非醉紅裙清談却差勝
秋高數能來勿厭阻泥滓

符離行

符離之民難與居五年坐此如囚拘比屋生涯但剽
劫諸生學問只鄉閭南鄰經年不相見北里雖見復
麤疎窄衣小帽走塵土也復生貌施襟裾對此自然
憂氣滿疾病日益何由除君不見圖經所記又可哀
此州自古無賢才

探梅呈汪信民

縞帶銀杯欲著塵小園幽樹已含春風流王謝佳公

子臭味曹劉入幕賓細采定無泥土浣暗香猶帶雪
霜新剩摩挲腹搜奇句去惱城南得定人

泥土一作塵土

奉懷張公文潛舍人二首

顏子置身陋巷屈原放跡江湖何似我公歸去馬羸
不厭長途

腕中有萬斛力曾次乃千頃陂字畫顏行楊草文章
韓筆杜詩

答無逸惠書

三年讀書少餘味燈火可親病爲祟謝侯好事憐我
窮時遣雙魚問鷓鴣交情乃似親骨肉學行坐越諸
公輩曾中萬卷書屈蟠少日力戰登詩壇下帷却掃

謝俗子凍吟不管兒號寒只今食粥已數月千慮百
憂煩筆端高才本是棟梁器苦語終無儒生酸樂章
短句又清絕陶寫萬象嘲江山江南草木不得閑問
君何爲愁肺肝十年行坐想風不千里竟夢勞追攀
我無良田歸不得忍窮氣味君應識囊貯未了歲寒
計學道空愧琳與璧交親零落半鬼錄白日輕去真
可惜終朝撥火煮蘆葍南山之南待君喫

寄知止才仲

一門叔父到卿好中表弟兄惟爾賢往事關心空自
語新詩好句與誰傳溪山已近堪投老文史雖窮莫
取憐仲弟墓頭今宿草爲渠先賦補云篇

寄張益中

五年望張子兀坐四壁空今晨千里來如熱濯清風
笑談不改舊憐我衰病攻斯人舊豪氣頗似陳元龍
只今更省事終歲兩頰紅何知珊瑚樹却倚塵埃中
晁侯夙所敬見渠如見公網羅技出脚遠逐冥冥鴻
同會得王郎敲門夜相從殷勤一盃酒目送西歸鴻
人生少如意此樂難再逢君家老季鷹爲高韻留吳松
風流遠孫在一櫂何時東不嫌道里遠爲我略從容

元日贈沈宗師四首

大觀三年真州

東家起傳觴西家起相喚我亦了新詩成此奇一段
念無豪髮益但見日月換出門語沈郎造請吾亦漫

念昔從諸賢關汪老耆舊是事今則無斯人亦難又
尔來見公子却立兩公後不倦以終之可以爲子壽
沈郎固可人好善乃天性迹隨萬事遠心與一物定
蕭然四立壁筆墨自溫清更持孟賁勇少折楚士輕
君無綺紈氣我有冰雪容相期五石瓠共濟萬里風
江山秀句在內子空洞中還身視塵滓當有一日功
梅

南雪看未穩北風吹已殘才堪十年夢不稱一生酸
日月方回首風霜與凭欄遲明出謝客頓覺帽圍寬
苦陰

破牖冬仍在逢正陰更頻寒流未解凍雪意欲妨春

畏病還踈酒逃寒懶見人東郊小桃李還是一番新
還一作別

贈浹上人

一庵便送淵明老四海共傳摩詰詩本自妨人枕邊
夢不能陪汝劒頭炊交遊太半飢寒裏疾病中分少
壯時西寺木魚東寺鼓三年三見浹閤黎

正月十二日夜作

春來消息未真傳父負蒲團一味禪燈火侵尋作佳
境冰霜偃蹇過新年江聲悞落三更雨野色遙看萬
斛船咫尺風光不相貸忍令好語到愁邊

咸安公主

漢朝公主歌黃鵠秦地佳人唱柳枝想見雲車度沙漠一盃重醕酌明妃

明妃

秦人彊盛時百戰無逡巡漢氏失中策清邊烽燧頻丈夫不任事女子去和親君王爲置酒單于來奉珍朝辭漢宮月暮隨胡地塵鞍馬白沙暮旂裴黃草春人生在相合不論胡與秦但取眼前好莫言長苦辛君看輕薄兒何殊胡地人

正月十三日河堤上作

雨着河堤柳着煙小樓燈火又今年東風不與行人便留滯長亭十里船

昨日晚歸戲成四絕呈子之兼煩轉示進道文疎燈欲盡漁商市小雨似開桃李顏一夜簷聲鳴甕盎無人知我坐蒲團

卧疾江邊久未回懶隨兒輩走塵埃天公尚有餘情在肯放梅花自在開

疾作病

春愁故故妨人樂舊薛新苔不暫晴想見江郎閉船卧滿川風雨報天明

是卿白髮風流在肯伴香車作夜遨借問典衣充戲責何如沽酒喚吾曹

上元夜招沈宗師不至聞已赴郡會作二絕戲之

燈火滿城公不來爲公雕句洗塵埃春愁不到城西
寺更約梅花緩緩開

白酒紅燈稱意春知公未免踏黃塵繩床好在休相
憶輸與瑯琊浹上人

白濁作綠酒

浹上坐求枯木庵詩戲成兩絕贈之

枯木庵中浹道人百年無影卧輪囷未須特地通身
去放取技條自在春

前身石霜後身浹如印印泥風去塵認得當時侍者
意無人知是密庵人

密庵人一作呂居仁

正月末雪中酌

柳着河冰雪着船小桃應誤取春憐床頭有酒須君

醉又廢蒲團一夜禪

次韻張生

密庵居士渠不識齒髮則衰心未然樽下不知公子
貴酒中差覺孟生賢已吞舌本三千丈却佳人間五
百年觸忤風光君莫恠捧頭無地可逃禪

追成舊作

滿江風月一船霜無計留君只自狂燈火隔簾香隔
坐無人知是竹枝娘

久不得寸仲書因成兩絕寄之

望大趙書如渴驥憶老汪膠無續弦看遍江南與江

北小屏微雨是斜川

小屏畫淵明孟夏草木長詩

病去詩無一點塵亦知摩詰是前身憐君更似西江
水合伴倚松庵裏人

晚晴

斜陽入花柳渾欲不勝情春事乃如此病軀安得平
尚堪衝宿酒復作快新晴荒簷足烏鳥莫歎晚來聲
安得平一作殊來平

連日與一上人會話密庵清坐附火乃有山
居氣息因成一詩奉呈

春風吹茆簷落日半花柳餘寒盛氣來佳辰爲誰有
公來但默坐有味皆可口端如列鼎食衣被以醇酒
煩言不知要實自費斗數南泉山下人不計可否
山柴晚復煇當爲一舉手荒江甚沈寒此味亦長久
不嫌薰病眼重當爲公取

一上人屢言瑯琊南塔之勝予蓋樂之而未
能往也

二頃良田一畝宮好山當自屬林公須君留我卓錫
地要聽颼颼萬壑風

夜坐有懷

西還豈不好本自乏周旋道有魯一變歲無官九遷
疾風驚半夜惡況極今年咫尺沙頭路猶堪着釣船

晚春即事

春色不自惜曉寒摧折之殘花帶雨去薄酒信風吹

尚有尋行債初無了事癡詩得奇味當使阿戎知
廣陵道中寒食日

風雨屬連春事休碧鱗三尺薦行舟短牆不見桃花
面付與長江自在流

南來消息不真傳政恐相逢却未然何處青帘足沽
酒粥香餠白是今年

就甯子儀求酒

暈息嗁然君莫驚飢腸渠自作雷鳴須公一勺羔兒
酒伴我夜窓聽雨聲

東萊先生詩集卷第二

東萊先生詩集卷第三

呂本中居仁

廣陵

借韻賦用
文潛體

往來六十里各是一江郊柳色團渦岸春風楊子橋
好山當斷岸野鳥度空巢一任雷塘路暮天風雨號
沈宗師甚喜江梅而微貶醑醑因成一絕

淡綠衣裳玉作粧好風涼月自相當沈郎笑汝多情
在不似江梅滿意香

勸張李二君酒

張侯好詩如好色不敢爲主而爲客李侯好酒如好
詩心雖甚壯無人知兩侯風味俱不惡如芙蓉與木
芍藥午窻留客看筆快晚沈無人猶睡着廣袖漸愛

天寶粧大字不作元和脚世八譏笑乃其分政是仍
叔之子弱病夫坐穩無所未荒簷斷雨鳴春鳩爐煙
未盡消百憂恨不綬帶從公游何時清江橫小舟與
公一醉荻花秋却來密庵參叟牛

庵居

無語花香變夕陰稍閑復恐病相尋正應獨有江山
分素自都無廊廟心堂上老親雙白髮門前稚子舊
青衿兒曹不會庵居意古澗寒泉疑至今

小園即事

千花老無蹤衆草來可喜欣然得幽尋我亦病良已
飛飛兩蝴蝶不悟塵土裏禽聲甚可人亦似相汝爾
人生貴懷志不必須其美三年白沙詩已費千幅紙
問君何所樂赤手費摩洗短屏看遠山心作千萬里
此豈盡者功實自一念起君當如是觀在此不在彼

登舟

夜雨曉猶滴怒風晴更吹已無行役念寧有別離悲
舟楫三年路江山一月期東庵舊還往不廢百篇詩

張樟秀才乞詩

白蓮庵中張居士夢斷世間風馬牛風塵表物自無
意神仙中人聊與遊

張舊與前輩名士往還甚衆

澄江似赴北城

曉苦雨不放南山秋君當先行我繼往向吳亭東留

小舟

效古樂府三首

君住長江邊妾上長江去長江日夜流相思不相顧

住一作家

長江日夜流妾心終不改誰謂江頭人相思不相待
東家石榴紅西家石榴紫俱是一種花同生不同死

讀太真外傳

上盡馬嵬路東風吹舊京乾坤已新主草木自秋聲
錦韉千年恨皇輿萬里程寧知挽船士亦有別離情

簡甯子儀二絕

只恐老去被花惱更欲忘憂須酒澆何似山堂病居
士閉門高枕過春朝

新晴欲上南樓月柳可藏鴉水蘸牆無限客愁芳草
裏不知風雨阻斜陽

書寄浹上人

胷中無一毫事筆下有千斛力走遍江南江北山滿
堂禪和不相識

呈愚上人

不能歸續侍中貂裘有聲名伴老饒萬里更行看騾
裹一枝才足賦鷓鴣詩囊硯礪君其漫藥裹侵尋我
亦聊舉目雲天盡新語殷勤收寄一牛腰

贈浹上人一上人

君行南山南我在北山北不聞浴鵲白但見漆絲黑

老境欲垂垂快意須得孰如百雉堅而有一日克
浹如澗底松縱老終不踣一如雲間鶴不復可羈勒
我如千里風遇此兩鴻鵠明珠脫氛翳曉日破昏塞
宿障不盡除宵次猶筆墨君看說詩口乃是拔山力
冰霜卧偃蹇歲月飽封殖誰能窺藩籬未易得闚闕
政當斂光芒不必須緣飾相從無何鄉敗衲依破衲
更今好事人妙語添一則

政當斂光芒不必須緣飾一作政當磨其鋒共掃頑惛賊

雨後月夜懷沈宗師承務

雨雲攬江色偃蹇破昏睡千花閉紅紫妙見一室內
披衣行夜永明月在船背微風過蕭瑟古柳立蒼翠
脩然一蒲團豎坐覓詩對我生無南北所到意輒遂

孰知十年游從此清淨退頗念城比人結友老杉檜
漫隨長鋏歸甘作短檠棄出門萬里涂已駕安得
何當持被來把酒相就酌

開一作開

秋夜示李十

晴鳩不時鳴雨鳩不暫歇相去跬步間婁見履齒折
寒泥擁衰草秋扇罷殘熱今晨好風景稍貸屋頭月
清光冷相照玉艷滿金玦喚客坐前窻文字相漂雪
殷勤傍詩律未暇之趨檠瀾胡談經口邂逅如意鐵
我歌君輒書字字有行列不須陞極嚴但要兵衛設
譬如南山石琢齒當并潔真成一戰霸未可三鼓竭
人生各涇渭世事亦滕薛高堂食肉人兩馬方踉蹌

何知緼袍底猶有不安節

中秋日沈宗師約遊城西泥雨不果因成四十字兼寄趙才仲

遂阻城西步兼懷雪上游長風掠歸燕苦雨應鳴鳩
月向誰邊好寒催社後秋傳杯有新韻能憶老兄不

桃花菊

嫩粉殷勤換淺黃鬱金叢裏見新粧已翻百疊紅衣
潤更沐九回沉水湯

九日晨起

漸歇歐蚊手眞成把酒天長河印曉月老木聚荒煙
了了江山夢區區文字緣南堦兩三菊極意作今年

王氏郊居

江山處處好落日極登臨雨續疎畦潤風吹柿葉陰
客船頻上下水鳥故浮沉尚有南飛鴈丁寧可寄音

對菊

稚子尋花莫漫狂已知衰疾負重陽新霜有意留青
蘂更放殘枝十月黃

雨後至江上有懷諸子

落日滿寒雨長江收夕霏定知聊復爾敢望不相違
野鳥晴相喚殘螢晚自飛殷勤兩山口好爲放朝暉

登南樓

疾風吹沙不成雨十日狂陰倒殘暑江頭樹木半焦

枯不厭潮頭洗塵土南樓反照千丈紅落日却在洪
濤中舟人漁子莫惆悵更借朝來東北風

歲晚作

南山雪雲千尺高北山晚田無寸毛富兒巨家飽欲
死笑我陋巷長蓬蒿道人坐穩忘作勞百念解縱如
垂橐但當折簡喚我曹並坐擇蠹煩抑搔筆力可借
秋江濤莫學人間膏火熬

弔古塚

荆榛閉莽蒼千歲一孤墳生則無是叟死應冥漢君
略無他日念誰有不堪聞想得西陵道荒臺亦暮雲
奉送子之還京師

日月老投閑文字今削跡便然腰十圍欲吐啄三尺
頗懷平生友相就語肝膈諸江好兄弟夫子眉最白
詞林三二公子實門下客布帆千里來許我間賓席
階庭出蘭樹戶牖照圭璧詩如駕高浪萬頃隨筆力
寧爲首陽餓不作璧奚獲乃知工語言要是飽糠覈
茫然李杜壇未免陳蔡厄出門觀善陣斂手避勍敵
澄江搖夜霜歲晚見沙石釵頭眉蛛絲即有梁宋役
士生多艱虞道遠自古昔相期逍遙游不計天地窄
名聲了三黜談笑供百謫別君爲此言可當繞朝策

外弟趙才仲數以書來論詩因作此荅之

君才如長刀大竅當一割正須翦其鋒却立望容髮

平生江海念不救文字渴茫然攬轡來六驥仰朝秣
病夫百無用念子故踈闊未能即山林頗復便裘褐
前時少年累如燭今見跋習中塵埃去漸喜詩語活
孰知一杯水已見千里豁初如彈丸轉忽若秋兔脫
旁觀不知妙可愛不可奪君看擲白盧乃是中前筭
不聞鐵甲利反畏疆弩末與新導大路過眼有未察
君能探虎穴不但須可掬

子仲佳士也年十七八時隨其父演在定州子開及

晁四諸人比其文柳子厚

過子之泊船舊亭

江郎泊船處草徑不勝秋客裏終年別春前萬斛愁
山橫采菱口月滿望江樓政可夢春草莫令吟白頭

望金陵偶成兩絕

臺城南望入斜陽尚想能詩王樹郎乘興風流莫涖
笑眼看直北是雷塘

雷塘別有風流坐可作南舟兩日行江水自流春目
好不知芳草爲誰生

烹茶

水光欲盡瑤璃影玉色初浮翡翠斑便覺麴生風味
惡小爐新火對蒲團

西樓

小院無人日自長隔簾時有艾荷香客游未作安居
計更借西樓一夜涼

寄信上人

笑語三年別舟航十里淮新霜變草木好雨過風靈
萬事不如意一生常好乖何因伴明月特地入君懷
秦處度與一上人同宿密庵處度爲一畫斷
崖枯木

小庵無客亦無氈遂有高人借榻眠一夜西風撼枯
柳不知春在石崖邊

寄謝無逸并汪叔野兄弟

老謝風流綠綺琴小汪兄弟亦南金文章已悞半生
事江海略酬他日心好酒不當愁偏仄舊書差尉病
侵尋平生恩義泮宮老斷綆寒泉百尺深

汪信民沒
方數月

月下

白鷗笑汝不能飲澄江惱人勤作詩可惜南樓好風
月只無春柳對瓊枝

汝一作我

劉穆之

金拌一斛貯擲擲戲調兒童走欲狂不謂林間有元
亮念公時在酒中藏

戲贈道淡上人

忽逢邛溝道人淡如見錫山居士秦間着世緣渾忘
却知公不是箇中人

喜章仲孚朝奉見過十韻

苦語不難好舊交今則無但能留客坐已勝折腰趨

只有連根煮初非滿眼酤苔痕記拄杖雪影傍跣跌
語道我恨晚說詩公不迂丁寧入漢魏委曲上唐虞
歷歷有全體忽忽或半塗真當置度外不敢望庭隅
日月換新歲江山非故吾他年佳句在與畫密庵圖
山谷論作詩當自韓李陶唐歌及五子之歌
以下皆當精考故子論詩必斷自唐虞以下

觀甯子儀所蓄維摩寒山拾得唐畫歌

君不見寒山子垢面蓬頭何所似戲拈拄杖喚拾公
似是同游國清寺又不見維摩老結習已空無可道
牀頭誰是散花人墮地紛紛不須掃嗚呼妙處雖在
不得言尚有丹青傳百年請看眼落筆前令我琢
句逃幽禪異時淨社看白蓮莫忘只今香火緣

寄朱時發

焚橋脊梁硬如鐵天下拄杖打不折倒騎佛殿出三
門南頭學來北頭說昔苗未生今作米更判阿師三
尺觔公但吸盡西江水莫怕庭前篋箕尾
篋箕尾事出
小釋迦錄

寄穎昌諸叔

身如許縣老聾聾承心是江湖版下僧萬事聊憑曲肱
夢一尊時近短檠燈舊遊可數終難又惡況雖多不
厭曾尚憶少年情話否夜窓相對髮鬢髯
心是一
似

謝人送瓊花白沙人謂瓊花爲無雙花戲成

兩絕

疑塵欲滿讀書窓忽有瓊花對小缸更喜風流好名

字百金一采號無雙

斷腸風味久難尋尚有花寄此心折盡長枝已春
晚只宜涼月不宜陰

觀甯子儀朝奉山堂諸石三絕

箇中真味久難忘但覺人間萬事忙今日爲公留不
得剩分詩思入山堂

向人懷抱終何有過眼崢嶸得暫醒更喚秦髯與前
袂爲公題作小南屏

知公心似山堂石悞落人間几案間今日風光已相
負看朱成碧未能還

十一月五日與才仲弟相別于白沙東門之

外悵然久之不能自釋乃知謝安石作惡之
語不爲過也因成八詩奉寄可見別後氣味
亦可并示京洛間親舊也

終年想顏色未有食頃忘君寧不我念苦畏冰雪妨
斯文百戰罷闕士如堵牆孰知五湖口一葦可以航
君才不長貧太阿之在匣故知讒慝口不受龍象踏
此道有從來骭麟端不乏相期甕頭春夜語重一呷
盛欲與子談乃復爲此別忽忽得餘歡把酒到耳熱
人生不如意肝膽有楚越何知若人曾中有積立鐵
伯姑無恙時令我與子友周旋以至今各是遺種叟
文字種聲名於身亦何有還書問兩弟是事君識否

婦如先姑賢兒似乃翁好識君相與心見我亦傾倒
頻年作離情悟賞到丘嫂卜鄰洛水陽此語當在早
低頭拜東野未厭撻挾窮停軍問縮酒不計牛馬風
胷次脫塵滓欲與秋水同斯人未遽遠當在阿堵中
往者汪信民愛我不自勝以我如古人得與子並稱
若士不復有斯言當伏膺期君極膏沃更作無盡燈
鍛以百鍊剛淬以萬里流閉門待彊敵忽見天地秋
以石投水中萬歲終不浮堂堂倚松老於今忘百憂

東萊先生詩集卷第三

東萊先生詩集卷第四

呂本中居仁

山水圖歌

君不見南江老龍夜不眠令我破屋開青天千巖倒
壁卷角上一榻却在洪濤前又不見江頭古木一尺
圍猿猱接手懸高枝雨中寒蘆披靡去天際風帆先
後歸陳生故是可憐人筆雖未到心已親南村北村
渴欲死怪此一室無纖塵鄭虔祁嶽不解奇韓幹畫
馬空多肥萬里咫尺君得之更看湘江雷雨垂

陳生
欲畫

湖湘圖

庚寅年正旦郡中客次作

曉霜挾霧入寒廳四坐伊優不暫停剩欲掃房作新

歲念無餘瀝到空瓶詠諧與世聊從俗嘯傲宅年可
乞靈更爲旁人住俄頃坐間愁殺兩螟蛉

題李伯時維摩畫像圖

老松攬天四無壁小菴不勞容一室野竹入戶芭蕉
肥下有無言病摩詰文殊妙對亦未真身如浮雲那
得親驚倒同行問話人彼上人者何所云龍眠好事
筆有神不避世間狐兔群掃渠胷中千斛塵多口阿
師聞不聞

掃梁一作洗盡

遣懷三首

何山不堪隱何家不可居古來子華門亦著荷畚夫
荒田脫積雨未免供晚租今日視昨日但見有不如

故人勸加食老親憐嗜書寧知毛錐子不可一日無
一作一日不可無

秋風襲殘暑忽過江上林旦日扶杖來不見十畝陰
蔬畦甚寂寞亦受霜雪侵念此不常好如我宿昔心
濤頭落崩岸野鳥助謳吟潛魚着沙底避網冬更沉

襲一作塵

異時忘言人馬驥今宿草生平不如意欲伴寒木槁
遂令藜莧腸更盡組繡巧三年對空案誦子詩可飽
從來文字工不解顏色好相逢期後身再訪西院老

謂信民也

符離阻雨

東風吹船窓未曉天復雨篙師促添纜卧聽泥濘滿
不知城北園春事今幾許舊游如宿昔花柳默可數
鄰里先後來頗復相勞苦東家獻牛酒西家饋雞黍
感渠長久情愧我無所取汪侯哦詩處積水敗環堵
念此不忍行不但出入阻七年此端居畏病如畏虎
故人饒與黎此老可共語

伍員祠

伍員廟前一丈碑上有野鶴雙來棲水雲杳杳涼去
遠風雨冥冥秋到遲江花相趁野花發舊燕不隨新
燕歸大夫遺恨竟何許楚越勾吳今是非

東園

垢汗久思出江山秋更新荒田出龜兆老檜落龍鱗
風月猶堪夜蒲蓮浪作春籃輿亦乘興實自厭冠巾
寄琦監院

往時濟陽晃公子今日靈巖琦上人千山不礙一月
曉北樹忽見南枝春箇中有吟渠不識底處無情公
得親不知碧眼之面壁何如黧顏西入秦

即事戲答季一

斜陽着高柳環堵半黃昏小圃三年旱荒池一尺渾
粗知詩有味寧使婦無禪不信晃公子猶招楚些魂

季一詩云思與諸公論
人物試憑清議賦招魂

湘竹

小雨催寒六夕暉湘江風味可憐人班班玉淚無時
盡裊裊金梢別是春

有懷宿州城北因作詩寄子仲

宿州古城城北隅雨罷晴開如畫圖雜花亂藥未須
道白杏一枝天下無香風裊裊入短袖明月蕭蕭隨
蹇驢二年不復見此樂清江萬頃正愁予

示沈宗師

十日兒號不出房殘梅猶在小瓶香沈郎喚客煮湯
餅政恐匆匆未得嘗

九日狂陰一日晴落花飛絮作清明與君携手南樓
去共聽長江月下聲

夜坐戲成兩絕呈迪吉宗師二友

夜窻燈火著新寒喜見蒲團一味閑縱有好詩人不
要却須還與檻前山

踈簾欲上梧楸影遠枕微聞盆盎鳴甚欲分身就公
宿只愁塵土變江聲

戲成兩絕奉簡章仲孚兼呈宗師

日日勃鳩相應鳴年年春草趁愁生道人不怕冰霜
面又作南舟十日行

沈郎愛客如愛酒章子問詩如問禪肯共寒爐撥殘
火共搜佳句作新年

老松

奉君以綠綺琴報我以雙南金
玉中琥珀不須盡聽妾一聲行路吟
君看庭前老松樹上有杳默不斷之
清陰牆低未礙髯髮古歲晚不辭霜
雪侵東園桃李自妍好與君百生同
此心

楊州雍熙寺納涼

高樓有餘涼但見旗脚動鳥語簷角來
仰聽風響弄江山舊還往草木老賓從
平生一笑適可得萬鈞重脩然六尺床
更許佳月共

訪張鑑秀才兄弟

眼看霍霍萬錢食便就匆匆五鼎烹
何似張侯五兄弟閉門相對飽芹羹

邵伯埭路中

行前蒲柳後鷗鳥乃似白沙之舊居
忽見雲天有新語不知風雨對殘書
往來河樹幾傾蓋上下江船如貫魚
更與河山結香火夜窻重枉故人車

寄周司理

日月走動勸舟楫卧煩暑涼秋在萬里
客子安得語周侯磊落人憐我自熬
煮殷勤半月留可得一笑許別來今幾
日坐此百里阻清風不時來曉月仍半
吐卷簾看脩竹忽似對眉宇人生行樂
耳舍此皆自苦終期卜隣歸重聽對床
雨雖無嗚嗚歌亦有坎坎鼓

山光寺前泊舟值雨

輕雷喚小雨憶在白沙時綠酒留連醉紅燈取次詩
好風那復有涼月自相隨獨上山光寺清歌無柳枝
步月有懷

平生最愛花梢月可與青樓一等看病去老來渾忘
却曉窓晴日上蒲團

楊州留一上人

白日東風吹客衣小園春在掩芳菲殘花過雨飄零
盡好鳥穿林自在飛往事虛成采薇瘦故人頻有食
言肥知公未厭西行晚且伴江船緩緩歸

送一上人之京師

東風吹雲十日雨卧聽城頭打衙鼓道人遠自山中
來共坐南窓灌泥土自然高蹈到羲皇豈止微言變
齊魯萬牛回首不震掉一葉橫江且掀舞未能入水
取蛟蜃尚欲投戈伐貔虎念公守此非一朝木病魂
魂無枝條已盡千峯西嶺雪更夢八月錢塘潮京城
塵沙深一尺是中莫留公履迹權門躡踏兒女笑我
一思之不能食片帆無事早歸來爲公一洗山中石

擬古

狡兔死三窟老松堅百尋物生各有願共此分寸陰
荒城六月旱長江三日霖稻苗不遂死幸無蟲賊侵
皇天不私覆一語銷百壬先王典刑在落落傳至今
願以小人腹而爲君子心

寒雞不能晨，苦節自朝夕。上爲雲雷興，下乃龍蜃宅。
坐懷陰，外天缺。月掛殘魄，少來可喜人。牖戶陳玉帛，
平生千萬言。略省二三策，牛山所種木。日在斤斧厄，
念君十年心。使我雙鬢白。

潘邠老嘗得詩云：滿城風雨近重陽。文章之
妙至此極矣。後託謝無逸綴成無逸詩云：病
思王子同傾酒，愁憶潘郎共賦詩。蓋爲此語
也。王子立之也。作此詩未數年而立之邠老
墓木已拱，無逸窮困江南，未有定止，感歎之
餘輒成二絕。

漫營新句補殘章，寄與烏衣王樹郎。他日無人識佳
景，滿城風雨近重陽。
好詩政似佳風月，會賞能知已不尤。萬里潘王舊鄉
縣，半江斜日落歸帆。

寄李商老

竹不可一日無酒，不可飲不醉。平生嗜酒愛風竹，此
意不許凡兒會。南來經年飽塵垢，袖手甘隨百夫後。
文章漫作無功身，只了兒曹補窓竇。黃沙障日江漫
流，青山喚我十年舊。憶昔泊船鵝翎口，把酒遙爲故
人壽。只今身在心已老，千巖想像靈芝秀。君家兄弟
固不尤，解挽三友勤相就。中郎卧病過春晚，昔則酒
狂今詩瘦。山房夫名不墜地，諸老風流未宜棄。老檜

參天可乞盟，深食餽羹乃無味。如君高韻千載同，可更託身三數公。丈夫勁挺要長久，百萬叩關一夫守。曾中江海不須道，此流何必計升斗。眼前勃窣訐三友，聽客所爲公絕口。

雨中作

咄咄真成夢悠悠，復未知寧爲牛背語。不作劍頭炊雨挾秋聲，亂江含暝色悲故知無事飲。猶勝頃來詩示內。

貧賤不可忘富貴，安足羨我生未三十。種種厭貧賤，宦情肱九折。老味金百鍊，稍回功名心。來結香火願，平生所知人久已焚筆。見是中無真寶，不在儒術緣。有如退飛鷁，更借逆風使病車。頗癡絕句與共開宴，小女真吾兒。語學春鳥轉，初非本來有。且作夢中見，居看手捉鼻。絕勝扇障面，他年從吾名。同入隱士傳，寄外弟趙柟材仲。

長年更多疾，念爾不能忘。夢云關山靜，書來道里長。形骸且憔悴，草木自蒼唐。古縣踈還往，微官絕歎揚。頗聞能吏事，仍不廢文章。客舍襄江下，人家筑水傍。婁成千里目，虛斷九回腸。我老知無用，身閑欲半藏。預愁章服裹，仍怯簿書忙。事業煩詩卷，生涯在藥囊。得非嵇叔懶，寧似次公狂。野檜多鱗甲，寒松半雪霜。高天一鴈遠，小徑百年荒。每惜朱絲斷，空懷素錦張。

舊交渾潦倒此語更微茫欲判五斗米先尋百本桑
感嘆得共啜薄酒要同嘗匣裏出鳴劍眼中除眯糠
未容窺笑奧虛自倚門牆指點飛鴻路何人識故鄉
一本自野榆多麟甲寒松半雪霜下云直須守歲晚
莫美踏春陽夙受祖師印得遊夫子墻直言無異理
未學故多方匠裏得明鏡感先能起介儒君才可
吾說未應亡每惜朱絃斷空懷素錦張馬難逢伯樂
小遇百年荒却倚摩天刀兼除治水航舊交渾潦倒
麟有遇鉅商却倚摩天刀兼除治水航舊交渺潦倒
此語更微茫欲判五斗米先尋百本桑
頻受北風涼想弟備字好見兄籌策長殘羹可共
薄酒更同嘗題勉福無害義遲却生妨時尋二
三子同看億千場指點征鴻路無人識故鄉

京師贈大有叔

尊酒相逢十載前綠髮紅顏俱少年尊酒相逢十載
後皮黃肉皺俱白首叔口鴻鵠旦暮起如鷹更
深走南來行李初一逢長安舊弟冰雪中閉門不識
故人面豪氣直欲輕元龍平生爲道不爲食少小所
期皆目擊何時相就過江南同訪曾遊舊泉石

寄蔡伯世趙子仲

我恨不識鹿門公蔡郎心期十載同不隨吏部曹中
板去赴長蘆寺裏鍾

一坐十月長江濱自君之來心轉親還書起居清源
君人間紛紛何足云

同行者誰平原孫於我不但骨肉親誰言不爲桃花
去只愛江山亦可人

二子逃禪不計年江湖重去水粘天直饒透盡三關

記到底終成百漏船

木魚光裏兩蒲團意氣薄我平生歡盡底告君君不
會空得癡人尋筆端

兩蒲團謂愚壁時
諸人爭收壁書

寄范子

范郎平生萬人傑只今未免兒號寒三江五湖在臂
次琨玉秋霜看筆端舊疾祇令肝肺熱春風欲開桃
李顏待約南江今夜月與渠萬里報平安

春風

春風隨長江一日行萬里蕭條起岷山歛忽度揚子
江南千酒樓春風樓上頭金樽開翠幄青帘吹客愁
長堤二月暖寒溪千古流紛紛桃李處處作芳華

不見梁間燕空悲王謝家

聽琴

君不見龍門之下百尺桐漂霰飛雪愁寒空何年班
爾落君手小窻伴坐歌南風恍然如着山巖裏不知身
在塵埃中初聞平野飛鴻鵠歛聽金盤起珠玉遶壇
古樹鬱嵯峨六月吹霜作寒綠折楊黃花不須道別
鶴離鸞尚堪續君不見開元天子醉西都音聲十院
留歡娛當時臨軒奏此曲徑須解穢煩花奴乃知恬
淡世莫識無絃之趣何時無歸家愁厭箏笛耳此聲
一聽還已至會湏流水詒鍾期試向爐中覓焦尾

雨後

新花欲盡竹當欄喜見空墻野色團稚子乘陰時蘭
菊僕夫留水渾萵蔓茶香於汝初無分酒孰逢人也
強歡惱亂春光君會否小瓶猶占一枝殘

送山伯良佐東歸以務道期息塗爲韻

荆棘生良心米鹽入塵務芬芳老不達豈不以此故
人生錐處囊穎末要立露玉壺近青蠅沒沒自黜汚
剗心萬物表却立看脫兔

臨別當一言狼狼念忠告縹囊可取足往結萬古好
默識古則然愚智同一道遠師顏氏子近比伯業操
文章有妙斲期子開笑奧

吾詩如清風去留不可期灑然或一來不繫九子知

兩郎從我遊豈但窺藩籬山房光焰在實藉衆木枝
斯言可三復如我清風詩

昔我同學生文字虎而翼仲弟最多才去以六月息

自吾失若人每語輒氣塞子如求數君名御莫怪蟲賊

曾懷但明了几案付塵黑

贈我貂檐榆報以明月珠古來聲名人一一行此塗
漢中屠沽兒適可曹公奴人生嗜好異至有海上夫
孰能識其然飽此萬卷書

河水清贈良佐兼寄商老

河水清江水黃南山北山日相望恨君不止白石房
與誰同遊南郡郎白玉刻佩明月璫如鳳四海求其

鳳道里遼遠日月長爽氣自足陵朝陽舉酒送君君莫忘

同晁季一李天紀過沈宗師北莊因成長韻
三年城南居不識城北土但聞玉雪郎去作猿鶴主
今晨籃輿來握手相勞苦勝遊有佳士洗耳聽妙語
晴窻背雲壑落日在環堵晚風生白楊想像原野古
斷崖懸老木小港聚寒雨却觀城市人努力自熬煮
畏途出枉席禍福有未覩杜陵懷壯遊無忌笑豪舉
二者覓真是政恐君未許千秋柴桑翁妙句聊一吐

郵上祈雨

泥龍蜴蜥困追求旱遍淮南二十州寄語天公莫輕

許少留明月作中秋

清風

清風如君子所至有餘情忻然破煩溽百醉時一醒
嗟我二三友飄散秋葉零不知城南王何以識我名
歌斜左手字勞苦如平生會寫登樓賦一弔漳濱靈

學視

學視觀懸虱病耳聞聞蟻紛然酬六鑿萬劫費指洗
君看林中蛇妄想從何起忽聞一妙語初無強料理
回觀積年疾乃是一念使誰能明此心香山老居士

寄全弟

殘暑墜空屋舊書穿破帷才蒙小雨潤遽得好風吹

逸少每作惡淵明常病羸他鄉憶吾弟苦語自成詩


斷雲

斷雲西南來好風東北去翩然兩無心中忽相遇
化爲一尺雪照我亭前路昔者甚可憐今來渺無處
故人多勸色留我不少住羈愁動中腸疾病增百慮
虛庭着明月皎皎如積素不見乘鸞子空懷舊煙霧



如臯道中

客路三日雨頗知袍袴單長河貫沃野薄酒動新寒
曉風吹曉雨秋風熬藿盤衰顏定可笑不必鏡中看

東萊先生詩集卷第四



東萊詩集 五之八



0 1 2 3 4 5 6 7 8 9 10



東萊先生詩集卷第五

呂本中居仁

初去白沙再望路中江南諸山慨然有懷

青山如美人濃淡各有態挽之不肯來乃似孤竹隘
念無千里風限此一衣帶夏木與藩屏不畏炎日曬
三年白沙游藉爾寬眼界脫身塵垢中一笑終不壞
別君更舉酒未了清淨債雖無絲竹娛會有詩律使
何如少陵翁亦爲杜鵑拜吾詩有餘歡此語君勿怪

赴濟陰留別一公

近別君莫嗟遠別君莫惜往來天壤間誰爲不相識
十年幾相別日月虛棄擲見君長江口已作胡眼喜
別君廣陵城妙語掃羣慝今別知幾時復念駒過一

坐成千里阻當有片言益不勸君愛身不勸君強
勸君以勇決萬事要努力愚夫之所欣智士之所戚
譬如醉而顛亦有傍震髡聲色糾纏人萬劫困封植
本自驕墮生亦以因循得實惟招侮慢豈止礙空寂
居然耳目內反務化勅敵誰能深山中弄此無孔笛
芳草變蕭艾每爲長太息如公定不然此語當謾憶
何妨膏腴地更論去荊棘君看一壺用亦有千金直
五月五日泊舟北神與關聖功唐充之李元
輔作別意殊惘然端午日行次洪澤把酒北
望已如異世事矣因念屈大夫之死正是此
日慨然有感於心輒成長韻奉寄

士特來可求和也

麥上蝴蝶飛水邊鷓鴣卧却望山陽城已若一夢過
今晨又端午把酒意亦墮風回浪蹙船聞淺沙著施
故人阻情話客子且清坐更念屈大夫是日遇奇禍
空餘後世名弟子只增些寶璐與明月皎皎不受沈
固知汨羅沉可到首陽餓還書三老此語君可和
贈唐充之兼簡益中

三年白沙看江山可當中原故人面今來千里逢故
人笑談却作江山見江山故人不相遠平生志願於
君滿唐侯獨立一代無張侯與之來集枯老松本自
歲寒外良馬不畏長途驅飢年官室仰粟廩暑路六

月懸冰壺念昔關汪不相貸視豈好爵如機械上書
索去不作難云我未了平生債後生少年延頸觀諸
公故人思一快基本未定天奪之賴有君侯數人在
龍媒已遠風馭回坐歎四海梁木摧爾來老謝又繼
往但覺眼界常塵埃長江無津出光怪迥野入夜開
風雷此語不誣君可驗請君更討防身劍

夜雨

夢短添惆悵更深轉寂寥如何今夜雨只是滴芭蕉

出門見明月

出門見明月入門思故人故人如此月一見一回新
明月相見多故人相見少問爾何因緣長似此月好

故人在何處南北東西路明月在咫尺夜夜庭前樹
明月莫虧缺故人莫離別願月如故人故人亦如月

夜夜庭前樹一作宿我庭前樹

往歲在白沙見江上往來祠神者殺猪羊鵝鴨

日夕相屬也有感於心後至濟陰因成長韻

當託白沙故人投之廟前庶幾神少知自戒乎

今日殺一羊明日殺一猪問神何所樂而必爲此歟
羊死噤無聲猪死足號呼傷哉鵝鴨閉目頸已朱
問神此何負神亦何所取吾知斯民愚非是神所許
江船一帆風江田一犁雨民或謝神勞尚使相告語
但采澗溪毛足以薦筐筥何須汚刀几而後着鼎俎

於物固無怨於袖亦無苦更令漏鳴歌時送坎坎鼓

濟陰野次

去年騎馬古城西雨浣鞍韉一尺泥今日重來轉無緒強扶衰疾遶河堤

毛彥謨容膝軒

黃金爲樓玉爲梯畫旗素錦生光輝不如一庵醉而歸倒卧側立無東西君才於用無不宜會稽竹箭梁山犀賈而不售君不疑亦自不以爲珍奇淵明妙處君得之萬古一首歸來辭一庵容膝君所知不用芥子藏須彌望風懷想三歸依眼前有睫見者誰世人紛紛不自治何異羊質蒙臯比見豺而戰忘其皮

頭燕雀莫謾肥汝不仰看鴻鵠飛伯夷去採西山薇

想渠瘦亦不勝衣不羨汝曹腰十圍一本倒卧側立無東西下云小

容膝君所知不用芥子藏須彌君才於用無不宜
醫無問之珣玕琪會稽竹箭梁山犀賈而不售君不
疑亦自不以爲珍奇淵明妙處君得之萬古一首歸
來辭望風懷想三歸依眼前有睫見者誰我生甚窮
今則衰何異羊質蒙臯比見豺而戰忘其皮恨不與
子歸同時君生於書無不窺文字皆好七長詩令我
琢句相追隨牆頭燕雀其漫肥汝不仰看鴻鵠飛伯
夷去采西山薇想渠瘦亦不勝衣不羨汝曹腰十圍

濟陰寄故人

柳絮飛時與君別南樓把酒看新月月似當年離別時柳絮隨君何處飛千書百書要相就思君不見令人瘦念君情意只如新顧我形骸已非舊朝來有信渡黃河鴈足繫書多網羅城南城北芳草多月如

此奈愁何

晁叔用得古鏡二以遺注一上人澄澈可
愛底水隱然犀樓突起又作杯渡禪師像翻
翩然衣動正在中流間也一求記於予因爲

作歌

晁郎高居卧冰雪得此懸空兩秋月已將屋角倒魑
魅更與人間洗炎熱一月團團如扇面一月菱花光
掣電憐君囊中一物無意欲分君託方便菱花入袖
卅莫識空堂夜留疎雨滴天生寶氣有期會復恐藏
去終無益君行萬里尋劍術山精喚君君莫出寒泉
百尺傍枯樹狡兔九月投霜鵲未須潘謂苦哦詩或
自蘇公識神物下有禪和不笑人須君一照蛟龍窟

別離行

城頭草木日夜黃九月北風天雨霜月色入戶侵我
床美人乃在天一方舊游可樂不可忘恨君不隨鴈
南翔恨妾魂守此空房曉風忽來吹夢長夢中與君
還故鄉黃金爲屋玉爲堂與君更笑億千場不須合
佩雙鴛鴦

李念七久不見過二絕

不隨殘暑退青蠅入眼罨塵漸可憎靜裏工夫君莫
厭夜窓重對短檠燈

羅襦襟解燭滅後喝唯喝盧人散時願君莫忘點軒

老少小先蒙國士知

往年與關止叔相別甬上止叔見勉學道甚勤且曰無爲專事文字間也及今五年矣尚未有所就因作詩見志且以自警也

老關別我時笑我勤苦甚曰吾與子然同此一味靜收功粥魚底筆墨有譏評五年念此語但見日月競雖無蛾眉斧亦有宴安鳩斯人今何往想作大樹蔭我走足欲壘始澤兩鳥噤君看齊聲謳何異衆哭臨繁紅成春條本自其天性風雨頌繫一作摧折之

不有十日盛人生亦何聊共未免此病乃知鑣頭通已勝狗

脚朕

洞山會下有僧法空具宿命時有通上座者刻苦練行空以水照之知其前身爲鰲子靖懷也

時衆中謂通爲鑣頭通云

六月初三日雨後步至城東

涼秋生郊原快雨灑庚伏曲肱訪幽睡朝夢不可續開門招此山爽氣滿崑各村蹊沒衰草古院蟠翠木東行得幽亭小徑來已熟下有十里濠暑退萬荷綠恨無沽酒錢一醉起枵腹人生要快意豈止寄幽獨若看後池蛙聲韻故不俗怡然供清歡何必絲與竹

得揚州書

書來每恨日月晚書去還憂道里長但得老親常健好不辭新歲且窮忙文章已受塵埃浣禪觀多爲疾病妨趁得殘春北歸否近筭臨穎走吾鄉道里一作道路

歸計未成作詩寄懷

萬里田園半有無十年歸夢阻江湖文章繆忝聲名
在氣體猶須藥餌扶客路因風起舟楫水田無雨卧
菰蒲青帘白酒斜陽外不與行人滿眼酤

閱舊詩卷有懷

好詩無過亦無功準擬還家贈阿宗會有江山與浦
袂且無塵土共從容大江矯矯雲間鶴老謝森森澗
底松回首百丘俱一夢暮年文采更誰從

且無一作略無

高郵道中荷花極目平生所未見

綠淨紅深水不流炎天烈日自然秋只憐野父已無
計便與行人亦暗投明月不來江北岸好山應在石

城頭何年得映潘妃步更放君王作意游

高郵遇大熱作

南風極炎暑赤日不可傍扁舟在地底淺水安得強
坐懷長河水未盡渴飲狀其憎食案蠅意欲不相讓
旱苗乾欲死蒲藕秋可望平生投筆手中有無盡藏
尔來但深藏穩着犢鼻上有如三年艾更復加百壯
黑雲翻日脚好雨終不放雷聲無事來舸舫車百兩
東街暴泥隴西街設銅像利害有不同未易相得喪
農夫責催租日夕困大杖那知清歌前把酒有餘量

題孫廣伯主簿家壁

占木輪囷老歲寒好花無力便凋殘秋風只在盆池

上但作江湖萬里看

贈孫廣伯

人皆笑君拙我獨喜君直拙則世所無直則未易識
昔者中丞公事主以一德從容進退間多士所取則
朝廷九鼎重冠冕萬夫特塵埃困大路此老難再得
至今門下士必以身許國孰知強弩末而有百鈞力
賢孫後來秀見我好顏色收功却掃中欲任門內責
空拳入善陣匹馬見勍敵不嫌不識察但恨無此獲
欲亦莫如丹欲黑莫如墨吾常持此言以辨主與賊
苟無牛羊害則有天地塞君能但拙直亦莫忘黑白
與吳迪吉諸人赴晁季一陳塘范園之游因

成十韻

春風未寂寞頻枉故人車客舍輕寒下村煙宿雨餘
曉紅留隱映新綠上扶疎妙墨懸高榜殘章得舊書
即所謂白水滿時雙鷺下蛟龍忽舒卷草木自清虛渺渺登臨地
悠悠水竹居只今那復有本自不關渠塘水空遺廟
壩即陳元龍所開今壩淙亦故墟園面有寺名麗淙有元龍廟在此壩上壩淙唐武宗時所建寺
邊有麗淙有元龍廟在此壩上壩淙唐武宗時所建寺同行喜佳士所到即吾廬政恐習池飲風流
却未如

送晁季一罷官西歸

少年閱人若郵傳漢廷公卿日千變故人一蹙便青
雲咫尺相逢不相見丈夫鬚髯俱半戟黃塵沒馬渠

未識晁侯文采老不聞兩耳壁塞日爲昏三年刺促
簿書裏更覺和氣生春溫誰能種蘭生九畹從公不
辭墮車蹇冰霜入眼蚊蚋去桃李成蹊草芽遠胷中
滄海無水旱眈底浮雲看舒卷頃來江上幾送迎聚
蚊成雷公不驚笙竽沸地不知曉公但寒窓延短檠
乃知風雨晝窈冥我亦不廢晨鷄鳴箕山之下潁水
邊脫冠便歸須壯年請公先尋買山錢我亦從今嘗
着鞭

侯羸

游士縱橫翻覆手山東諸侯望關走歷下邯鄲無使
來長城易水非燕有大梁賓客舊如雲夷門監者未
有聞謾將苦話送公子市井屠酤虛見存後來毫髮
爭得喪紛紛小兒跨跌宕不知世有公子牟一生放
迹江海上

昭君

凍雲霾空風折木烏孫公主歌黃鵠昭君請自嫁單
于當時各倚顏如玉霧鬢雲鬟胡地塵帳中誰是可
憐人左抱琵琶右揮手胡地漢官能幾春嗚呼古來
出婦嫁鄉曲何曾肯望秦雲哭

戲呈外弟趙才仲

趙郎風味春月柳可到阮公青眼邊秋水黏天劇空
闊曉霜挾月作彈娟比來好句傳初鴈一夜客愁如

少年安得瓊枝更當眼沙頭同理釣魚船

城北別江子之

但覺與君別孰知歸興長亂畦分宿雨老木掛晨一作
新霜未許綴詩瘦只知如許忙忙年風雨夜重約細
商量

訪晁季一

近人鳥雀兄弟語堆案簿書鳥鷺行是中亦自有佳
趣公但徐之渠自忙西風忽來涼月曉楓葉蘆花秋
意少勸君多飲莫多談截斷中流公更參

吳君求詩因作四韻寄之并簡小吳與甯生
文字縛人同東瀛吳君不言如坐忘知公胸中有餘
地萬頃亦在一葦航寒梢倒掛夜來雨細草已披秋
後霜寄語兩吳兼小甯莫因詩律廢相望

古劍歌

寒江九月雷聲空落日倒射千山紅江頭樹木半傾
倒衮衮不盡洪濤風風中有物如長戟電光忽來傾
霹靂雨罷晴開不復知乃是潛蛟倚長石蒼皮半卷
頗飛動澁蘚中開欲跳擲青熒野火下絕水天矯長
煙轉空壁天生神物有時出歲月飄流焉誰得銅花
欲盡秋水渾尚有千年妖血痕向來天地亦兒戲俄
頃變怪徒紛紜君不見豐城之來亦不父寶氣何爲
上牛斗

初夏即事

歌呼連牆亦任渠移門賓從又何如

是日西鄰置晴酒會客甚盛

塔仰日卧紅藥野水趁船跳白魚多病且參隨桶話
得閑時近養生書平生不盡幽居興付與長江拯
釣車

偶作

鄙夫養病苦不足諸公覓官常有餘自是閑人不更
事可隨雲鳥更深居

癸巳自南京過泗上

昔我往矣天欲霜今我來思梅已黃淮山瀑雪塵垢
面魚稻騷除熱霍腸好風肯伴客帆遠故國不辭歸

夢長塔中老人真相笑我自寂然渠自忙

泗上贈楊吉老二首

杯中蛇去無恙醉裏詩成有神相逢不及世故長年
倍覺情親

置王坦之膝上着陳長文車中何似維摩丈室蕭然
一塌清風

題寶應張氏草堂

好風殘暑不同途穩看飢蚊自掃除不謂南軒有佳
竹捲簾相對一牀書

學仙行

長松拂雲根合地雪畫霜凌不相到下有千歲老伏

老化為琥珀光自照食之便可登廣寒不但無病長
年少浮生溷濁那可言和氣乃為塵務煎坐看靈藥
置泥土五味雜置成薰羶豈不聞齊天子黃金丹成
不肯仙且貪人間樂不能從汝飛上天惜哉韋郎之
妙語一失毫釐千萬年

冬日訪朱深明博士二首

北風迎馬入裘茸來訪殘爐半日紅敗屋數間書百
篋無人知是老龜蒙

見公便是倚松老念我不忘擔板心萬里江山一尊
酒主人無古亦無今

東萊先生詩集卷第五

東萊先生詩集卷第六

呂本中居仁

初別清源姑丈仲弟過楚立作

前村後村鳩亂鳴梨花點雪柳半青斷雲忽過楚丘
縣驟雨已見龍立亭故人愁緒各南北宿酒別時同
醉醒語離情緒乃如此故園可歸公不聽

宿楚丘懷石子植顏平仲趙才仲

暮行楚丘北適與寒雨值旅舍一尺泥又乏芻秣費
故人渺天涯客子初夜至披衣附殘火煮茗當晚饋
昏昏傍晚枕悄悄入清睡向來談笑聲已若異世事
但覺舌本間尚有宿酒味鴻鵠乘秋風意在網羅外
強飯無多談此語敢失墜

發召伯埭二首

柳外鷓鴣相應鳴，屋頭新月半輪生。知公未便爲官去，且放扁舟自在行。

曉日烘窗不得眠，夾河高柳亂鳴蟬。西風種種入愁思，更有長亭十里船。

余病不能蔬食，懼有五味口爽之責，作詩自戒。君不如屈大夫，夕餐但秋菊，又不如顏平原，米盡且食粥。雖知舌本欠滋味，頗覺和氣實。其腹癡人要盈餘，椒有八百斛，錢有一百屋。鼎俎沅腥臠，杯盤眩紅綠。四方採珍異，亦未極所欲。寧知下箸處，但有一飽足。坐償性命債，百死有未贖。何如野僧飯，晚菜下脫粟。撞鐘擊鼓坐高堂，童奴啗飯來，相續竹間新筍。大如椽，樹頭老耳肥於肉，亦不見蟹躁擾，亦不見牛舂餗。石耶愛惜韭薺，虢晉侯睥睨熊蹯熟，以此相重輕於君未爲福。

南山

南山佳有餘，我病不自得。今日飲君家，把酒到曛黑。秋風浩萬頃，涼月掛江色。對此不能歡，何以消偏塞。人生少如意，百語輸一默。喜逢佳主人，略爲解羈勒。歡然有餘味，即此是溫克。陽春內空洞，隱如一敵國。世賢首陽餓，我愛鄭朝穆。却懷三年艾，未盡一醉力。青蠅閔殘暑，小雨頻敗北。漸須把蟹螯，莫計舟摧抑。

君看兒女笑終勝官事逼殘盃蓋餘瀝御名勿貸鷄肋
要
看
知
我
真
不
獨
觀
酒
德

與諸弟諸李同登塔山愚壁以事不能來因

成二絕

李家漾南江漫流幕阜山前春更愁無人肯會西來
意且作小詩盟白鷗

道人
不
來
花
滿
山
蹇
驢
出
沒
松
聲
間
待
約
江
頭
今
夜
月
與
渠
他
日
報
平
安

春日二首

春日紛紛一段奇無言桃李任春欺要須及熟蘆鰲
去莫看風吹雨打時

誰將舊日狂蜂蝶誤入春風桃李蹊咫尺風光不相
貸無因乞與上天梯

東園

暫開還落不停枝雨濕東園柳絮飛遙想釣船今夜
月暗隨潮信與春歸

即事

經旬無客事亦少多病閉門身更輕我自不能知許
事暮江斜雨送蛙聲

和李二十七食蛙聽蛙二首

膏香未即輸鮭菜煎和眞同食蛤蜊北人驚嘆不下
箸乞與韓公南食詩

莫驚朋類多驚爆曾伴中郎鼓吹來今日屬官本渠
分晚江煙雨開池臺

題秦惇秀才園亭

秦郎重太水上水邊亭
御名髣髴踈林過雨聲更喚清泉入
屏坐少留他日濯吾纓

別夜

薄酒殘燈欲別情暗螢依草不能明懸知先入他年
話一夜蛙聲連雨聲

寄題蘇州靈巖

水分西子採香徑山是吳王避暑宮可惜同來不同
賞落花飛絮曉濛濛

呈甘露印老

水滿南河月滿牀市樓燈火隔秋江無人可會庵前
事一夜北風吹破窻

壁上人欲行爲雨止戲成一絕用前韻

東風不借南舟便細雨輕寒鎖暮江更想亂山明日
路逢天風雨打船窻

江口送壁上人二絕

小雨浮江霜送秋曉山晴遠讀書樓道人不作當時
面萬里一帆隨白鷗

予夏中數讀書江漢上

今日鉢囊南去人當時雕句作新春更知自昔相逢
意定是他生骨肉親

送朱時發

眼底家鄉不自歸，癡人爭認劫前衣。直饒古廟香爐去，也要披毛戴角來。

送甯子儀

洪波奔放不停塵，萬劫茫茫寄此身。畢竟無人會休去，蒲堂枯木不能春。

唐張琯書記梁時婦人黃鼎，因侯景亂沒北齊，爲小校胡兒所虜。生二子，後附海舶歸聞鼓角得岸，乃知是會稽郡。鼎先在梁許嫁張固，及歸固適爲剡令，求與相見不可，乃遣令送之。宣城鼎在齊時作秋風曲渡海時又作。

詩三章琯書稱其詞怨自琯時已不傳

萬里秋風曲三章渡海詩絕勝漢公主略似蔡文姬。故國山河在荒城鼓角悲，何如覓張固不用憶胡兒。夜坐呈吳迪吉。

伏暑不能早，楚天頻復陰。疾雷衝雨斷，亂草接江深。舊魚可小摘，老盆餘數斟。明朝有傾倒，相待沃愁吟。與李去言諸人分題得之字。

人生行樂耳，此去復何之。酒憶徐公聖，月如京兆眉。未須誇敏捷，或恐勝肥癡。不作別離見，却憂兒輩知。訪秦氏北莊。

午日城西路，籃輿歛舊尋。稻田疎野草，徑接秋陰。

飯憶分盤玉書藏遺子金不須千里目枉費百年心
喜才仲兄弟至偶成四十字

落日下喬木好風來暮船徑思投轄飲復作對牀眠
寂寂驅愁外紛紛着酒邊一生五經笥不直一囊錢

春日

數畝幽畦滿小園兒童無事亦嘲喧水搖日影上簷
角風送花香來鼻根病去只留花作伴客來常欠酒
應門城南旱麥塵埃裏不借春江一尺渾

甲午送甯子儀歸洛

異時從公游頗恨相得晚同參長蘆禪共聽資福板
公今三年病我亦百事懶春風廣陵城笑語有未欸

嵩陽有歸路河水漸清暖豈無一言贈尉此千里遠
青松老舍抱意不在俗眼豈如山上苗共盡白日短
一身隨藥囊萬事付茗盞爐煙裊晴窓自足了遲緩
奈何孔文舉苦要坐客滿更知蘇門公遠效嵇中散
舟行儻見念此語試三反

相得一作相見
有歸一作歸

讀舊詩有感

但聞微雨響梧桐不悟高樓盡日風團扇向人仍有
意短檠於汝漸無功悞游元者形骸外恐墮淵源雲
霧中刺攪飢腸供好句爲君常占一生窮

別後寄舍弟三十韻

還家日已短況此獨行情客路三年別秋帆十日程

小船攜手上斜柳縱篙撐岸失乖龍蟹窓留素月紫
重回召伯埭虛住廣陵城破屋仍堅坐殘鷺只強鳴
江猶渺莽去草欲蔓延生水縮蛙墓闌場空霧雨橫
土風沾瘡痍民俗混蠻荆豈識排門入兼無倒屣迎
好詩思共讀薄酒念同傾枕席煩團扇膏油乏短檠
可無道里念或恐夢寃驚惟昔交朋聚相期文字盟
筆頭傳活法曾次即圓成孔劍猶宵鍊隨珠有夜明
英華仰前輩廓落到諸卿敢計千金重嘗叨一字榮
因觀劍器舞復悞擔夫爭物固藏妙理世誰能獨亨
乾坤在蒼莽日月付崢嶸凜凜曹劉上容容沈謝并
直須用欸欸未可笑平平有弟能知我它年肯過兄

記夜

殘暑薰炙人客夢不得長忽蒙千里風尉此六尺牀
高梧舞清影上懸明月光初更枕簟穩未厭塵土忙
中宵有臭蟲其大如蝓蟻排闥觸屏帳怒欲凌空翔
熟視不得名但見兩翼張本草所不載爾雅所未詳
夏蟲盛百族此物尤猖狂東窓不得睡幸無疾病妨
惜哉有知物點污此微涼人生要更事美惡無不嘗
悉除糞壤念頓悟服食方去爲千丈松凜然衝雪霜

御名勿學瓜瓞置身籬落傍

夜坐

廣陵城中聽夜雨倒牀不眠問更鼓西風萬里卷長河
通與淮山洗塵土淮南米賤魚亦好敢復摧頽歎
羈旅重簾複幕懶相負細字寒燈且如許漫如爾雅
注蟲魚更就篇章考齊古粗知俛首受寒餓未暇着
意尋豪舉床頭有酒不敢飲況復閨門畫眉嫵故人
此去今幾時亦有文字相撐拄東明縣前濟陽路每
一夢至猶能數少年不憚道里遠平生未省別離苦
只今多病鬚已白尚能呼渠醉而舞田園未還君可
恨歲月漸晚吾何取飢蟲遶壁不自聊爾獨何情促
機杼

寄唐允之二十韻

俗事日相促吾生常作難長河已萬折險路復千盤
坎壈深藏步岑嶽穩轉鞍誰知守樗散略不悞泥蟠
末學多乖謬微軀實控搏小兒成頂領烈士吐心肝
語下少文舉吳中無伯鸞直須識根柢始是極波瀾
念此欲誰語想公還自寬屢成長劍倚得洗夜蟲酸
解后終年別殷勤一笑歡已除舌本強仍斲鼻端漫
直節群公念高名四海看相期更無事所祝在加餐
晚日留殘雪春雷續淺寒欲行殊未必堅坐只長歎
不厭道里遠敢辭裘褐單却尋三語掾重對兩蒲團

剩欲洗曾次先留倒筆端何須灞陵岸回首望長安
竹西亭

十年走塵土重上竹西亭草木新容態江山舊典刑
狂風掃毒暑落月伴疎星認取揚州路荒城一抹青
邵伯路中逢 御前綱載不利花甚衆舟行
甚急不得細觀也又有小盆榴等皆精妙奇
靡之觀因成二絕

花似細薇香似蘭已宜炎暑又宜寒心知合伴靈和
柳不許行人子細看

玉檜盆榴作隊來異香相趁不相猜從今閉向深宮
裏莫學江湖自在開

飲秦少方家

秦郎家畔一甌茶何處清涼不是家客子三杯玉泉
酒主人一曲浪淘沙

孫量臣約遊乾明借秦少方韻見贈復次韻

答之

睦州香火趙州茶走遍叢林不着家今日爲公拈出
也兩橋人語是高沙

僧問睦州如何是自己州云看香火去僧問趙州則契云契茶去

春晚郊居

柳外樓高綠半遮傷心春色在天涯低迷簾幕家家
雨淡蕩園林處處花簷影已飛新社燕水痕初沒去
年沙地偏長者無車轍掃地從教草徑斜

外姉趙夫人智量

諒

作以良人沒祝髮感歎

成詩

故人前去冢纍纍爲恨爲憂未肯歸縱有青山可藏
骨却無紅淚與沾衣饒三笑汝參禪誤是四憐渠祝
髮非猶勝同儕二三子枉隨秋草閉斜暉

代贈

十年流落漫西東想見謝家林下風晉邑自思藥孺
子魯儒空望叔孫通風花已分飄藩外玉樹何情著
土中縱有春梢堪寓目却無人面與爭紅

又代贈

略無歸夢遶湖湘漫逐微陰出建章月裏寒珠一生

露鏡中衰鬢十年霜逢人莫唱相思調閨世終無却
老方想得扁舟北還路斷雲衰草更斜陽

閨世一作與世

臨川王坦夫故從谿堂先生謝無逸學北行
過廣陵見余意甚勤其行也作詩送之

王郎別我春已晚索我題詩敢辭懶讀書萬卷君所
聞只要躬行不相反聖人遺言凜可畏小事未免書
之簡衣冠瞻視有法則何獨文章要編刻譬如逆風
曳長艦竭力正在千夫挽君行念此須飽參即是谿
堂句中眼

無逸嘗有送吳君詩云問我句中眼

登淮南樓

樓上西風日脚斜樓前廣道更人家高林稍稍變黃

葉細草重重冒白花薄酒尚堪澆舌本故人何事走
一作天涯蓬籠只繫南亭下乞與寒江整釣車

題淮上亭子

亭下長淮百尺深亭前雙樹老侵尋暮雲秋鴈且南
北斷壟荒園無古今露草欲隨霜草盡歸檣時度去
檣陰秋風未滿鱸魚興更有江湖萬里心

夏夜大雨呈若谷叔并晁叔用江子之一上人
中庭電光垂四壁雨脚溜初如單車馳忽若萬馬驟
並牆不相語燈影照圭竇韻思共按樂日月不得又
叔能糠覈肥姪且藜藿瘦買田嵩穎間欲往今已後
旦夕呼尾工把酒且相就更願一土人不語居坐石

贈一上人

細褥紗幮卧軟綾豈知秋色到襄陵飢烏乍定門門
樹寶塔新晴夜夜燈晚菜聊充肉一臠殘杯才當飯
三升平生積懶成憍墮慚愧空房獨坐僧

又雨路絕賓客稀少聞后土祠瓊花盛開亦
未果一往也

卧聞更鼓濕不鳴曉窓但有摧簷聲雲橫不放山入
坐風怒欲倒江衝城東家酒熟花爛漫折簡喚客留
娉婷街頭泥潦一尺許意雖欲往無由行儒生活計
亦不惡蒲團堅坐到日落映窓香穗觸凝塵過眼文
書開病膜明朝新晴有佳處穩看小檻翻紅藥無雙

亭下一枝春玉絮霜清未寥廓閉門懶出君莫笑看
汝多愁吾獨樂故人無事儻能來爲君試舉舒州杓
同狼山印老早飯建隆遂登平山堂

塵埃障西風草木被朝日籃輿郭北門未厭來往疾
僮奴懶不進頗復費呵叱道人先我行宴坐已一室
殷勤勸客住午飯當促膝爐煙窸紙明鳥語樹葉密
却上平山堂晚景更蕭瑟澄江渺天際妙句不容乞
平生泉石念固自有遺失何能從兒曹十事九不實
茲游豈不快此老固坦率尚從文殊師一往問摩詰
舟行次靈壁二首

往來湖海一扁舟汴水多情日自流已去淮山三百

里主人無急客無憂

小市荒橋貫濁河故人雖在懶誰何只因遠地經過
少更覺新年坐卧多

己亥上元數同是季一叔用清坐不出

北風凜凜吹月高萬木夜作窮猿號卧聽車馬赴塵
土愛此一室明秋毫小爐著火晚收焰短檠照坐寒
無膏主人忘言客亦懶更煩赤脚送茗盃子雲事業
本清淨維摩方丈常蕭散出游苦畏今日閑歸坐略
盡平生歎自知衰病損剛腸只要文書遮病眼公能
却掃趣閑暇渠自低頭費牽挽明朝乘興尚能來咫
尺吾廬不嫌遠

寄李商老

黃塵車馬流金火戰殘暑西風迎潮來密雲復無雨
江淮早已甚映眼但塵土田疇雜蕪穢草樹翳洲渚
緬懷平生歡捐棄各秦楚千言偏習次到口不能吐
君非一臂舊此意復可許青蠅暗藩溷有似嚇腐鼠
頃君濟川手略爲虹蜺舉念之不能眠清坐聽鳴櫓
晚至城南

來往城南路今年又作冬荒林掛落日古寺疊疎鐘
職事日三出交游時一逢可憐河上水唯少莫山重

東萊先生詩集卷第六

東萊先生詩集卷第七

呂本中居仁

汴上作

不使西風便解維且留殘暑震餘威累累野水循河
下攝攝榆蟲撲面飛五斗漫隨王績隱一裘聊待晏
嬰歸平生事業新詩在送與江南舊釣磯

初抵曹南四首

未辨歸山計

一作卧病
初無策

今年學作官簿書妨好夢塵

土敗餘歡但有妻孥累初無肺腑寬從來畜鮭菜不

上八珍盤

父罷攝生術虛

一作空

藏種樹書病多詩輒廢秋到客

仍疎約帶何繇緩穿靴不暇徐猶勝策高足辛苦曳

長裾

併足經庭右褰裳入坐隅頻

一作時

容著帽進雅稱折

腰趨燥吻應

一作終

難濕殘杯莫強濡平生駟跛龍今

日更長途

往時汪博士勸我便歸休
細雨簷花夜長江楓葉秋
欲行殊未必高卧恐無由
感歎思亡友端居可泪流

可亦作只

言志

馮驩客傳舍彈鋏歌不已
託身孟嘗君惟有一劍耳
何事食無魚何事出無輿
先生猶有劍至我劍亦無
一來曹叡郡優游聊自娛
春風吹我衣春草生庭除
小便胞胲轉晚髮手自梳
仰面送歸鴈低頭羨游魚
幸有薄薄酒浸漬滿腹書
安時待天命吾心亦何如
長鋏莫漫彈何必憶吾廬

學道

學道如養氣氣實病自除
驗之寒暑中可見實與虛
頽然覺志滿乃是氣有餘
豈唯煖臍腹便足榮肌膚
但能嚴關鍵百歲終不枯
道苟明於心如馬得堅車
養以歲月久自然登坦途
江河失風浪草莽成膏腴
熟視八荒中何物能勝予
時來與消息吾自有卷舒
死生亦大矣汲汲吾自徐
捷行不爲速曲行不爲迂
一漚禹大海此物定有無
誰能具此眼沉望將其鬚

學有不精盡遂至玉碣硤昔人中道立爲汝指一隅
千言不知要徒自費吹噓所以季路勇不如顏氏愚
請子罷百慮一念回須臾忽然遇事入此語當不誣
和趙承之

十月九日昏夢集職事向人如東瀛看朱成碧有底
忙然箕煮豆相煎急長官抵几入門去小吏垂頭就
行立塵埃上下久可厭學問崢嶸老難入平生謬欲
師古人遇事始知吾不及正須眼底去涇渭便自覺
中無戟級丈夫蓋棺事則已破屋頽牆使誰葺要隨
歸鴈刺天飛莫待枯魚過河泣

曹州後園夜行

衣欲生稜夢不成城頭高下打三更月明如畫柳如
畫更向瑤池南岸行

風吹蒲葦叢三首

風吹蒲葦叢中有霜隨意美人天一涯行客一作子初夜至
風吹蒲葦叢秋色日向晚美人何時來行子飢未飯
行子惜日月美人輕別離風吹蒲葦叢及時當早歸

曹南試院懷向子諲兄弟兼呈張擴

大向金相玉爲表小向堅車取長道閉門不見今幾
日塵埃滿城何時好病夫坐穩百不聞讀書聒人到
夜分朝來雨過涼氣足思與張侯同叩門

試院中作二首

客夢斷復續角聲寒更長疎籬擁殘月老木犯新霜
閑繫身何恨馳驅汝自忙稍知詩有味復恐道相妨
諸生未下筆客子且安眠老覺文章退官憂簿領纏
短檠仍有味高枕自無緣但願無他苦今年如去年
擬古

西鄰有佳人開戶納明月月照衣上纓同心爲誰結
此結今幾時未解心已折隔林聞搗練起坐更嗚噎
情人在萬里我獨音問缺不聞行路難但見思婦切
年來契闊久烈士或喪節如何空床居初未見短闕
胡馬與越鳥本自無離別草搖新霜白秋送池水竭
君心有斷絕妾恨無盈歇

正月十五日試院中烹茶因閱漢碑

小爐方鼎蛙蚓鳴那知簾外東風驚亂雲初破盤鳳
影缺月半墮春江明已驅簿領出門去更澆肝肺令
愁醒大碑古字久寂寞高堂素壁空崢嶸坐看光焰
掃塵土便覺冰霰臨窻屏文章斷絕生氣在妙句直
欲無蘭亭嶧山野火燒欲盡瘞鶴半在江中陵不如
此書更奇古反覆厭飫無譏評山精地神肯愛護至
今歐虞來乞靈要令石鼓舉吉日不必細字臨黃庭
生平訪古少如意對此自足忘經營世間見女爭媚
好紙上姓名誰重輕邇來半月得堅坐一室當行千
里程南樓燈火漫明滅北里笙竽頻送迎儒生事業

了不惡故人浮沈吾嬾聽更闌更自取書讀喚起奴
僕尋短檠

試院夜坐

急雨翻燈夜不眠小床欹側似乘船平生萬事不如意
病後一身私自憐海中神山渺茫裏方外酒徒焦
悴邊本自無心覓餘地問公何苦愛逃禪

清都行

我昔謁帝白玉墀獨駕翠虬驂赤螭御風而行過日
圍遂登清都游太微廣殿上建明月旗綴以列宿懸
雙蜺帝顧而嘆憐其癡寸田不治來何遲我拜稽首
心自疑世俗逼隘臣所知點慢之故還無期後有美

人雲霧衣玉坐交映生光輝不必翠被緣珠璣祕文
玉簡手自持見我而笑揚蛾眉問我此去來何時握
手贈我藍田芝汝生甚良學則宜無自輕厭令神馳
一來人間今幾時恍如夢覺不可追骨肉腥穢顏怵
怵北風吹寒霜露微想視倒景凌空飛卻從帝居尋
玉妃爲汝更賦無言詩

試院中呈工曹惠子澤教授張彥實

十日虛房罷送迎不知新鴈已南征忍窮有味知詩
進處事無心覺累輕殘葉入簾收薄暑破窓留月漏
微明知公坐穩無它念識我階前柱杖聲

寄知止

近有書來欲見尋扁舟南下已春深濁河遠貫長淮
水峽岸遙瞻寶塔臨揚子宦游常落拓茂倫心事轉
崎嶇雲橫雪擁藍關路總是平生願學心

印疊疊

印疊疊綬若若不如相逢一餉樂谷量牛馬斗量珠
不如閉門細讀平生書居閑意氣或有餘利害毫髮
過不能以手援其軀風吹月明落我庭樹宿鳥夜驚
徐又飛去晝夜有程汝何不住前畏彈射後畏網羅
孰視鴻鵠雲霄可摩亦如人生如意少不如意多富
貴欲長保執斧不見河印疊疊如此宿鳥飛去何

曹南過五丈河隄入城訪顏岐夷仲清談久

之乃歸

春色不自惜落花如許愁晴天一望遠漕水十分流
每遶長隄去頻因好句留相隨覓季主不必貸河侯
論極文章祕居兼竹石幽和風落香燼晚日泛茶甌
壯節知無用諸儒誤見收江山亦在眼歲月忽忘憂
南郭今喪我長卿仍倦游評成長韻律勝與小蠻謳
簿領憎頻過塵埃嬾再謀何須五湖口風雨轉船頭

雪夜

政和六年

曹州城南三日雪半夜疾風吹石裂先生睡美喚不
聞不信衾幃冷如鐵病妻索火少聲韻稚子哦詩應
聚節殘書向人老可愛舊劒空在磨先缺未能去尋

白石伴未用深藏狐兔穴新正已過今幾日歲事嬾
復從人說長江略無千里夢故人動有十年別相逢
一笑又艱阻所向端坐成癡絕城中諸公不相棄時
有妙句扶衰拙頗知晴意在明日泥深不怕車輪折
便當脫帽過君家共放南窓看新月一杯凍酒君莫
辭預借炎天洗煩熱

曹南官舍書事

去歲頭已白今年眼復昏不憂窮至骨仍有病傷魂
酒薄如官冷年豐荷主恩空庭閑草木終未答乾坤

早出

早出公莫厭此心吾已
嚴風送月落曉氣挾霜回

疾病衝寒怯莫遲畏事權忽忽節物去袞袞簿書來
破壁詩猶在荒城菊半摧還家一樽酒思與故人開

寄江端本子之晃冲之叔用

往歲孟秋月我行東出關人煙眇眇一作歸路風雨轉

河灣別恨交游失心成木石頑有隨妻子嘆無望焉

烏閑曩事空回首微官真一作強顏舊語塵土送頻

辱簿書頒日月勤憂患庭闈實阻艱自忘身窘束時

得淚潺湲疾病衰猶活漂流老未還悞需文字癖虛

覺鬢毛班苦語終難好一作燕辭漫不刪絕一作知

出意表敢復見顏間二子今懷璧羣公時賜環寄書

驚恨草雕句得無慙晚照雲千疊新涼月半彎相忘

有道術那得厭塵寰聖治先三輔皇威極百蠻物能
同應瑞民自不藏茲薄技寧堪奏餘光或許攀何須
陽翟望咫尺是箕山一作相期下江海不敢服荆蠻
肥馬健目就小船趁挂子猶堪拾梅
期或許攀不須陽翟路咫尺是箕山

兩鶴行

西風引湖光上與月色亂化為兩白鶴飛來洞庭岸
洞庭無網羅兩鶴願為伴鳴聲既清好羽翼又璀璨
一鶴飛上天久厭俗眼玩一鶴不能飛摧頽自悲歎
三年望絕壁念汝腸已斷昔既薄恩情今還恨霄漢
未忍學鷦鷯裁求一技換

陵城歌曹州城幸里有陵城城家纍然即

定陶恭王丁傳祿也余往來過之傷嗟再三
因為作歌

北風吹沙秋草黃漢家故陵當路傍殘基斷壠趁風
雨狹徑小樹行牛羊當時王子朝未央飛燕姊弟承
龍光大策已定回朝陽不知外家諸舅忙後來變化
尤猖狂佞賢賊莽分行藏豈知漢運中更長濟陽舍
中方赤光終亦變化隨飛揚何獨此地令人傷人生
觀此當自顧位高金多終此路君不見五陵佳氣且
如此更復何情說丁傳

早至王寧寺即趙州受業院也

月曉未落疎星點寒林嚴車城南路先聞鍾磬音

道人迎我入共步重廊深淪瓊施淨供水味雜海沈
蒲團近宿火不受塵埃侵欲求半日息簿領勤相尋
東堂老禪師枯木尚龍吟一轉庭前栢諸方疑至今
我生晚聞道所向足崎嶇謬傳無字印嘗恐力不任
淮海罷行役吾人多滯淫於焉一枕夢可見平生心

曹南寄親舊

淨名居士默無語翰林子卿虛見尋半世泥塗催老
大中年詩律費光陰江湖每有同歸興酒角初無獨
飽心三尺枯桐取煨燼斷絃遺譜有知音

大雪不出寄陽翟寧陵

薄書終歲忙風雪一日閉門近殘火稍覺諸事勝
平生汗漫游已負麋鹿性微官不能歸但見日月競
老人去已遠我行復未定訓言實在耳無因問溫清
歸心止陽翟悲夢識新鄭大女癡無比有語多未聽
小女索乳啼不與窮屋稱想喚添丁來與汝相和應
低回坐兒曹氣血安得盛非無車馬心未忍求捷徑
顧自阻飢寒疇能免譏評諸郎何時逢想作玉樹映
文章有活法得與前古並默念智與成猶能愈吾病

與寧陵叔弟別後有懷兼寄趙子仲二首

一別又經月欲來渾未期寧知萬卷讀難療十年飢
長物新添女生涯舊有詩更傷新況味不報老親知
表弟今何在中郎亦漫游平生足艱阻今日倍遲留

誤辱瓊瑤報兼蒙札翰投南窓五更月常照別離愁
大雪不出

晶晶日欲出飀飀風自橫近階三尺雪附火一杯羹
老樹春難到深簷烏或鳴新春第三日堅坐若爲情
自曹南至陽翟追懷江上舊游呈叔弟

醉別白沙江上亭晚蟬高樹各秋聲風乘小艇鳬鷺
進雨歷疎簷環珮鳴家事不隨王事了新愁常接舊
愁生只今疲病嫌鞍馬十日同居眼暫明

自陽翟至寧陵與虛已叔諸弟別還曹未父
知止復來偶成二十八字

綠遍牆頭楊柳枝小亭春盡阻歸期頭昏目暗無情
緒不比少年離別時

試院中作

職事侵人畏作官略偷身去不能還樹移午影重簾
靜門閉春風十日閑尚有文書遮病目却無塵土犯
衰顏故人何處蓬籠底看盡江南江北山

去冬試院中嘗作詩云衣敝蟲可拾髮垢擲
不下披衣坐牆角尚有微火跨平生足拘窘
今日幸閑暇新文加點竄欲歇不能罷雖微
塵事妨頗畏俗子罵出門見諸老此語君可
畫今年復入試院職事多窘迫者簿書滿前
如赴蹈湯火也再次前韻

誰令君作官衮衮簿書下誰令君不學陷穽乃欲跨
緬懷北窓翁斯人蓋多暇田疇望家遠日月已秋罷
尚蒙諸公憐未至官長罵何時歸來圖更作一段畫

乃欲跨一
作欲凌跨

兩後數與李仲輔兄弟往來且約十七日同
過士特因成長韻

鄰鷄再三鳴不改風雨晦東裝向前塗恐與泥潦會
故人時一來共此一室內微言久已絕苦語或未遂
子生甚奇古却立有餘地舊從伯氏游則已聞令季
斯文儻未遠吾今蓋憔悴相期無何鄉獲保清淨退
收身稠人中着眼世事外山空倚巖石雪立老杉檜
往來相遇難更自少如忘旦日過城南把酒公一醉

首夏二首

生平寡嗜欲頗願得少閑盡讀未見書徧尋雲外山
往來二十年昔者盟未寒妻子見驅迫低頭言作官
朝翻朱墨案暮對藜藿盤豈無一畝宮令汝得少安
向來棲息地苔竹奉餘歡何時二三子共駕牛車還
汝實江海人悞令塵土干舊遊在彷彿欲往當不難
但去眼界窄自然心地寬

空庭下踈箔樂此樹蔭美鳥聲相續來百種皆可喜
日長少文字俗事不到耳開窓路須夜月露欣一洗
頗念閑居樂感歎投筆起吾家老清源

家姑先封
清源君愛

我入骨髓還家治場圃喚我共料理會同江海去更
欲附船尾平生跨款段不敢廢鞭筵誰云馬中龍一
日有萬里卜鄰吾所知江晁老兄弟

入一作深

東萊先生詩集卷第八

呂本中居仁

問晁伯宇疾二首

晁子卧京城歲月晚不用偷身出塵土閉戶忍疾痛
客來不與語有口吾懶動今年又請老氣力當少縱
生平厭筆墨棄去不復弄頗念白頭親甘旨湏子奉
呻吟在枉席妙語時一諷誰令稻粱謀未答泉石夢
鄙夫託末契義實憂患共天定或勝人寡固不敵衆
請公但縮手保此清淨供因書報安否兼與問群從
取驥伏鹽車更欲繫其足於物未有害罰汝則已酷
晁子江海士老去自窘束平生藹藹書豈止十年讀
隨身幾箱篋一一手自錄初無解衣贈未免操戈逐

仲也抱瑚璉幼亦好奇服西堂老弘微與子同軌躡
過門有江謝共語喧破屋棄官言已懶覆種子未孰
逢人強應接遇事多詬辱何時把鋤頭得止季路宿
商村河決

商村河決

今年河口決商村遠望飛瀉疋馬奔曲港定無蛟鱷
橫下田甘受雨泥渾衣裳蟻蝨藏針縫頭面塵沙露
爪痕猶恐因循葬魚腹故人無地與招魂

新霜行

新霜下幽蘭昔在顧盼間時過理當爾敢復致一言
物生無榮賤悉是君所見相值有相違誰能滿吾願
田園棄荒蕪官居走郵傳誤盡文字盟秣馬當百戰
一飯或未飽逢人足嫌怨窮於投林猿窘老巢幕燕
忍學少年子羽翼偷綸綌百萬買纏頭千金奉娛宴
願爲匣中玉不作秋後扇丈夫重許與正爾未爲倦
絕糧有不死酒肉虛健羨古人馬伏波吾猶識君面
將去曹南連得江旻書因歎存歿諸友遂成

長韻

西風脫殘暑我病不自聊吏舍少還往亦復長蓬蒿
欣然脫帽去念此非一朝陽翟未遽往寧陵虛見招
初無食息地未免柴水勞故人數通書尚有江與旻
窮添感節義俗耳受風騷向來相知人昔盛今寂寥
落日送汪謝荒山留老饒關侯最傑立亦以膏自燒

後生有向子更盡兒女嬌出門天奪之不令上雲霄
坐看朋友淚未減春秋衰怪我仁羸疾悞蒙風雨搖
日月費奔走文章勤琢雕會須領妻子更欲投吾曹
耆舊嗟歸隱諸公憐父要

劉文器之及顧平仲向伯恭韓東則諸人皆相約爲

一州之隱以便往還講習之益

出同赴雞黍歸但守簞瓢相將訪雲

山所至雜漁樵還當古渡口卧聽西江潮

精衛詩

西山有鳥其狀如鳥名曰精衛其名自呼精衛堙海
不堙不止問誰之報云帝之子帝子女娃往遊不還
精衛求之不敢有安海流不改汝堙不遷嗟哉精衛
志則可憐我昔讀書惟聖之求竭力從之以春及秋

老人宴居審吾之學惟時友思日就雕琢聖言甚微
吾意則近近以識微退或有進三年于曹惟罪之恐
人雖甚厭子亦不勇舒舒其雲云其水子不與歸
而日有以豕羊在牢芻秣之戀享適及之抑又誰怨
予學日遠予道日踈有愧精衛其誰與居精衛之飛
不必戾天子之不如寧有智焉惟作與否愚智之擇
小人作詩惟一勸百

寧陵弟相送至南京因成四韻寄季一子之

叔用

白髮無端巧上頭鏡中顏狀不能羞要尋楊子一塵
地未用劉公百尺樓野竹連陰護苔蘚暮雲生雨續

黃流秋風有信鱸魚在更約江晃共小舟

十一月一日步河堤上

簿書紆纏人欲出不自許老吏環我前更作附耳語
脫身上河堤頗似晝伏鼠河堤平如掌下有千歲土
夕陽歛殘照草木過寒雨遊魚著鈎餌舟子快新煮
煮魚得放飯尚嘆行役苦江湖平生心歲月可逆數
故人書斷絕吾事有去取歸來討清尊妙句還一吐

留侯

留侯下邳時豪氣或未除晚節欲輕舉效在黃石書
其書本無言一嘆三嗚呼彼公實天人識此鸛鳳雛
良田有蕪穢令子痛自鋤萬事不得已一身常晏如

袖手默無語四方瞻步趨不知隆準公果能知子無
小兒荀或輩下及崔浩徒謂能明子心此語亦已誣
不能處其知正足殺其軀所恨生已晚聖門無坦塗
學不盡其才未免風俗驅詩書在煨燼子何不回車
試問禮之本更觀心地初莊生言欲當則緣於不得已之類聖人之道
留侯蓋庶幾於此轉非曰非知之難處知爲難矣此
留侯與荀或輩所以分也使其親受業於聖人蓋未
可量故妄作此詩論其
大槩實平昔所粗曉也

送韓撫東則赴棣倅

公如玉壺冰見即離煩熱況當清秋懸更自貯霜月
中邊本無垢何處覓焚蕪盛以百鍊銅此亦不得折
初蒙一日款遽有千里別扁舟轉青齊歲事當雨雪

遠行不贏糧已悟服食訣古來饕餮徒頗謂一世傑
唾壺彼何知便爲如意缺觀其所用心舉不異鼠竊
首陽獨往人渠自飽薇蕨舉頭公一笑百慮無以絕
江源初濫觴末乃流不竭傷哉韞上鷹飽便飛掣

讀秦碑

秦人跨九州欲以傳萬世立石名山旁往往章

一作示

得意至今見遺刻字體甚雄異壯哉蒼蘚文未改回
屈勢風雨所侵蝕中有千丈氣嚴如虬龍蟠深若鐵
石利餘威到山鬼謹守致失墜漢魏能書人亦豈可
睥睨未能識藩籬何止趁姿媚初無一日雅但有二
舍避文章又奇古遷雄蓋苗裔觀其所稱一作著述肯

爲尊者諱巧言未大失末乃爲俗累嗚呼結繩前此
又誰與記君臣俱無爲垂拱天下治春秋紀日月大
易垂彖繫嬴氏厭休息動以衡石計斯翁變古文程
邈分篆隸自此更滋蔓日以趨簡易馳驅千百年漫
有紙墨費誰能罷煩文盡掃著天外此書雖見存或
以少爲貴持此槁木枝我亦無甚愧

次韻答曹州同官兼簡范寥信中

好詩有味終難捨俗事無功莫羨渠破屋屢翻深甕
酒短檠時檢舊書何年雞黍先投社是處田園可
結廬更請二公搜好句一身苛瘡要爬梳

龔彥承觀軒

愛山不能歸常恐山怪責終歲在行役感動頭已白
高秋強僮僕路過龔掾宅蒙君開南軒除我眼界窄
白波遶青嶂彷彿見顏色江上飛來峰卻立對君側
蕭蕭蒲葦叢不受塵土隔知君有奇趣笑我常偏仄
人生無窮已得一乃願百床頭貯美酒窓下著好客
請公但默然歲晚當有獲

畫馬圖

平沙遠草春未生萬馬夜起爭悲鳴秋雲欲墜一作畫
都護壘急雪暗下屯田營胡人却走畏深入漢家飛
將已雲集此時一馬直一作費萬錢隴右河湟更供給
邊塵淨盡今百年萬馬潦倒西風前天生駿骨何事

阻是處雕鞍蒙愛憐君家九幅開新帳欲見驪臺華
堂上長鞭不用羈絡遠霧縠雲羅倚惆悵高旌嫋嫋
霜露微苒苒得雨連山肥同時戰士今不歸曹霸弟
子能神奇毫端妙處君得之驚駘往來空爾爲

堤上

落花吹盡不堪憂只見河堤水漫流晚日強穿城北
市春風猶駐驛南樓妻孥轉覺爲身累歲月終難忘
汝留萬里長江一尊酒故人何處倚扁舟

將赴海陵出京沿汴覓舟候送客不至遂行
子行殊未來我馬已再秣略投故人飯苦厭從者聒
長河見舟楫尚恐塵事奪風翻蟬急噪雨湫岸欲晚

南山已在眼想望淮水闊別離古所重況在交友末
翩然欲行際所寄一短褐路長書來稀何以慰飢渴

四月二十二日出城至子我家候子之民師不
至因簡南文壯興夷行伯野季一由中諸公

京師新鄭與諸晁兄弟往還前後數詩

夜雨不嫌久凜然天欲秋客燈吹燭滅細雨落還休
未許金張並虛爲鄢杜遊江湖少歸夢知爲故人留
我髮白已短公愁安得長牆根春薺老瓶水臘梅香
侍立無天女相隨有漫郎平生湖海興今夜宿連牀
髮短各已白眼昏誰復明殘春斷花柳晚日閉柴荆
潦倒書常廢驅馳夢或驚尚於團聚樂雖老未忘情
令弟窮顏蠟書生老仲舒相招得共處何往更安居

歲月塵埃外桑麻雨露餘送行無別物圯上一編書
苦語相留極虛床會宿頻山東今出相海內不無人
婦女能尊客兒童不厭貧長途有如遇今日倍情親
本中將爲海陵之行念當復與子之作別意

殊憤憤偶得兩詩上呈井告送與壯興叔用也

斯人如玉雪可愛不可忘助以濯滄海亦復閱餘光
今茲困塵土更伴衆翼翔時來喚我語共此一榻涼
風雨下頰舌冰霜清肺腸我老漸窘束公才方頡頏
春秋有體製子蓋能文章要當纂微言不以近故妨
粲然東園花不登葵藿場

老僕倦日長羸馬困道遠東行數日間尚欲一再款

我能喻子意子亦識我嬾追懷十年遊僅得一笑筭
時能煮湯餅更復下茗盃晁郎本京邑劉子蓋楚產
江山兩秀異與子日在眼南風動歸興感慨毛髮短
相尋僅有日歲月亦未晚

鴈

鴈從何處來云自燕趙北今當何所往暖日近陽谷
寒雲墮江漢未見所棲宿朝憂稻梁少莫畏置網逐
惜哉還往頻愈覺歲月促悔不近藩籬隨群伴雞鶩
羽幹何必好志願亦易足物生有高下終恐厭摧伏
公看滄海頭萬里飛鴻鵠

赴海陵行次寶應

一作過
白田

半升濁酒試尊羹賤買魚鰕已厭烹淺水依蒲有船
過淡煙籠月更人行交遊潦倒腸先斷疾病侵陵涕
自橫比望中原一作幾千里故人誰復喚歸耕

海陵雜興八首

四海今誰託飄然未有歸先生作詩瘦稚子食言肥
未忍鶯鶯死甘隨鷁退飛故人取堅坐不爲賦無衣
相見各已老壯懷如昔然蛟龍夜改穴風雨暗移船
把酒猶堪醉逢人嬾問禪還家有餘地留我買山錢
諸老今無恙秋來數寄聲尚能無事飲猶勝不平鳴
行李虛長鉞生涯共短檠江湖日在眼恐負白鷗鳴
荒城足風雨今日更新冬草木山嵐暗人家水影重

漫看文字過時有簿書逢目極橫塘路西樓聞暮鍾
曾子不復見斯人絕可憐夢回千嶂裏氣奪萬夫前
異日文章社平生香火緣高樓更南望霜露一作倚

江天

時曾元以
新物故

萬事不如意自然添白鬚極知少餘韻何敢厭窮途
土俗尊魚婢生涯欠木奴東行見李白誰爲致區區
空山鶴夜鳴海風令人驚對月且愁思看書終眼明
斗酒不爲薄客帆那計程猶憐它夜雨曾作打窻聲
輕帆載曉月和夢到一作別揚州木落山光寺江橫北
固樓漫拋三徑隱虛有十年遊尚勝劉師命才因越
女留

往來送迎城南道中二絕

破裘重補却勝寒暗減頭圍覺帽寬數頃桑麻遶城
路每隨奴吏去迎官

海氣如煙跨市樓北風連夜舞

一作雨

梧楸平生事業

難牽強坐守寒燈聽聒因

家叔舍弟與黎介然曾子符離因用兩絕奉寄
漫約同歸久未償只今留滯各它鄉春風有信勤歸
鴈夜雨何時復對床

老覺爲官百不宜故人雖在鬢如絲遙知再踏同遊

地更想江饒曳杖時

余昔與介然德操
信民同寓符離

病中夜聞雪作時堯明有廣陵之行未歸思

爲數吾長奇父之未就它日堯明歸携詩相
過飄然有馭風凌雲之氣因以前詩答之

公方它山行我此一室病擁爐聽夜雪若與風勢競
蕭條中疑休狼籍久未定平明望屋瓦入我眼界靜
所恨子猷遠無復肯乘興想當巖壑間玉立與輝映
時來有傑句遂入風雅正寒威固深避草木自溫清
公家鶴髦翁韻與羲皇並流風及遠孫筆力如此勁
彫績或過眼惟我乃弗稱新春上河堤梅柳當歷聘
過從不厭數荒疇取微徑

次韻堯明貢院詩

忍窮不能歸強飯亦良計東風頻報春草木可次第

厭爲龍頭縮寧作龜尾曳從來翰墨場一作文即作

乃有聞見滯譬如已耕一作耨田更欲深種藝或蒙國

莽報未肯一作忍即弃置不聞太倉粟亦一作肯校豪髮

細王卿固倦遊穢濁有一作乃蟬蛻聲名動時人一作流

我實託末契泥塗倒屣齒塵埃浼一作滿衣袂要爲無

用用乃作不事事下馬一作重舊戰場午日在庭祀一作

砌向來槁木枝忽有紅綠綴來非偶然往去一作出亦

無所詣聚蚊著甌中得一作忍聽此鶴唳窓前一作前詩有

餘韻勝韻入松桂扁舟下淮南閭里思少憇熟觀昔

所歷讀與居士戲江湖要同歸不假木蘭桡一作萬

戲滄浪要同歸一作萬

海陵夜作

夜長夜長天復霜海陵城中今夜長夜長夜長冬向

晚

一作天向暖

寒堦無人看月滿

一作中

海陵城

路長

一作遇

家遠來信稀水闊山深歸夢短

一作斷

堂上書生頭已

白朔方健兒十年客想渠當此夜長時撫劍離長酒

杯窄明妃愛惜漢宮衣烏孫公主終不歸戚姬去視

鴻鵠舉更爲君王作楚舞當此夜長誰送迎此月還

一作

口


明夜長夜短公莫厭寒即重裘執酒

莫憂多憂多厭公白頭

東萊先生詩集卷第八




東萊先生詩集卷第八

文化三



東萊詩集

卷之十二



內閣文庫		
冊數	6	4
冊數	41	4

0 1 2 3 4 5 6 7 8 9 10

A 1 2 3 4 5 6 M 8 9 10 11 12 13 14 15 B 17 18 19

Kodak Gray Scale

C M Y

© Kodak 2007 TM Kodak



東萊先生詩集卷第九

呂本中居仁

秋夜行

八月九月啼寒蟬十月北風天雨霜客游無聊思故鄉書來不來空斷腸鴻飛何為滿夕陽舉頭攬取明月光置我堂上六尺牀滿酌玉杯碧淋漓浪喚取姁娥來共嘗人間歡樂壽命長不須辛苦老桂傍

臘梅

學得漢宮粧偷傳半額黃不將供俗鼻愈更覺清香

牧牛兒

牧牛兒放牛莫放澗水西澗水流急牛苦飢放牛只放青草畔牛卧得草宛亦嬾兒嬾隨牛莫著鞭幾年

淺草堂

力作無荒田雨調風順租稅了足但放牛相對眠

洞庭

嘗聞洞庭湖秋至清皎潔往來八百里長風駕明月
中有仙人居容顏若冰雪我願從之游問渠傳寶訣
脫冠着霞佩長與塵世別

細雨

細雨不成雪北風來解紛紛冥冥小江樹漠漠暮空雲
誰惜江東第今修地下文西齊千萬里遺恨不堪聞

王陽

王陽作黃金子了車馬費苦身邀聲名未免遺俗累
何如陶淵明蕭散塵世外公田二頃餘覓酒償一醉

高風久寂寞斯文若旒簪白眼看世人此意渠不會
題趙丞瑞菴茲圖

甘泉殿中芝九華不與百草同條生當時祥瑞已稠
疊菴意茲亦未來爭衡漢皇不容雙鏤翁此物乃與明
珠同爾來萬物更變化菴意茲寧甘死荒野故遣根苗
霜雪白炯若微月來清夜趙郎好事古亦無俯拾旁
觀盡圖畫畫師不辭粉繪費過時亦得千金價君不
見古來異瑞與奇祥何曾不致南宮下

即事

清陰庭中槐綠潤牆外草職事苦見妨令人惡懷抱
朋從多飄徙令我獨枯槁高牀書數秩時節豈不好

不能逐爾去但覺歸思浩人情便久習世態雖衰老
閉門了殘詩昔者跡已掃何時北窓風清寧爲君倒
寄晁以道

朝辭陘山清莫涉潁水綠往來百里間得此意已足
吾人少如願夫子更絕俗閉門觀易象未用傷局促
使我三日留共此一室獨皎如嶺頭月凜若霜後竹
欲爲斯文壽以作學者福洛陽佳少年撫事多慟哭
此其於聖學何異狗尾續寧知草玄翁萬事不掛目
深湛而雅澹亦不在反覆吾祖早聞道晚與夫子熟
相期千載外未得一世伏深山竄鼯鼯晚日度鴻鵠
誰能從公游歲月如轉燭

輜上占二首

城北城南柳絮飛街東街西鶉鴝啼海陵三月與春
別一夜雨成三尺泥

風雨屬連春事休十日九日轉城頭雖無俗物敗人
意可使澄江消客愁

次韻遜叔直閣見寄兼請堯明同和

紛紛塵土計秋豪忽送長江八月濤陶令且爲州祭
酒鄧公才可掾功曹但看秋到猶締綍即是花時合
緇袍待得公歸吾已老滿田茶蓼與誰孀

萬字同豪
字韻收

再和兼寄奉符大有叔

血氣侵凌不復豪往來欹倒似乘濤寧知嬾過松中

散亦有詩如謝法曹舊葉只堪供醬醢故人相贈有
綵袍兗州賓主同風味惡句煩公更一磨

雨後至城外

日日思歸未就歸只今行露已沾衣江村過雨蓬麻
亂野水連天鸛鶴飛塵務却嫌經意少故人新更得
書稀鹿門縱隱猶多事苦向人前說是非

龐公

卧龍雛鳳不曾閑舉世皆危子獨安應念橋公無特
操晚將情話向曹瞞

衛青

將軍相繼出天山漢主吞胡意未闌本自無心接賓

客故人猶有一任安

雜詩三首

烹葵去王畿剥棗在海角歲序忽已周月亦頻告朔
向來手中扇今此已倦捉尚嫌簿領繁不厭朋友數
塵埃向奔走文字費彫琢途人有前知子乃獨未覺
出門見大路夫子焉不學

結髮在簡編俗事方刺促往來三十年未見可棲宿
微官不能去尚恐遭逼逐歸棲則在念所望一杖足
頻蒙故人悞豈有鄰可卜出門雖無車徑自騎黃鵠
重尋置錐地青燈一盂粥

飢蚊青而化怒目虬兩鬚黃昏與我遇且復少踟躕

肌膚恣啖齧熟視不可毆中宵盛徒黨意氣若有餘
傷哉陷穿虎有時被囚拘求食至搖尾曾此蚊不如
雲龍困螻蟻此語不可誣

秋日三首

諸卿談笑賞先登我欲從之病不能閉閤日長公事
少祇一作却疑身是住庵僧

塵滿文書燈暗檠荒城相望那殘更莫言雲龍無佳
處睡正熟時聞雨聲

往來奔走一作馳騁看渠忙疾病低回却未妨喚客不須
嫌酒惡隔牆時喜送橙香

橙二首

西風吹鴈欲斜行小檻寒花却未香將謂諸公頻輟
酒枉留橙菊十分黃

不辭玉露著新行漫作人間徹骨香知道輸碁償舊
約故留殘菊一時黃

寄京師親舊

屋頭橙實如李梅庭下葵花深覆盃豆田失雨不稱
意野菊出苗虛見猜故人相望一尊酒問我此佳何
時回江山空自污敲扑筆硯況復生塵埃交情自昔
少同調人事只今多好乖欲隨明月覓公處限以白
浪搖長淮舟楫誤逢蛟鱷橫歲月苦遭霜露催側身
西望莫回首堂上書生心已灰

和成士穀鹿女泉詩

成子東游十日程馳裘顛倒帽歌傾新詩頓數神仙

事病耳忽聞京洛聲去住閑

一作同

經幾塵刹往來

一作作

還相望一牛鳴再尋六月山前路分我寒泉數勺清

春申君

少年談笑解秦兵便欲連從却未成莫謂江東可長
保莫年無意引朱英

秋日三首

罷馬厭鞭策征

一作

鴻思稻梁終年在泥土永路困

風霜

名仰

勿鞍韉愛直須矰繳防吾表亦

一作則

已甚念

爾不能忘

交游太半死吾亦老相侵古木十圍大寒泉百尺深

恨猶能切骨愁或至傷心寄語南飛鴈君無笑苦吟

獄掾酸寒極官曹冗長催真同鶴久住不學鴈輕回

婦女能相笑兒童忍見猜猶怜舊耆老時有一書來

和成士穀海安道中見寄

成侯老更癩處世一虛舟暫脫塵埃夢還尋江海秋

從來仙聖宅不數鳳麟洲有意相隨否因公更一游

送盧澹季然之官京師

車如鷄栖馬如狗勸公莫笑循牆走車如流水馬如

龍不如還家行御風以尻爲輪神爲馬世人計出車

馬下出門險阻道里遠只今誰是能行者海陵事劇

俸則薄得公相從亦不惡小吏相欺官長怒我自作
煩公笑樂庾公故是豐年王道兒更自見不足斷崖
獨立老松栢青天何處飛鴻鵠汴堤六月塵自障請
公登高更南望馬煩車怠早歸來上從夫子濠梁上
獨立一作百丈
何處一作萬里

海陵病中

一作寄劉器之丈五首

病知前路資糧少老覺平生事業非無數青山隔滄
海一作與誰同往却同歸

先生高卧了殘冬我亦年來不諱窮夜半打窻人不
會滿天風雨角聲中

客游歷歷都如夢身事悠悠略似僧只麼隨緣作官

去不知從古更誰冒

往來車馬鬧泥塗一室蕭然百事無語默二途俱不

涉

一作本自無言亦無點

不勞辛苦對文殊

久飽

一作

諳罷卧嬾呼醫剩讀文書不療飢數有故人

來問疾更煩耆舊與傳詩

次韻李叔友賀堯明登弟叔友丹陽人也本

中得其人之詳於王堯明恨未之識也堯明

擢弟叔友作詩賀之堯明令繼作既喜叔友

能不妄許可又嘉堯明進退取舍皆中乎道

也三首

柴桑無復陶元亮谷口虛傳鄭子真二子風流知有

在且留餘味及吾人

澄江雖近不容親亦是人間可喜人枯木巖前有岐路一杯濁酒自成春

二子深居筆吐虹從來氣節萬夫雄欲知聖主求賢意不爲相如詞賦工

次韻堯明見和因及李蕭遠五詩

小閣才堪置一牀病軀雖在鬢蒼浪隨身行李無長劒猶勝堆錢與窟郎

交游潦倒漫虛名悞結它生文字盟踏盡塵埃公莫厭不應因酒愛江清

故人飄散各窮途諸老交情却未疎賴有消詩在事

案時時翻讀伴更初

萬里星河指顧間此中何自著江山精金百鍊終無用才與佳人照指鐐

阮公游宦喜東平賀監從來憶四明但得從容飽麴糲不須辛苦辨肴鱠

西歸舟中懷通泰諸君

一雙一隻路旁埃乍有乍無天際星亂葉入船侵破衲疾風吹水擁枯萍山林何謝難方駕詩語曹劉可乞靈酒盃茶甌俱不厭爲公醉倒爲公醒

寄馬巨濟察院時監泰州酒得宮祠歸南京

新春欸南園積雨寒不歇起望海陵城辛未還往缺

聞公得安還未放車軌折毫端倒江海曾次湛明月
東風片帆來乃復爲此別田園到荒蕪歲事有曲折
不見南山松高卧擁霜雪鬚髯凜可畏此豈念容悅
願公考其然一向鼻頭說

寄趙十弟

十年流落各西東再見初非舊阿蒙晉邑自思藥孺
子魯儒空望叔孫通宦情潦倒三荒徑世味衰頽一
禿翁石室度籌吾豈敢且看鮮健勝龐公

叔度李明學問甚勤而求於余甚重其將必
有所成也因作兩詩寄之

兩章後來秀頭角固蘄然但語強弩末不爭駑馬先

寓言有十九油禮至三千所要在守節末言能與權
世之學者志近而趨遠忽近而升高虛詞大言行不
適實雖始就學則先言言不必信行不必果達節行
權由仁義行而不知言必信行必果守節共學行仁
義之爲先務也故修其身荒唐繆悠之說施之於事
則顛倒悖亂而卒無所正也

念我少年日結交皆老蒼曹南見顏石用上拜饒汪
顏平仲石子撝汪信民饒德操敢幸江海浸得霑藜藿腸諸郎但勉
力餘事及文章

與李宏子植同過信中飲薜荔亭下夜分乃
散別後奉懷遂成長韻

殘花無言卧風雨小亭寂寞延初暑范侯置酒呼我
來共坐階前洗塵土坐間聞有李與韓文字崢嶸各

寄古起卧逡巡失杯杓笑語瀾翻雜歌舞滿城車馬
鬧侵淫誰解牆陰看樽俎薜荔扶疎出杉葉老氣橫
空君一吐人生此會不可常昔者各在天一方簿書
相急如探湯好風吹我來君旁鶯啼燕乳各自忙明
日酒醒空斷腸

秋日呈顏夷仲

老去身已衰事過意愈嬾斯人未寂寞吾此歸亦晚
疎籬帶落葉秋色忽已滿南窓可炙背喚婦同茗盃
舊讀無新功亦復費編纂凝塵亂朱墨妙句折編簡
往者荷蓀翁實具世外眼不能與之游只有興盡返
曹南二三老友昔荷推挽平生萬卷書未盡一日欵

微詞絕端非自怪識者罕願聞片言佳處用收褊短

謝任伯夫人挽詩

幽蘭在深山無人終自芳豈伊桃李顏取媚少年腸
高氏有潛德奕世被輝光自其父祖來低首不肯昂
夫人生既賢豈止秀閨房出身事夫子和鳴更鏘鏘
笙鏞列兩序圭幣羅中堂云何去日遠遂棄陵風翔
伋也奉慈訓將見久必昌瞻彼汝南路松柏泣新霜
凄然馬鬣封千歲終不亡

贈筆工安伋

昔人三年學屠龍技成不試身已窮安生不願泚泚
封嗜好乃與屠龍同使世老瀟磨其鋒側出逆曳求

新功伋也中立無適從隨語欲用吾能供歛溪孕石
南山松四方萬里時一逢病夫乍閑百念空敗毫破
管塵埃蒙明窓淨几聊從容恨無列宿羅心曾使汝
得見文章公展卷略書吾已慵

寄共城賈秀才

萬里歸來四壁空舊游渾在默然中明年我欲江南
去何處留詩可寄公

題大名官舍

宿昔尚殘暑晚風吹欲無不知留此住更白幾莖鬚

東萊先生詩集卷第九

東萊先生詩集卷第十

呂本中居仁

秋日即事四首

瓦爐香燼欲凝塵小檻黃花更一新絡緯戒寒鳩喚

雨

一作喚婦

世間那有自由人

鬢髮蒼然雪欲垂問君何苦讀書爲旁人不會

一作悟

回頭意猶記田光盛壯時

簿書塵土亂蒙茸無復江船萬里風卧聽秋聲滿簷

溜不知牆下有梧桐

何處螳螂欲捕蟬主人初未覺鳴弦稍知東里能堪
事一任神龍闢洧淵

閏月九日

政和戊戌

蹊林渺渺下新霜留得黃花小檻香莫道窮秋少風
味一時頓有兩重陽

惡木

惡木不忍伐留我牕戶前人皆笑我拙我獨爲汝賢
共生天地間誰不願長年如何枝葉內便縱斤斧穿
人或甚於斯同被恩愛纏燕昭與漢武所享固已偏
樂極未肯休更欲求神仙孰能以此心擴爲無盡泉
大哉周文王尚結枯槁緣傷生有禁止亦具月令篇
好木雖云好不須公愛憐惡木雖云惡莫自生讎冤
歲晏霜雪穩夏深雷雨顛扶疎有震落與公常晏然

江上二首

南山稍踈闊病眼不能明月挾清霜下風隨細浪行
未蒙青鳥信虛負白鷗盟不見臺城路年年春草生
甚欲從此去作煩渠未休風期竹萬箇活業摘千頭
漢水覓二老青門尋故侯情知作寒士不解殺袁劉
寄外弟蔡明善

相見還須未白頭只今君是富春秋鶯花與夢飛騰
去甲子如川日夜流白酒可澆千卷讀青山欲喚十
年愁無因早辨歸耕計更就深公買沃洲

秋夜

鳴鳩喚雨入西樓草樹蟲聲旋作秋明月自如常夜
好晚山仍發去年愁久拋詩酒尋思去勝與兒童作

隙遊辜負禪心多少事石城看渡木蘭舟

蛇

山雲樓起風旋磨百毒乘陰出相賀中庭夜夜蛇作堆草堂病夫愁欲破時須兵子設符呪更遣狸奴旁坐卧雖非當道白帝子恐是多年老書佐蛟龍變化未可量草莽連崗足通播農夫催租正苦辛莫向寒陵作奇貨

謝新酒螯蟹

提壺滿送小槽春尖團未霜亦可人略借畢郎左右手爲公一洗庾公塵

寄諸子

南國旱愈甚西郊雨復休蠅蛆作殘暑蛙黷聞清秋草暗黃沙盡風吹白日愁祇應有相憶時倚仲宣樓

湘水

湘水一番竹下有千畝陰寧知竹上淚是妾一生心頃與知止相別於曹州西門外蓋今十四年矣聞嘗自澶淵過此感歎

昔別是茲土今游還偶然似聞嘗少憇猶自未眞傳所過有陳迹相逢多少年長塗守病馬何敢更爭先

雙廟

唐四葉孫德下衰父厭坐穩思奔馳外由驕胡內艷妾楊李氣燄相奪移太宗之業甚整齊尔曹忽來撞

堵之旁人爲之奮弟志也之甚矣渠不疑賊風忽來
吹白陂翠輿走避寧弓追倒立却視千熊羆猛將不
解河北圍睢陽失守東南危城中月餘折骨炊兩公
奮踊死不回鼎鑊在前惟恐遲蜀中消息未可期此
輩未易折筆答念公不量勢力微本自不辱國士知
大厦又非一木支何必感槩如此爲往時開元全盛
時公胡不念鱸魚歸亦不往吊湘江纍死後聲名何
足奇商山老人吾所歸

歸自成園

新春今幾時忽有簷外雨病眼久不明念此歲月頗
橋南數畝園風雨與關鎖主人默敲門荆棘生道左

還家續殘章妙句仍帖妥雖無鑪錘工亦有盤礴
歸帆渺江湖宿疾眩風火扶犁伴老農此語當自我
君看鄉閭闢則有閉戶可名御無學春蚕作蠶自纏裹
與諸舍弟游董村

來往無十里頗能妨晝眠踈籬重村水遠樹洛城煙
酒薄詩牽強身閑病接連荒田點殘雪知在甬山前
見信民舊書有感

蝸涎狼籍閣殘書彷彿黃公舊酒壚試問東山謝安
石不知能似此人無

同叔用宿子之家

老足交親薄江旻爾獨賢文章未遽絕歲月或堪憐

薄酒寧非道寒灰却會禪猶須五湖口風雨夜同船
隄上

落花吹盡不堪憂只見河隄水慢流晚日強穿城北
市春風猶駐驛南樓妻孥轉覺爲身累歲月終難望
汝留萬里長江一尊酒故人何處倚扁舟

游西池歸

偶爲池上游入郭天尚早香塵入晚霧柳色映馳道
我馬亦未疲歸路貪月好還舍了無事百念紛未掃
近店酒可沽重當爲君討

出順天門歸陽翟二首

遲明出都城夾路多柳色行人半歌哭莽不見阡陌
西池已春晚我復道里迫枯田甚渴雨久作龜兆拆
屢遭人馬飢更悟坡壠隔微官懸升斗恐負朋友責
初無秦楚遇亦有陳蔡厄沉憂能傷人今汝頭已白
淵明在柴桑意亦憚遠役豈無好事人助子了耕植
還家賦歸來頗自悔平昔向時經由地風雨晦行迹
欣然倚南窻謂此可容膝孰知劉檀輩生有五鼎食
流風未遽遠此士真有力傷哉謝太傅辛苦至折屐

新鄭路中

柳絮飛時與君別南樓把酒看新月月似當年離別
時柳絮隨君何處飛落花寂寂長安路陌上十人九
人去準擬歸鴻寄得書回頭已失秦州樹丈夫薄情

多可念爾獨何心守貧賤勸君以金屈卮贈君以長
短歌城南城北春草多明月如此奈愁何

離新鄭

荒村更柳色節物近清明去國三年恨還家一日程
故人投曉別羸馬傍山行何事逢寒食春來苦要餽
宿穎昌范氏水閣

溪流淺無聲月色初到竹主人中夜歸客子睡已熟
向來湖海興歲事方窘束云何蟋蟀歌更自傷局促
相尋覓舊約見子故未足脩然解衣卧高枕被數幅
賢哉五年別有此一室獨我須日已白子髮良未禿
尚懷平生歡歌呼聲徹屋何須豕腹脹更伴狗尾續
明朝尋故人戲語公一讀

聞南寇已平歡使之甚作詩五十韻

日月開南極山河拱上都聖朝頻決勝賊黨莫狂圖
驛道傳烽燧官軍下舳艫弄兵心已壯喋血氣猶麤
臘月杭州破驩聲歛縣屠迹雖連勁越勢欲動全吳
劒戟排空上芻糧夾路輸予方在衰杖意不保頭顱
豈謂除關傳都非驗漢符坐看前乘沒誰救左輪朱
守將仍安枕鄉豪肯棄軀百川歸巨浸一命仰洪鑪
撫事思同輩低頭失壯夫風雷蟄龍卧名字列仙臚
遇寇來淮口迎家傍海隅未隨霜雪死甘伴甲裳趨
每有妻孥問寧知道里虞荒城補泥土旱水著菰蒲

交友多流寓人煙乍有無相逢可慟哭掩淚只長吁

羽檄邀鋒

一作風

數江船取路迂艱難脫紛擾潤澤到

焦枯婁辱分金送兼容折簡呼同羣見驚鶩猛獸伏

於菟往往投僧飯時時就客廚苦留春貽蕩勤對色

數腴不有溝中斷其如屋上烏身猶訪安佚意獨離

囚拘行李催歸疾生涯與舊殊裹糧違戰地舉足值

窮途悞耿韓城僻虛隨潁水紆舊書猶暫覩破屋但

繩樞蔣詡空三徑楊雄更一區生平從學圃老復厭

爲儒愛草騎驢穩看雲借杖扶幾年洪坎廩盡室付

崎嶇觸熱醫頻喚傾囊酒漫酤素冠窮偈仄白髮鬼

耶厥側轉驪繫足往還狼跋胡衆憐東郭困自學北

山愚取別方擣屑成詩欲斷壺踈籬倒禾黍驟雨落

楸梧苦語終難好清談却未須家猶近墳墓晚或望

桑榆今日秋氛滌新秋暑氣蘇如聞舊巢覆盡伏逆

臣誅遣卒寬平賈令民內半租文章元典則刑賞舊

規摹桀惡先函首渠魁已獻俘書來問安否尚足尉

馳驅

還韓城三首

乍喜全家脫虛疑足

一作萬

馬奔乾坤德甚大盜賊爾

猶存稻隴秋仍旱溪流晚自渾素冠兼白髮愁絕更

誰論

白易一作皓首

老有幽譚看窮知俗事踈漸諳深屋病無復故人書

日月馳驅後江山疾病餘新涼有佳句端爲迷離居
作歲月一歲月

讀易初無說言詩既有功客游千里異心事一尊同
藥裏難休老經函可御窮江淮足知遇耆舊憶徐公
秋日至孟明莊

野色幽花靜有餘好山雖近不同途荒村被雨泥三
日草具留僧飯一盂斷壠入秋頻放水老農垂手怕
催租平生粗識田園興更復何門可曳裾

韓城紀事五首

老耻爲儒不學禪還家常欠買山錢成州太守憐衰
病時有書來說太玄

是以詩成州

糠豆猶慳不到盤小兒寒至高衣單雖無事業傳惇
史或有聲名託稗官

穩看飛蟲著網黏爐香欲盡不須添未嫌充項如壺
赤何處香醪似蜜甜

病來每有爲僧興老去初無涉世心它日三江五湖
口斷雲寒水有知音

老不謀身望子公少年豪氣想元龍倚松蒼下香巖
路今日書來第一封

陽翟冬夜

一作冬日書懷

便往

一作死

吾何敢長閑

一作同歸

力未能寒爐夜篝火急

雪暗潮燈喚客初無酒敲門尚有僧不嫌空四壁

一作

猶餘四壁立

相對倚枯藤

孟明田舍

未嫌衰病出無驢尚喜冬來食有魚往事高低半枕夢故人南北數行書茆茨獨倚風霜下粳稻微收鴈鷺餘欲識淵明只公是爾來吾亦愛吾廬

雪後

謾遣兒童掃雪開却穿籬落看春回溪山冷淡泥三尺故舊飄零酒一杯近買芒屨供踏雨更收藜杖與尋梅玉川老去生涯在時有鄰僧送米來

宿田舍

飢腸不貯酒凍粟自生膚旅枕三年夢荒村一事無

不愁風折木時有火添爐尚想崔夫子冬來體更作

簞瓢體崔德符却未勝居郾城

除日

我食已併日子來能隔年溪山出城路風雪探梅天納息初聞妙緒經舊有緣相陪得清坐不敢歎無氈

將遊嵩少題石淙

石淙在嵩山之東三十里下臨絕壑有流水焉奔騰縱放適與石會蛟龍之所畏避風雨之所出入駭目竒異之觀少有能過此者矣作石淙詩

南山吐雲柳絮飛北山之外煙草微南山北山日在

眼問公此去何時歸石淙山水更奇絕水怒決石山崩摧長空無聲曉色靜忽聽萬壑懸驚雷珊瑚缺折玉破碎月落倒卷從天回中流險絕不須道笑侮灩澦憐離堆平一作半生好事心突兀時於圖畫見彷彿褰衣度水公莫一作勿畏何須苦避蛟龍窟明朝更作嵩少遊五更絕頂看日出

登太室絕頂

生平仰嵩丘今日上絕頂蒼天不能高星斗闕光景風雲乍起伏雷雨半蘇醒下看飛鳥背錯亂松栢影神龍不深遁偃蹇卧半嶺舊聞飛石闢不受懸瀑梗大河東北流渺渺黃數頃五更看日出平地湧金餅誰能啜其華夜氣初未冷諸峯環而立一一皆秀整中居此丈夫衆象不得馴然萬物表獨閱百代永同來有奇士可得一笑領不用貯微言區區弔箕顓與崔德符田元邈別後奉寄

處僻猶多事陪公得暫閑直緣怕酒去不爲憶家還苦語知無策微官直強顏高城更南望林斷有青山

出遊

日日春濃病不知偶游僧寺送春歸長年誤跨將軍馬漸老空悲游子衣山路有泥知雨過村場無酒驗人稀今秋定作江東計趁得鱸魚八月肥

董村歸路馬上口占暫歸陽翟

水聲高下竹回環薄酒無功不耐寒白塔忽從林外
出青山常在馬頭看

嘲柱杖

王郎贈我桃柳杖三歲庵中伴我閑只爲嬾行常靠
壁不能隨我過嵩山

靠壁一作倚壁

木煎

斷苗取靈根斲石不到土道人掃落葉閉戶手自煮
晴煙溜窓几初夜過風雨老盆酌天醴春甕發膏乳
檐囊到城市餽我一勺許中年血氣敗今我飲此醕
色如蟹飴重味有荷心苦京城舊交游難醢亂鼎俎
誰能供此飲遠視鴻鵠舉一洗肝肺塵但囑公勿吐

有客

燥硯渴水不濡筆濁酒欠錢長

一作常

卧瓶此中定

一作故

自有佳處紙帳蒲團增眼明故人江南江北岸千

一作百

書不如一見面人生歡會不可常盡梁已送西

一作雙

飛燕

李文若季敵訪余高安留連累日臨行贈之

十年奔走風塵中學殖不進身愈窮夢斷江南不得
往坐歎歲月如驚鴻君家政當匡廬路時有僧行附
書去每念君家草堂好便欲移家就君住當時氣象
已參差今日情懷況遲暮斯文未喪欲誰託交游十
人九不樂百川東下障狂瀾伯兄巖然如斷山蒼蒼

在上久無意空使妙句留人間兩季只今名籍籍北方人士所未識未歇中原胡馬塵且喜沙頭風浪息高安相遇一長吟盛夏苦雨成淫霖顧我無能甘畎畝如君豈合在山林豫章老矣棟梁在莫厭它時斤斧尋

木芙蓉

小池南畔木芙蓉雨後霜前著意紅猶勝無言舊桃李一生開落任東風

東萊先生詩集卷第十

東萊先生詩集卷第十一

呂本中居仁

食筍

窮鄉未寂寥五月富筍茁近山新得雨此物晚亦發初看數寸出意有千尺拔長條不成鞭乃以美見伐錦綳罷駢頭玉指已不韞坐令熬藿口如受滄瀟滑連年江海病未免魚蟹罰甘津到齒頰恐此或未察居閑快一飽我已久斷殺更莫厭比鄰時時聽羹羹

白鬚

不作韓城住虛爲河朔行白鬚鑷更出如爲阿誰生宿劉固寺佛殿下即劉伶墳也

劉伶墳上土佛殿古崔嵬坐久野僧出天寒薦來

千年醉裏魄一甬死前灰未盡先生意空留數字回
懷衛道中寄京師諸友三首

客舍冷如漿客夢甘若飴初無遠行念況有徂年悲
平生好交遊太半走路歧不如亭前月所到長相隨
何時脫身去共採西山芝有兒當似公尚能傳我詩
直莫如兩王清莫如兩方孫謝豈不美久滯尚書郎
黎子老歸國只今鬚鬢蒼邵子住山雲欲出未肯忙
高子出林壑坐看天際翔

人誰不小康李趙常窘束窮閭覺溫炎老未飽餽粥
它長未遽數此事已絕俗爲人死不厭自奉一米足

河堤

平田接長河眼界起突兀今日並堤行麥壠青已出
寒行不知晚但感此節物新霜被西山久厭塵上沒
坐懷故人面於此見髮髯

寄濬州張揆

張卿留客酒如澠我欲從之病不能憶過公家更東
望斷崖高樹雪層層

田家樂

東家西家蠶上簇南村北村麥白熟小兒腰鎌日早
歸大兒去就田間宿斗酒相邀不爲薄鄰翁相對且
斟酌聖主當陽億萬年年歲歲田家樂

梅

獨自不爭春都無一點塵忍將冰雪面所至娉游人
寄崔德符

江城昔還往耆舊各能文暫別猶相憶雖忙亦見存
好詩能愈疾濁酒不勝渾它日經行地相尋夜叩門
還家

解鞍歇馬倦西游過眼文書且罷休薄酒向人殊有
味長年於世已無求常情未語溝中木俗眼能驚海
上鷗何處雲山不堪隱更誰辛苦訪菟裘

即事

晚松早韭老不厭夜興晨鳧多見踈地僻難尋野僧
飯路長時枉故人車青山出沒塵埃裏白髮栽培疾
病餘更有腐儒窮事業夜窓殘燭一編書

讀易

春溫瘡疥繁衣敝蟣蝨細頽然坐南軒讀易初有味
初看象數殊忽此爻彖異紛紛者衆說行各半途滯
大言累千百雜解記一二坐令天人分復以小大計
或強出枝葉或自起疏贅孰能言語表能使意獨至
空中本無華眼病因有翳沈思忽有得是則入精義
吾生晚聞道歲月今少憇遺經日在眼似足了一世
臨流濯垢衣尚勿惜餘棄

復往大名三首

復往真無策茲行亦漫游塵埃走劇暑風雨占新秋

便欲還家去其誰爲汝謀尚憐蘇季子虛敝黑貂裘
我老不自得每爲飢所歐漫拋青蘋筍空負白髭鬚
見賊猶堪鬪逢人莫問途寒區足秀句山澤有臞儒
地濕頻經水田荒亦未收斷雲催雨過漲水沒橋流
半世想高卧十年悲遠游藜羹不用挾尚足誑飢喉

開德道中

五更發荒村小憩草市北披衣度積水月落天正黑
豆苗半委地野父厭匍匐我馬則已飢泥土汚羈勒
翻思在家時一飯亦假貸小兒不解事笑語頗自得
一官走道路此責久未塞速行勿遲留有手須擊賊

陽翟道中

不爲傷離別其如漸老何祇應從此去轉覺白鬚多
長葛道中遇周原仲

羸馬衝寒驕不駛積雪殘冰雜泥滓長葛縣中日落
時舉頭忽見周夫子下馬相看兩驚怪各喜南歸此
身在僧房夜語久不眠更摩枵腹償詩債子行四方
尚謀食我亦年來倦行役櫪下驂騮世得知海底珊
瑚人未識長安公卿富貴客誰能日在子思側洛陽
年少未宜輕看子重陳治安策

簡叔易益謙兄弟

秋來歸興復何如李范聲名更羨渠它日買田吾有
策兩家兄弟要隣居

贈益謙兄弟

范郎走微官清固不絕俗家常四壁立腹有萬卷讀
爾來所爲文深若泉萬斛紆餘風過水宛轉蟲注木
諸弟況可人不但好眉目丹穴固出鳳藍田自宜玉
行扛九鼎重頓使一世伏聖朝急用士如子尚窮獨
乃知德在躬不必富潤屋我病拙文詞筆鈍如髮禿
時逢子兄弟未語心已足長空絕纖埃何處著鳬鷖
朝來秋氣清佇看飛鴻鵠

題蘆鴈扇

鴈下秋已晚江天風雨微寧爲聚沙立不作旁雲飛
遊西宮有感

種種不如意悠悠無復聽漫漫村路好似得片時醒
水隱城坳白山來樹抄青晚田收撥稊殘日度笭簪
興入山陰道詩如歷下亭荒原子胥廟子載想儀刑
送一書記杲公作天寧化士

田家得米輸官倉一粒不得囊中藏天寧化士去如
雨此亦未易能低昂因官乞取民始病況復妄邀檀
越散縱今不得半錢歸堂中聖僧應自知

京城圍閉之初天氣晴和軍士棄城不以爲
難也因成四韻

賊馬侵城急官軍報捷頻民心皆欲闢天意已如春
魏闕方佳氣王畿且戰塵不妨來往路經月絕行人

守城士

北風且莫雪一雪三日寒不念守城士歲晚衣裳單
衣單未爲苦隔壕聞戰鼓殺賊須長槍防城要強弩
砲來大如席城頭且撐柱豈不知愛身一作君傾心報
明主報主此其時一死吾亦宜未敢望爵賞且一作幸
令無事歸寄語守城士此言君所知

聞軍士求戰甚力作詩勉之

今春賊來時軍士怖而走今冬賊來時決拾一作射擗
兩肘憤然思出鬪不但要死守仰懷吾君仁愈覺戎
虜醜欲以占天心於焉卜長久暫勞何足道富貴要
力取行看斬賊頭金印大如斗

丁未二月上旬四首

丞相憂宗及編氓恐禍延乾坤正翻覆河洛倍腥羶
報主悲無術傷時祇自憐遙知漢杜稷別有中興年
厄運雖云極群公莫自疑民心空有望天道本無知
野帳留黃屋青城插皂旗燕雲舊耆老寧識漢官儀
羽檄從天下于今久未回如何半年內不見一人來
周室仍遭變宣王且遇災猶存九廟在咫尺得析哀
主辱臣當死時危命亦輕誰吞豫讓炭肯結仲由纓
灑血瞻行殿傷心望虜營尚留儀衛否早晚復神京

兵亂寓小巷中作

城北殺人聲徹天城南放火夜燒船江湖夢斷不得

往問君此住何因一作緣竄身窮巷米如玉翁尋溼薪媼爨粥明日開門雪到簷隔牆更聽鄰家哭

圍城中故人多避寇在鄰巷者雪晴往訪問之坐語既久意亦暫適也

雪泥春既融曉日初破霧出門尋故人來往不數步共談江南勝閉眼想去路松風被茅屋稻隴立白鷺行看賊圍解春水即可渡先當上鍾山次第入廬阜生平泉石念久受塵土污況今九死餘轉覺處事悞預懷巖壑裏所至陪杖屨可行君莫辭行李我已具

城中紀事

生平足艱窘可嘆不可言兩遭重城閉再因群盜奔今茲所值與我豈不與聞脫身係兒女恐辜明主恩彷徨不忍去敢計生理不昨者城破日賊燒東郭門中夜半天赤所憂驚至尊是時雪政作疾風飄大雲十室九經盜巨家多見焚至今馳道中但行胡馬群翠華久不返魏闕連妖氛都人向天泣欲語聲復吞我病未即死爾來春既分剥牀供晨炊兩眼煙已昏豈無好少年可與共殊勲志士或不恥有身期報君塞水須塞源伐木須伐根子莫笑短拙荆蠻生伍員

讀易

江北江南公不歸人言公嬾笑公癡閉門端坐讀周易直過新春園開時

無題

胡虜安知鼎重輕禍胎元是漢公卿襄陽耆舊唯龐
老受禪碑中無姓名

禍胎一作指蹤

懷京師

北風作霜秋已寒長江浪生船去難客愁不斷若江
水朝思暮思在長安長安外城高十丈此地豈容胡
馬傍親見去年城破時至今鐵馬黃河上小臣位下
才則拙有謀未獻空惆悵漢家宗廟有神靈但語胡
兒莫狂蕩

讀司馬公集解大玄

京城半年圖道路三月病輕舟過江來所向復未定
客房夜涼冷氣體亦粗勝月穿窻罅白風入桐葉勁
挑燈讀太玄愛此頃刻青物數極三甲此理本天命
首贊則分行故未及世應古曆漢則亡易實更三聖
哀哉楊子雲上與數子競雖云耗心力固自有捷徑
後來司馬公獨斂衆說盛錙銖判訛謬一宗蒙是正
讀玄則知易此實公所證如何少年子便欲獻譏評
我老未知學讀此知不稱掩卷坐搔首一洗肝肺淨
明朝尋故人此語殊未竟

黃池西阻風

烏雲晦日日出驟雨飄風吼三日扁舟寸步不得
行坐歎輕鷗如箭疾我行去家秋復冬故園回思春

夢中客愁茫注若江水生計渺渺隨征鴻三年京城
共憔悴一杯此地難從容長溪卷浪雪花碎遠山橫
空眉黛濃故人別我上江去亦有書來喚同住破屋
數間君有餘太倉五升吾已具嚴霜未放鷹隼擊盤
渦恐致蛟龍怒片帆欲掛任篙師君但徐行莫深懼
景德北窓

雲橫樹陰濃雨漲溪水白故人喚我出已度蒸暑厄
北窓非不佳尚苦眼界窄小樓隱牀後自與塵霧隔
更憐昭亭山相向有佳色君能具鷄黍略不厭須索
我能知子窮子亦能愛客人生要如是一舉乃諷百
我思遠引未塞交友責便當約諸公歸耕作長策
囊無一錢羸歲晚會有獲

昭亭廣教寺

故人喚我去一作出義雨值新晴草暗鼯鼠出山深
鷓鴣鳴齋厨半盂粥草具一杯羹尚肯頻來否門前春
筍生

昨日之熱一首贈趙彥強

昨日之熱未爲熱涼風頗隨團扇發今日之熱不可
言西山火炎塵障天高樓堅坐若燔炙常恐秋到無
寅緣與君相從今幾日欲度一日如長年憶昔京城
值秋雨人家邂逅得細語不愁歸舍少薪米且喜尊
前好賓主去年君自雲中歸隔巷尋君相勞苦是時

強虜

一作

在城下耳猶厭聽賊營鼓豈知喪亂到江

南同向宣城過殘暑晚來一雨天遂涼便思約君來
對牀牀前適有新酒熟君醉可舞吾能狂醉中談天
亦未妨回船吳中君勿忙

又贈

日日住疊嶂君能同此游黑雲才映日白雨忽穿樓
盜賊何時定溪山且自幽炎蒸不須厭俄頃是新秋

題涇縣水西

江東佳已厭又却

一作復

過江西急雨投涇縣窮秋渡

賞溪稻田猶少水山路已多泥珍重高僧意求詩索
自題

宿秋霜閣後方丈

秋霜閣後山屈蟠

一作盤

行人衝泥脚未乾正是水西

佳絕處不辭風雨夜深寒

水西與李彥恢相從余將取旌德趨徽州彥
恢先歸旌德相候彭元任亦自太平縣來相

送遇于三溪驛遂同過旌德道中呈二子三首

水西投宿近秋霜起聽晨鍾厭

一作促

東裝尚惜故人

輕作別亂山深處過重陽

村場路僻多無酒野菊寒深亦未花底事中原歸不
得又扶衰病過天涯

白頭嬾入少年場老追隨却味長須喜尊前聽清

話夜窓相對、爐香

休寧縣與汪致道諸公別後晚宿黟縣界魚

亭驛二首

竹密如雲不見天，好山無數簇溪田。
祗應黟縣溪山勝，盡在魚亭驛舍前。

故人相繼別休寧，山路籃輿睡復醒。
所恨溪山正佳處，不能同我到魚亭。

寄宣城故舊

宣城經歲無它事，尚喜交游不棄遺。
疊嶂樓頭納涼處，宛陵堂下探梅時。
君今尚要一囊粟，我去亦無三徑資。
歸卧雲山更深處，因書煩報故人知。

祈門道中四首

去程歸鴈兩悠悠，行到荒山儘上頭。
試問中原何處是，只言東北是宣州。

風落千山雨夜鳴，時因歸夢識宣城。
欲知溪路行多少，已過徽州第五程。

宣城人物未全衰，四士風流世不一。
一作知別後略無佳語寄道中，才有數篇詩。

詹郎逸氣今誰似，李令清言又不聞。
獨立共傳摩詰後，隱居還見伯仁孫。

桂林別珂首坐二首

故人相望馬頭風，世事波濤滉漾中。
灘水東邊兩年

住往還才有一珂公

北歸我已辨行纏父約相從却未然何處雲山堪著
子亂松回首嶺南天

荅趙祖文陳夢授

嶺海畏深入江湖成遠游猶懷不活怖少爲故人留
苦乏瓊琚報虛蒙札翰投因來問消息不必計沉浮

寄趙十一弟

親朋雖近懶追尋湖嶺歸來病至今寄語洪州趙從
事忍令無酒過冬深

東萊先生詩集卷第十一

東萊先生詩集卷第十二

陸本中居仁

浮梁道中見小松數寸者極多然皆與蓬蒿
雜出不能即長也余傷之作詩寄范四弟

青松數寸根意出千丈外如何蓬蒿底此志久未遂
朝爲牛羊踐莫受塵土翳雖云歲寒姿當此亦憔悴
今年雖小出尚與凡草類會須扶其根與作梁棟計
大厦千萬間匠石所睥睨世或未盡知

名卿

勿傷汝志

自祈門至進賢路中懷舊二絕

兩歇路踰滑山空鳥不飛却思無事日騎馬踏泥歸
汗水夾榆柳今留胡馬蹤如何進賢路只是見青松
離洪小渡西江至翠微寺紫清宮

平明渡西江，三山正崔嵬。中流欲浪作，細雨隨風回。
促櫂赴前浦，頗爲風雨催。寒沙引細路，人家山半隈。
密雲蔭脩竹，父老無莓苔。晚入翠微寺，諸峯環抱來。
其西洪崖居，百代所仰懷。何年蛟龍怒，更擊深山開。
縣瀑瀉洪井，噴噫藏風雷。客行少休息，暫此得徘徊。
城中二三老，咫尺不得陪。豈無陵風翰，邀致山中臺。
澗水清且寒，可以當餘杯。獨來不敢久，恐爲神物猜。

宿翠微寺

西山今夜雨，不爲故人留。泥滑淹行李，風聲欲送秋。
送晚秋中原且多事，吾黨敢無憂。明日經由地，江南更

幾州。

發翠微寺

古殿突兀，風有聲。粥魚欲打，鷄三鳴。披衣起坐問行
李，僕夫屢報天陰晴。昨日路長頻雨阻，今日東風得
無苦。杉松連山寒欲動，橘柚隔籬香半吐。却憶京城
無事時，人家打酒夜深歸。醉裏不知妻子罵，醒後肯
顧兒啼飢。如今流落長江上，所至盜賊猶旌旗。已憐
異縣風俗僻，況復中原消息稀。

送宋仲安往虔州

已流之水不可以復回，已往之日不可以復來。唯有
野外籬邊之黃菊，年年歲歲見花開。君如此菊不我
厭，處處相逢同酒杯。三年喪亂那可說，君頭已白我

齒缺高才抑塞久未用坐守松檜凌霜雪君今又作
章貢游我猶少忍住筠州破屋不憂遭鬼瞰端坐或
恐貽一作神一作神着求田問舍古所歎敢有遠去惟身謀
爲約嶺南三數子明年乘興欲一作東流

與仲安別後奉寄

出門送君時一步再徘徊雖云非遠別念與始謀乖
欲求連牆居故作千里來君今不我待欲跨洪溝回
我獨滯一方後會良未諧冬初風浪息蛟龍深蟄雷
其如中原盜所至尚揚埃子行莫夷猶恐致狼虎猜
胡人更遠適畏死投煙蘿皇天久助順似不及吾儕
通以智力免寧有此理哉因書寄苦語亦以謝不才
新看好天色指望妖氛開即當候歸艎取酒尋鱗鱖
欣然得一笑便足禳千災豫章百里遠可以慰客懷
須君起我病同上徐孺臺

題筠州僧房

客來無語坐禪房共賞西窓一榻涼山路雨餘新筍
出江城春晚雜花香厨煙已逐鍾聲遠樹色初隨塔
影長敢道閑居便安穩今年更欲下湖湘

離筠州

舊日閑居日無惊已倦游如今避地走不復爲山留
淮甸初經夏江西復度秋今朝小亭望東北是筠州

題園語與惇兄法語

杲公昔踏胡馬塵城中草木凍不春胡兒却立不敢問其誰從之惇上人袖手歸求雨無語如今且向江南住雲居老人費精神送向高安灘頭去

建城道中

建城南路入袁州怪石縱橫水亂流盡日夜冠在圖畫百年心跡付林丘中原未作重歸計胡馬能令此地憂浪跡江湖亦吾分運籌帷幄有留侯

行至醴陵寄故人

淺溪沙磧寒月白樹影踈我行天一角所至尚躊躇偶逢勝絕地不異蒿穎居臨流遂忘歸默坐數游魚知胡馬開江縣已兵故人亦未來一句三寄書不必謂深但當膏子且新霜隨北風慘慘度重湖相尋近五嶺御名勿厭長途

將至南嶽先寄演公禪師善公華嚴

胡馬揚塵烽燧作我行乃在天一角江西趺足過湖南本赴郴陽故人約中途群盜又蜂起所至往往爲囊橐遲回改路心自笑隱忍畏事人所薄不因此去渡湘水更欲何時到南嶽山中況有二老人萬里同來且安樂遙瞻見我應大笑白鬚黑面都如昨平生故舊幾人在不早從公老丘壑自經喪亂可過從每一思之懷抱惡請公更說因地初一解人間因慧縛

避寇南行

何處田園不是家，儘扶衰病過天涯。山村酒熟人人醉，客路春濃處處花。敢道嶺南無賊馬，側聞江左尚胡沙。囊空甌倒君休笑，亦有新詩伴齒牙。

貞女峽

欲上貞女峽，江險未敢行。豈是畏江險，愧此貞女名。時經喪亂後，世不聞堅貞。烈士久喪節，丈夫多敗盟。寧聞閨房秀，感義不偷生。窮荒禮法在，尚此留佳聲。時事有通塞，江流無濁清。欲行勿憚險，爲君先濯纓。

山水圖

君家茅屋低蓬蒿，客次頗厭蛙蚓號。何得有此山突兀，氣壓太華陵蒿高。山遠瀟湘受懸瀑，似聽跬步鳴秋濤。差牙老樹半枯死，上倚絕壁綠飛猱。我行日畏盜賊逼，敢厭瘴癘同腥臊。偶逢坐穩懶歸去，豁達眼界無纖毫。嶺南山水固多異，恨無中州清淑氣對君圖。障心恍然便如一作似太華，高高前君但對此能高眠。當有好句令君傳。

連州陽山歸路三絕

蒼黃避地出連州，遂谷深巖懶轉頭。歸路始知山水好，少留村驛當閑游。

稍離煙瘴近湘潭，疾病衰頹已不堪。兒女不知來避地，強言風物勝江南。

嶺外從來不識春，青梅年後已嘗新。深山忽有殘花發，

在知與清明待此人

陽山道中遇大風雨暴寒有感

嶺南二月春已盡百花委棄隨風吹出前山後綠陰
滿已過中原初夏時不知何氣忽乖沴

一作風

雨夜

作雷乘之鞭笞宇宙蔽日月萬象倒錯藏光輝巖傾

澗絕水府現捕搏虎豹擒蛟螭百圍老樹不須說忍
凍欲壓摧其枝崢嶸屋瓦走飛電如戰初合麾旌旗

我行避地更值此閉目但聽兒啼飢僕夫噤死者數

輩牛馬懼不存毛皮長途三日斷還往況有鳥雀凌

雲飛只今胡塵暗江路盜賊往往來餘威良民雖在

困後恐四海萬里皆瘡痍天公忍不一顧此反更震

動窮荒為此方亦是神所主我欲告群心先疑明朝

風定寒亦解收召魂魄尋歸期淵自可薦筐筥試

出苦語令神知

答朱成伯見贈四首

三年轉東南足跡不得息新霜未壓瘴已畏賊馬迫

一作逼

蒼黃度嶺去山路楓葉赤慨然念平生謬自有

欣戚交游半鬼錄在者費相憶朱卿早聞道一見如

舊識新詩入要妙如射已破的我行囊貯空所至但

四壁豈如投異縣忽枉和氏璧斯文得未喪豈不繫

人力出門仰高山此道如矢直

我適蒼梧野君來洞庭岸相與迫

一作逼

盜賊一筭未

得款欣然望眉宇於我意自兩天寒道路長歲晚日
畧短僧房肯再來晴窓自妍暖

入林恐不遠入山恐不深城市有深遠不必在山林
隋珠不自寶豈在須淵沈斷絃得遺譜千載有知音
昔在中朝時每從賢俊游酒酣握手歎預懷今日憂
兩經嶠嶠春三度江湖秋朱卿抱奇節好語忽見收
我無濟世策君有活國謀相尋不相笑夜光猶暗投
道喪師友絕寧有民不偷風波極浩渺欲濟能無舟
連州行衙水閣望溪西諸山

嶠南氣常昏終日如霧隔我來已經時初不辨山色
紛紛翳犯眼默默悸動魄今晨忽晴快如語見肝膈

蒼峯插天青對水恣意白深窺木杪靜絕數鳥遺窄

天心豈無意直欲尉北客才經盜賊擾更脫瘴癘厄
湖湘雖未定勢已初夏迫頗聞胡虜遠不復更追索
我歸當何時俗事累千百便擬衡山前今年飽新麥
憂慮則未已四海方偪仄群公獻納際或肯任此責
先當肅區夏次用及蠻貊豈容胡虜暴歲必有大獲
天雖未悔禍世豈無良策生一作主人苟未盡狐兔當
有宅

贈歐陽處士

愛君年少便知足今君雖老更一作轉無欲閉門不出
動經時保此無窮清淨福黃公弟子新僧徒共守荒

二
郊數椽屋，門前山水各有態。君但踈籬對脩竹，直如
李路耻有聞清似之推，不言祿坐看世事雲變化。
任兒曹手翻覆，上皇龍飛三十春。臨軒亦嘗思吳
人詔書屢下廣搜索，當時幾人能識真。君時聲名動
天子，高卧不起空逡巡。謾收符錄養丹火，一旦四海
生風塵。我來見君斛嶺下，識君無營真靜者。慙慙愛
我莫遽行，尚肯相從結茅舍。時當喪亂足淹留，豺狼
恣橫空山夜。它年有意過匡廬，一作廬山更許淵明入蓮社。

嶺外懷宣城舊游

中原未敢說歸期，却憶宣城近別離。疊嶂雨來如畫，
裏敬亭秋入勝花時。每憎多病苦愛風光屢

有詩今日來，意用可說歸。嶺外漳摠成絲。

余避地踰嶺，寄書且章。賊去則盡失之，
感歎有作。

賊馬蹤橫未說歸，草間梁上借餘威。布帆此去應無
恙，銀盃從來亦解飛。世事只堪開口笑，主人空有食
言肥。自慙學道工夫少，坐覺文書到眼稀。

過嶺將至江華先寄朱成伯二首

自怪忽忽來往忙，又携兒女過湖湘。敢言此地能安
穩，且道新年離瘴鄉。

嶺下微陰已自寒，早行山路覺衣單。故人見我應驚
笑，疾病衰頹怯據鞍。

端午日北還至斛嶺寄連州諸

嶺上逢端午隨家更北征隔村聞賊鬪通夕畏此行
厭病初辭瘴衝泥却勝晴猶憐昌歎酒不與故人傾

山居素飯

豆苗可瀹瓠可羹僧厨早飯蒸香粳道人得些清淨
供下箸已勝肥羊烹平生爲腹不爲目偶逢一飽心
自足晚嵇早韭舊所知五鼎百牢未爲福

寺居夜起

山深夜無人竹密風露集長空新過雨尚覺星斗溼
避地走天涯如何免拘繫朝憂盡暮恐賊報急

荒城兵火後所至復未葺寺半頽垣梟嘯鬼亦泣

感事念平生徂徠近階立

寺居即事三首

瘴癘過庾伏席幾其少瘳甘心忍殘暑指日是清秋
汴水他年別郴江此日留如何理歸夢只見嶺南州
因循過嶺表忽復到湖南氣力渾非舊情懷老不堪
無錢供痛飲因病廢清談尚有尋書僻窮搜未免貪
中原是何處敢道幾時回一夏無書讀經時畏賊來
老松猶偃蹇病鶴久摧頽莫怪論兵少吾心已灰

贈夏庭別兄弟

披沙簡金勤乃見讀書何止須百遍如君心期口不
凡況有長兵可鏖戰一寒溼甚熏病自君但讀書聲

微屋僧房夜永燈火足更肯被來同宿


墨梅

嶺南十月春漸回妍暖先到前村梅問君何處識此
妙一枝今豔隨霜開長江凜凜欲崩岸乃身好事移
牆隈初疑滲漉入瘴霧更恐寂寞埋煙煤微風不動
暗香遠淡月入戶空徘徊坐看粉黛化羶惡豈但挑
李成興臺我行萬里厭窮獨疾病未已心先灰對此
不覺三歎息恐是轉側南來異鄉久處少意緒破
壁相對無根夢古來寒士每如此一世埋沒隨蒿萊
蘼荒藏德老不耀肯與世俗相追輪囷離奇淺一作
多見用情鍾青黃大為

吮墨去顏色況







東坡詩集 十三之六

0 1 2 3 4 5 6 7 8 9 10

A 1 2 3 4 5 6 M 8 9 10 11 12 13 14 15 B 17 18 19

Kodak Gray Scale

C M Y

© Kodak 2007 TM Kodak



淡齋文集

東萊先生詩集卷第十三

呂本中居仁

全州與解子中向伯恭相會

五年流落判西東尚喜交游一再逢
但得低頭拜東野不妨下卧見元龍
中原極目山千疊往事傷心酒一鍾
如我支離久無用敢因窮約廢過從

一作費相從

初至桂州二首

連年走避方所至若郵傳未論道艱阻先問米貴賤
賊勢來未已行役我已倦解鞍憩二館敢歎此異縣
清泉上短絙一洗塵垢面瘡癩非不深美醞良可戀
胡沙久衝突賊馬亦馳驚我行不得息終歲在道路
敢言更事多尚恐與時忤低頭訪疎客何處可放步

江流下滄海日慘蛟鱷惡出門尋故人風雨已斷渡
桂林解石拜見仲古龍圖吉父學士別後得

兩詩書懷奉寄

所至艱危裏如何更別離只看山似戟已合鬢如絲
湯熨徒增病文章不療飢端居渴餘論苦語自成詩
折老父高卧嘗卿仍倦游同爲萬里走肯避數年留
賊幟江湖晚嵐煙嶺嶠秋相逢得安穩乘興莫東流
且聞二公皆欲
爲廣東之行

次韻吉父見寄新句

詞源久矣多岐路句法相傳共一家良賈深藏宜有
待大圭可實在無瑕長江渺渺看秋注孤霧悠悠伴

落霞盛欲寄書商榷此嶺南不見鴈行斜

桂州水西

隆隆而雷風乘之斷霓落日江東西江頭古寺頗岑
寂僧簷正與南山齊我來端坐已寒暑終日看山默
無語盜賊連村那敢問藜莧充腸未爲苦旱禾已旱
心所知正待前山一作
山前一犁雨

斷橋三月中作

橋斷客逾少春深花已休閉門尤省事於世轉無求
來往只諸老相期非壯游欲知身所同寓言家洲

時獨范叔器李平張
厚貺敬相過從也

贈嶺東陳秀才

風吹賀江浪如雪浮梁左右行人絕病夫坐穩懶出
行破屋只愁吹瓦裂東縣陳卿忽叩門笑語驩然相
暖熱怪我長貧走道路所至不安寧有說鄰州賊報
又緊急欲泛扁舟窮百粵如君長校亦未用獨守區
區負奇節未能俯首効兒輩肯便出門探虎穴馬羣
時致千里足烈士寧無一時傑我復何人敢言事一
世摧頽甘短拙辛君無事時一過喜聽高談健其決
瘡癘參差畏久留歲月崢嶸惜輕別

衡州逢解子中別後奉寄

我來筠水陽君亦發章貢相逢瀟湘門及此兵未動
卧聞羽書馳起已行者衆匆匆不及款尚辱苦語送

慨然念平生相從已如夢交游半生死所至多蹇絆

我衰學不入

一作及

君亦老未用孰知一世中有此九

鼎重子賤則君子閔子言必中師門未遽絕斯文實
天奉別離又幾日坐想發孤諷衡州逼南嶽湘水寒
不凍頗傳江西擾盜賊已放縱往從田蘇游此樂不
得共

范縣丞惠雙鷄

羸病不能除肉味每逢齋鉢愧餘生雙鷄未可爲公
饌留與山僧報五更

三撫幹失去毛裘

王郎隨身一駝裘偷兒遽作壑失舟春初未免霜露

追

一作通

歲晚可無遷徙憂客房夜坐薪當燭不怕近

江風裂屋馬平編戶更艱難君行莫忘民號寒

四十二弟將還賓州相過夜話

兵戈久未歇所至轉搶攘萬里逢吾弟三年走瘴鄉
春風入古寺夜雨暗浮梁尚肯留連否僧廬可坐牀

呈折仲古四首

市酒酸甜久絕沽濕薪熏眼坐僧爐尚憐諸老無機

一作幾

事不待愁人折簡呼

龍閣老翁流落久如今辛苦去朝天向來嶺海經行
地分付蠻溪著釣船

已無厚祿故人書尚有相尋長者車所至紛然兵火

裏不知從此更何如

疾病侵凌百不能只今全是住庵僧謝安肯爲蒼生
起早與吾君了中興

次韻王撫幹見惠

新春忽忽到庭除短褐經

一作輕

寒病却蘇漫以詩書

教兒子顛盤薪水倩童奴天涯每覺人情薄眼界何
知風景殊萬里相逢君莫歎好山無數簇城隅

次韻王漕見贈并寄曾吉父二首

前賢去則遠今代不無人小出已無敵深藏恐未仁

兩章知思苦一語見情親徑欲忘衰病知公筆有神
曾子住南國端居無所思逃禪不用酒投筆謾成詩

敏捷忘千慮縱橫又一奇於中亦佳處莫折肱醫

二韻折仲古見贈

未有絲毫補縣官幾年流轉但求安江湖自稱嵇康
嬾故舊空嗟范叔寒顧我初無食肉相喜公復著侍
臣冠新詩不忘東山

一作平戎

志敢作尋常禁近看

再用前韻奉和

自昔支離畏

一作怕

作官只今猶望一枝安飽知時態

病良已心喜故人盟未寒所至軍書銷日月幾回戎
馬汚衣冠公歸定有安邊策不學愚夫靜處看

夜坐有感

五更月落鷄未鳴小爐殘火猶晶熒道人強起理衰

疾不聞松聲聞雨聲跣趺坐穩百念去豈有宿夢令

神驚平生於卅萬事嬾況復今茲飽憂患中原北望

四千里三年不見南飛鴈著身天涯未爲遠所至風

沙莫深歎時寒但

一作可

赴僧房火日暖可

一作但

赴鄰

家飯嶺南無瘴便可老江頭有酒猶堪喚惜哉寧子
不自休辛苦飯牛過夜半

送密上人歸江西

輕舟君先行羸馬我繼往湖山已在望南嶽行可仰

不憂盜賊繁漸喜草木長密也負奇氣少已離塵網

飽參諸禪所至被稱賞獨留未後句未肯付吾黨

徑尋卓錫地更足以自養囊空脚頓健體冷心甚廣

喜談江西勝妙處猶如

一作如

指掌未見頻寄書悠然發

遐想

送常子正赴召二首

屬

一作昔

者居閑久今來促召頻但能消黨論便足掃

胡塵衆水同歸海殊塗必問津如何彼黠虜敢誣渾

一作世無

疾病老逾劇交親窮轉疎惟公不改舊怪我未安居
日月于戈裏江山瘴癘餘因行見李白亦莫問何如

頌送山上人游南華

二浙三衢未說歸且從嶺路訪曹溪盧公若問南來
事但道江湖盡鼓鼙

山頌送譚師直歸湖南

人事日翻覆昔同今不然於心苟有用與世自無緣
刺結官田社飽參雲蓋禪已勝高鳥盡徒泛五湖船

送能化主還法輪

嶺外三年避賊忙法輪元不下禪牀君歸却說嶺南
事瘴暑作時君自涼

送夏少曾兄弟

處處人家避賊忙數因行李問舟航江橫晚照鳬鷗
亂春到空山草木香我未有緣離嶺嶠君今決策下
湖湘定知此去添貧病不及相從氣味長

本中將爲江浙之行念當與夢賦別感嘆

傷懷因成長韻奉呈

客行已無聊況此憂慮集頽然念遠役未見勇可習
虛庭覺氣潤遠視螢火濕故人不我厭踏雨相勞揖
朝餐共飢飽夜語同坐立問我去此邦何用如此急
干戈與瘴癘未見可出入何殊知二五而不知有十
俛首謝勤意此非愚所及天涯重離別所至方業爰
感懷平生舊忍效兒女泣胡沙蔽中原道路滿荆棘
世事古則然臨分莫於邑

贈日者張直夫

因循避世不求名潦倒江湖過一生賈誼定能尋季
主子雲先已識君平獨行市肆口無語嬾踏權門身

自輕看甌生塵只堅坐世間

似一作君

寧有不平鳴

永州西亭

舊聞西亭勝獨盛湖湘間山秀水亦好千里在憑欄
今來乃不然眼境故未寬環城但濁水滿目唯荒山
如何柳司馬肯爲此解顏始知憂慮久方覺所遇安
我從避地來山水亦一作日飫觀初不厭嶺嶠沉敢復作
嫌荆蠻徘徊念昔人亦作故意看所慙二三子來不
倦躋攀開軒納微涼共享一日閑說詩到雅頌論文
參語盤快若箭破的圓於珠在盤此樂固可樂此盟
安得美天暑畏道路時危安一作多阻艱相逢得少款
莫問何時還何須待杯酒始盡平生歡

浯溪

五月行人汗如雨意緒昏昏雜塵土浯溪一見中興碑便有清風濯煩暑中興之業誠艱難敢作漢武周宣看紛然大曆上元間文恬武嬉主則孱但知追咎一祿山袖手不作如旁觀天亦未使庸夫干故生李郭在人間一時節士張許顏其誰不知唐已安道州落筆風雨寒魯公大書鎮百蠻訶吐水怪摧神姦有臣若此世所歎而不能使君心還我來轉嶺逾千壘對此凜然清肺腑想見羣小遭譏彈爾曹何心猶謾至今怒髮常衝冠

送元上舍歸采山

長囂而寂方作而息如射破的初不以力子居深山又處絕頂避囂不作二事俱屏往來臨川道里且千一見我喜如舊交然我欲屬子重於發言子請則堅之子之賢遍尋諸方不主先入唯是之從何拘何執惟昔善財我曹之師其心廣大誰能間之山高海深德則不孤不深不高培塿潢汚奚必深山惟靜之守求寂念息以閱永久

贈一上人

偶從嶺嶠轉江東得向疎山見一公所至一作時昔共游常草草爾來相遇更匆匆是耶埋骨虛無裏壁老收聲一作蒼莽中二十餘年往還事半隨秋鴈落

寒空

贈珪公杲公四首

北歸住江西塵事日窘束兩小時踵門高誼已絕俗
空房擁殘火更許相就宿不嫌寒無氈肯厭飯脫粟
杲公玉壺冰所至自清淨珪公出林鶴肯與鷄鶩競
吾窮得兩公頗覺意氣盛未能出艱危猶足起衰病
杲固昔所熟珪亦舊聞名江西一聚首遂寬南去程
掃除文字習追尋香火盟期君向此道隱若一長城
堂頭老居士我識蓋自早聲名從少年閉戶今却掃
公能爲少留尚可慰枯槁欲知主人賢但看此二老
次韻錢遜叔清江圖後二首

公但一室堅坐我方萬里生還共作十年清夢同尋
五嶺名山

作清江三兩曲勝大厦千萬間若保此中安坐不必
中原遽還

次韻錢遜叔獨鶴圖三首

長頸踈身嬾不前此寧有望更騰騫懿公愛爾非無
意要壓曹人三百軒

粉墨半銷翎翅短正如衰髮不勝簪可憐少保功名
悞寫此凌雲意不堪

眼明見此出籠鶴似我北歸辭瘴嵐

御勿一作莫

低頭

待收餐人間欣戚盡朝三

次韻錢遜叔畫圖

西風著人塵滿襟江山縱近難追尋當年寫此數幅
妙坐使几案頻登臨斷雲黯慘出古寺遠岸杳靄連
荒岑漁舟蕩漾江路晚煙雨濛籠山店陰已知落筆
筆一作下氣象古一任世間消息沈最憐霜榦倚長石不
待歲久成枯林知公此中興不淺此畫故能留意深
只今燕坐一室裏尚費從來長短吟詩成掩卷坐秋
晚一唱三歎求遺音

送一上人

我齒久已搖君髮日向白相逢不相笑共被老境迫
周旋三十年近多聞隔伊昔無事時日夕望顏色
此道要琢磨苦語費思索不能如宿心每負朋友責
別我寧陵縣隨我昭德宅所期無二三可恨已千百
交游大半死況值兵火厄舉首望八荒無乃天地窄
涼風吹秋深江湖動行客誰能於此時一作除出語見
肝膈胡塵蔽中原盜賊暗阡陌公其無遽行待我有
良策

錢遜叔諸公賦石鼓文請同作

江頭羽書相續來城中草木凍不開腐儒坐視了無
策但守寒爐吹死灰煩公送我石鼓文令我琢句要
春回簸蕩風雲走一作寫蛟犀百蟲久蟄聞驚雷錢公
自是力扛鼎持此浮游轉湖嶺漢碑秦篆已公麼泥

復鍾士敢馳騁後來頗供兒女弄神物有知當遠屏
石鼓之文公所知正是周室中興時庶幾我皇亦如
此一掃狂虜隨風一作灰飛石鼓之文尚可讀小臣願
繼車攻詩

和邢子堅韻

萬里重歸舊充翁笑談聊復與君同鴈鷯所願一枝
足臚見從來一作真五技窮短髮自梳渾欲白殘爐因
客尚能紅正須混迹師元亮未忍低頭學敬通

東萊先生詩集卷第三

東萊先生詩集卷第四

呂本中居仁

戲呈東林雲門二老

幾年湖嶺費追尋尚喜歸來聽足音禦虎已知吾有
命問禪方見子無心風塵黥慘病如昨歲月崢嶸窮
至今猶覺相逢有餘恨老盆盛酒不同斟余常以謂可與共飲者至難得也二公超然之韻可與共飲也而不得共飲焉可痛惜曉此語者許伊具一隻眼

佛日縱步相尋索歸甚苦戲成絕句

相逢不用苦相催一作直到更深月上回莫怪室空
無侍者夜窻相對有寒梅

東林珪雲門杲將如雪峯因成長韻奉送

東風極澤國君有千里行送君不能遠宿昔春水生

胡馬汚中原，旁淮多賊城。即今江南岸，盜賊猶縱橫。
頗聞閩粵靜，農民方及耕。雪峯佳主人，況欲屣履迎。
兩公與談道，正欲平其衡。但見演若頭，自然心地明。
云何未覽鏡，便欲其流清。君行可語此，勿憂兒女驚。
鄙夫牙齒缺，苦遭塵事嬰。七年在犇走，一飽費經營。
野鶴出籠飛，尚須字翅翎。今者與君別，故鄉它日情。
新詩見萬一，庶用託同盟。

贈童堯詢蔡楠謝敏行

七年避胡塵，無復少年事。適從嶺外歸，眼病不識字。
尚幸戎馬間，得見此數士。蔡童南城傑，所養蓋有自。
兩謝名家子，學已前作似。相逢眼暫明，已足慰遲暮。
如何捨我去，使一作今我起千慮。江深月微，一作此月驚猶餘。
大謝留與我，相近住風霜。眇墟落，泥土暗道路。
得無經一作驚此別，各復走它處。期君則甚遠，苦一作告語不厭屢。
微言恐遂絕，其誰與一作知調護。要當發憤求不欲，一作未可僥倖遇聖門。極坦平渠，自有回互。
河清儻有期，夫死或可俟。

和范仲熊舜元游橘園見梅

橘林經

一作雨

未全衰，歸路人家已見梅。風物粗知

一作如

江左勝，漳煙新離嶺南來。筆頭有眼方知妙，句裏忘言始絕埃。但得一寒無事過，與公還往勝銜盃。

答錢遜叔

一本有訪戴圖三字

北風吹霜夜如

一作飛

雪江城草木凍欲

一作未

折病夫

袖手無所爲一坐臨川已三月忽蒙妙句起衰憊頓

覺和氣生毛髮公能忘機我亦倦不待曼殊見摩詰

畫圖是非久未解況保長年不摩滅請公置畫莫多

求要與時人除愛渴

與錢遜叔飲酒分韻得鳥字

客游等浮

一作如薄

萍歲事如過鳥逢公得一笑不厭古

寺悄雨聲喧客耳燭影吹半裊宿醒未及解更覺惡

韻擾時方足艱虞身未識要眇如何一杯酒便出萬

物事

一作表別公願

一言使

一作今

我意易了

贈別范一哥

相送不嫌

一作遠

詰朝當語離文詞知子進道路覺吾衰

力疾終無補徐行敢厭遲臨分更回首苦語漫成詩

送謙上人回建州三首

子來不憚千里遠我病可無終歲憂相見忽忽又相

別主人無恨

一作厭

客無求

平生苦節胡元仲老大多才劉致中爲我殷勤問消

息十年堅坐想高風

遙山渡口晚猶寒道路奔波未許閑頗恨獨來不同

賞竹興穿雨上疎山

與范益謙炳文叔儀步月

一作云與諸范步月

歲月忽已過羈窮非獨今稻塍分白水月影上清陰

畎畝平生事江湖它日心相過無百步猶覺費追尋

陸庭元紹意齋

聖人母意物我同大賢庶幾其屢空今君胡爲用此
意乃欲酬酢萬化參天工客來無窮君不厭所施不
同皆有驗風寒燥濕互相伐一理驅除無頓漸衡門
端一作宴坐一事無衆皆劫劫君有餘見賢不避忘其
軀肯與俗子爭錙銖知君此意久已絕爲爾病生吾
有說侍儲百藥待百病任爾紛紛強分別君但守此
心如鐵徧與衆生除衆熱是則名爲無意詎剩放南
山一作憲著秋月

病中口占示益謙四弟

病來全少靜工夫藥裏關心計已迂縱使君來亦無
語更無餘法待文殊

竹夫人

與君宿昔尚同床正坐西風一夜涼便學短檠牆角
棄不如團扇篋中藏人情易變乃如此世事多虛只
自傷却笑班姬與陳后一生辛苦望專房

郊居

紛紛俗駕不容攀尚喜郊居絕往還野寺並冬終日
雨客房無事一秋閑平生談說古猶在病起彫蹠鬢
已班始悟莊周太多事處夫才與不才間

送楊蒙秀才往樂平

我有閩粵役君成江浙行窮途一回首歲晚倍傷情
佳氣占行在妖氛是賊營如何抱奇策不一請長纓

寄題暨尚卿雙蓮亭

異畝同穎久未出雙觔共抵復何物今君何以得此
花和氣所致無它術雙蓮共蒂中連理相映同心出
秋水秋水池塘曉自涼雙蓮中含風露香飛燕姊妹
第一作不相妬並騁逸豔來昭陽自然容質見高韻不
必粉黛呈新粧君家孝友聞近一作郡縣故使奇祥眼
中見一洗東南戰鬪塵小人知之亦革面我來崎嶇
山嶺間忽聞雙蓮能解顏請君更畫作圖看無使惡
木譏雕殘

簡范信中鈐轄三首

交游契分如君少湖嶺溪山似此稀夾路梅花三十
里故人雖病莫先歸

海角相逢又一奇更憐朋舊得追隨滿堂舉酒話疇
昔疑是中原無事時

它日曹南十日雪訪君尋酒不能回梅花此日懷安
路更有清詩入坐來

次韻李仲輔簽判

曉晴破雨却寒天海上風光絕可憐便欲陪公了春
事不須乘醉始逃禪

西施舌

海上凡魚不識名百千生性一作命一杯羹無端更號
西施舌重與兒曹起妄情

和秦楚材直閣韻

胡馬南來議擊毬忽聞羗虜斬揚酋

虜中欲謀舉事則先爲擊毬之

會漢宣帝時羗斬首惡楊王苗非二人苗降服

一年春事妖氛退萬國歡

聲佳氣浮臺閣如君須強起林泉容我且歸休漢家
基業無窮盡早晚留侯與運籌

和展鉢詩

紛紛未了向來因同在浮漚寓此身顧我久拚菴外
事知公曾是箇中人齋盂已馱五鼎食詩卷初無一
點塵今代王孫能樂此中興祥瑞不一作不虞

鼓山

危欄不知高下瞰萬里路滄海近咫尺大舶不敢度
風雲遞舒卷川原更回互如何此道場乃倚絕壁住
得非化人居無乃仙聖寓斷崖石倒懸絕壑水暗聚
我行天一涯勝處時一遇衰病一作類九死餘已乏濟
勝具登臨茲一作遊欲忘返尚足慰遲暮山林與膏壤
未到已心悟

王傳巖起樂齋

人生各有樂所樂故不同吹竽與擊缶同在可樂中
孰能識至樂不計窮與通顏子在陋巷肯憂家屢空
朝從聖師游暮歸無近功忽然若有合此樂固無窮

當時二三子因之開蔽蒙君生百世下久已聞其風
端居有遐想客至聊從容四壁倚蓬蒿萬卷蟠心寶
回視世所求失道迷西東此樂既不遠欲往吾其從

寄范四弟十弟

一無十弟二字

俗事紛紛如亂麻又扶衰病轉天涯文章老矣思吾
弟頭角嶄然勝外家異味幾回占食指遠書終夕望
燈花何時更佳城南寺共聽春池兩部蛙

春日紀事寄內外諸弟三首

水生溪漲欲容舸疾病因循厭作勞莫道深居便無
事午窗苦癢費爬搔

自聞賊報離揚州準擬春來泰出游所恨溪山最佳
處不容老子便歸休

長閑漸化讀書癖遠道聊因避地行安得薄田了饘
粥便相依倚過平生

寄諸弟

九年在奔走一飽費經營此日窮居意它鄉獨往情
相憂只有病所至但論兵尚喜吾諸弟形模遠勝兄

游鳳池

遠近諸山翠作堆鳳池北望更崔嵬青松夾路攬天
去白鳥翻雲旁海來喜有故人同出郭屬因衰病阻
銜盃猶憐不赴對床約獨上籃輿日暮回

題孫子紹所藏王摩詰渡水羅漢

問渠囊裏欲何往彷徨徙倚滄波上至人入水固不
濡何以有此恐怖狀我知摩詰意未真欲以筆端調
世人此水此渡俱非實摩詰亦未嘗下筆孫郎寶藏
今幾年往來周旋兵火間世人險阻更百難彼渡水
者安如山請君但作如此觀莫更思惟尋筆端

送筍與何晉之

年來念念欲深藏頗覺看書氣味長莫怪囊空無一
物猶能分筍送何郎

次韻李伯紀園亭

昔者翺翔雨露邊已將勲業畫凌煙便尋松菊同元
亮不訪丹砂學稚川可但海山勝綠野頗知風物似
平泉小園只在虛窓外佳處常當几杖前

本無俗事可裝懷藥圃花欄應手栽乘興聊陪野僧
坐賞心時許故人來頓令此地成三絕不爲它鄉賦
七哀鍾鼎山林兩無礙豫章須是棟梁材

送林之奇少穎秀才往行朝

我爲福唐游破屋占城市城中幾萬戶所識一林子
蕭然衆木中見此真杞梓未爲棟梁具且映風日美
子之於爲學其志蓋未已上欲窮經書下考百代史
發而爲文詞一一當俊偉夫豈效鄙夫念彼不念此
今來赴行朝學已優則仕易通決有命所願求諸已
聖賢有明訓不在拾青紫丈夫出事君邪正從此始

鄭昂用岑參太白胡僧歌韻作楞伽室老人
歌寄果老

楞伽室中絕皂白去天何止三百尺只今更佳最高
峯齋無木魚粥無鍾已將虎兇等蠅蟻更許蛙蚓同
蛟龍聞道說禪通一線爲爾不識楞伽面一生強項
吾所知氣壓霜皮四十圍世人未辯此真僞敢向楞
伽論是非諸公固是舊所適鄭驊從之新有得欲將
此意向楞伽但道鵠鳥同一色

何止一作未到

贈王周士諸公

空房夜氣清落月傍簷明念我平生友相望隔荒城
未成書破窻猶短檠君亦不奈得

一作閑默坐數

殘更共結香火社同尋文字盟王子潮州來一笑冠
歌傾午飯展僧鉢村醪傾客鉗相逢但談道絕口不
論兵未免俗眼笑屢遭時輩輕人生各有趣小大俱
有程譬彼澗底松難伴池中萍雲鵬與斥鷃已矣兩
忘情一洗瘴海耳此言君可聽

殘更一作長更

贈范信中

異時攜客醉公家蠟燭堆盤酒過花萬里溪山隔春
事十年風景困胡沙鄭莊好客渾如昨何遜能詩老
更佳但得尊前添一笑莫

一作勿

言漂泊在天涯

會稽石道叟教授南劍兵火搶攘之餘興治
郡學尺椽片瓦皆其所自經營也未暮月而

學成遠近賴之又祠前輩賢者以風勵多士
使游其間者望之而心化由是而入堯舜之
道不難也古之教者蓋多術矣五帝憲三王
有乞言憲賢於乞言也道叟知之矣呂本中
爲作詩叙本末云

聖遠道則微世久學欲絕區區續微言未易勝邪說
石侯東南秀睹此心欲折分教南劍州意在補亡缺
歎令兵火後復見俎豆設廟貌甚尊嚴上下有區別
先生默無語風化動閩粵斯文自明白如仰見日月
坐令穿鑿悞不待湯沃雪不知旁祠誰今代古豪傑
孰能_之齊共此歲寒節入門日在望未返意已竭

賢來正心術不在費頰舌乃知薰陶功自與聞見別
參魯回不愚亦豈有優劣此理儻可求萬古同一轍
前輩謂陳
了翁也

寄計議弟張彥實錢元成夏庭列

遠書來稍稀叔也經月病微官自拘束歸興復未定
誰能相勞苦頗亦奉朝請安身子有道可保在不競
寧聞鄭子真肯待當世聘張錢平生歡未貴渠有命
舊交餘此人豈減昔日盛夏郎來幾時問學當轉勝
高風隕寒梧想助筆鋒勁同歸定何日不必有三徑
相從說平生保此一室靜

寄內家

弟并示仲輔諸公

汴河音書絕不聞每逢時序歎離群一秋多病常嫌
客短日無聊只閉門淡學未容窺易象舊書嬾一作聊
復誦玄文莫言耆舊彫零盡海內交游尚數君

簡范信中

詩人例窮君不然畫堂繡戶羅嬋娟當時乘醉出三
峽至今妙句留西川底事新來多退縮梅花滿眼看
未熟便期載酒約來冬似要惡詩相抵觸曉來寒凜
似中原君忍閉門清晝眠我病猶能相追逐知君心
期終不俗但攜二妙喚諸公一醉落花吾亦足

東坡先生詩集卷第十四

東坡先生詩集卷第十五

呂本中居仁

再簡范信中兼呈張仲宗

昨日之游樂不樂主人愛客亦一作客

不惡梅花遠近

遍川谷雨練一作練

風揉

未全落明日之游復如何城

南城北梅更多對酒我不飲把琰君當歌酒角雖動
主人費且幸吾黨頻相過梅花縱落君莫歎與君同
住海南岸花開花落都幾時君醉我醒人得知相逢
一笑俱有詩如何不飲令君嗤

寄晁恭道鄭德成二漕

二年住閩中不識建溪茶處處得殘杯顧未慙齒牙
飢腸擁滯氣病眼增昏花故人持節來憐我病有加

會當餉絕品不但分新芽蒼壁月墮曉寶勝金披沙
一洗肝肺淨兀坐如還家陰雨久不解天氣復未佳
特詩寄兩公請爲交舊誇便續北苑譜即日定等差
連得夏三十一爰兄弟范十五仲容趙十七
穎達書相與甚勤作詩寄之

閑居病亦侵世務每絕念猶憐二三子從我久未厭
書來不改昨意苦辭亦贍問我來何時期我早會面
我行但謀食欲去復未便要當相就居同止山水縣
讀我所傳書亦足滿素願開卷忽有得如飲醇酒醺
吾聞古志士學也蓋有漸欲升夫子堂不摘屈宋豔
倒籬望青天豈必在窺覘亡時儻從容此語子可驗

送錢子虛撫幹往洪州赴新任二首

君不求時用居然如病夫經過閱歲月相伴走江湖
白玉終無玷寒松保不枯同官多勝士總爲致區區
老矣吾無用歸歟子未宜端能出奇策略爲濟斯時
悶有書遮眼閑須笏拄頤西山有爽氣當報故人知

題晃恭道善境界圖

疇昔相從三十年如今休去不逃禪知君參見法輪
老始悟蒼蒼便是天

境界本來無善惡人間何處有新圖欲知箇裏真消
息臘月寒松永不枯

簡乾元珪老

問訊乾元老江頭幾日回還應艤船待不作御風來
漫有經旬別頻思一笑開庭前荔子孰尚要著詩催

贈楊紹祖

城東往還者相近得楊卿處世如無事爲官不近名
匣藏防身劒案有讀書檠此外唯尊酒時時喚客傾

謝宇文漳州送茶

暑氣侵人病逾劇虛堂坐調出入息漳州太守送茶
來王圭小鳳俱無敵太守憐我病無語故遣此茶相
勞苦千金一餅君未許百金一盞如潑乳其它鬪芽
未足數下視紛紛等塵土病夫未飲病先愈坐覺爽
氣生肺腑城中車馬鬧如雨更有樂善如君否

夏日

暑雨遂經月客來因稍疎閉門觀易象反復看何如
妙處元非畫微言不在書故山初未遠舉首是吾廬
過劉忠顯公鄉縣作

疾風知勁草世亂識忠臣自古有此語今代豈無人
劉公生東南節義邁等倫時危出一死以捍胡馬塵
遂令天驕子稍知吾道尊至今生氣在凜凜凌層雲
我知崇安野瞻望彼高墳流澤旣未遠有子賢而文
會當廣德業早爲建殊勲此意苟不泯楚人生伍員

夏日深居二首

忽忽車馬失言還因病深居未得閑更爲故人留一

夏稍移行李過東山

故人多住城東寺還許相過結淨緣海寇求降荔枝
孰是中風月可忘年

乾元副寺欲還雲門

子有四方志雲門尋舊游溪山往時夢江海向來秋
物態隨高下生涯任去留閑將問庵主如此是禪不
慶堯侍者以詩相贈偶成絕句謝之

滿城車馬雜塵埃所至如雲撥不開只有西禪堯侍
者肯衝劇暑送詩來

渴雨簡張仲宗二首

強讀文書不補飢只今一飽尚難期薄雲未肯蘇禾

稼細雨才堪濕荔枝

雨濕平林松桂香斷雲冉冉拂疎篁江山故自可人
意從此歸休策最長

謝楊紹祖惠玉友

我來閩中居中熱久斷酒端居苦無事神氣思內守
故人憐我病小缸送玉友極知此不凡嶺海見未有
感君意則重納約況自曠欣然洗盞嘗不待捧素手
空盃貯玉色一洗市沽醜坐令百疾去敢復望升斗
從今破酒戒可以入道否

與李似宗別後奉寄

昔者相過幾時心期雖在事多疑滯留江海君先

病悵望雲山我欲歸老境猶存作詩苦故人多有食
言肥漢陰老父如無事肯復逢人論是非

作雨不成旱暑愈甚未能就道

三日陰風雨不成坐嫌衝暑作宵征敢因貧故累公
子尚欲閑時尋友生兵甲未休心已醉詩書頗廢眼
猶明便須準擬庵居用拄杖繩牀折脚鐺

聞鵲

一夏病如此它鄉閑未回踈簷聞鵲喜知有遠書來

荔子

南征未苦厭關山荔子今年已厭餐時有野僧來獻
供每煩佳士約同槃門前炎暑三伏旱坐上冰霜六
月寒它日一尊須念此中州傳買半梨乾

乾元真歇數約它日同庵居

與君俱自走天涯何處雲山不是家城市少留眞夢
事林泉高卧亦空花久無佳句彫肝腎漫有微言到
齒牙它日一庵如可必願分齋罷半甌茶

將發福唐

一云別李叔易兼簡士珪

盡此一囊粟我行當有期涼風吹天涯增我別後思
結束向行在問子還一作來何時初無濟時一作世策處

事多參差環視中所有無一施可宜形骸久已病敢
微當世知不蒙朋友責定遭兒輩嗤矧此世外人勸
歸常恐遲相尋有如日請盟吾此詩

聽雨

日數歸期似有期故園無語說相思芭蕉葉上三更雨正是愁人睡覺時

未利

香如含笑全然勝韻比餘醖更似高所恨海濱出太遠初無名字入風騷

聞二弟召對

晚來忽雨已如秋竹枕欹眠得自由忽報諸郎例升進頗容老子便歸休人傳胡虜三年旱勢合山河一戰收顧我迂踈最宜病祇應隨處是菟裘

夜涼早起尋李貽季陸慶長所惠詩有作

夜長忘陰晴忽聽簷雨滴空房閉重門涼氣通枕席欣然欲攬被如覓舊相識那知庚伏內得此睡通夕起尋兩君詩令我生氣力成蹊長桃李已自除荆棘遠游得數士舍此百無益挑燈視皮膚不顧蚊齧赤因之不復寐爲子增歎息

聞大倫與三曾二范聚學并寄夏三十四首

我思臨川居欲往意未慊每懷二三子歲月多荏苒後生名所習正是絲在染未須極軒昂且須就收歛舉動思古人此志豈不遠才雖有高下事亦要強勉願爲江海深莫作盆盎淺

世人爭錙銖未語色已變居然面頤赤自處亦已賤

寧知烈士曾渠白有志願一介不妄取萬鍾吾亦倦
古人有伯夷名冠太史傳

見人輒有求所以百慮非但能守簞瓢何事不可爲
愚夫飽欲死志士固長飢出門萬里塗其亦名節所之
莫惜一日勤而忘終身憂農夫力耕作其必歲有秋
月前不鹵莽久亦有倍收少年不努力長大復何求

別法一上人

我有江浙役子能乘興來便同湯院浴卻爲故人回
此道恐遂絕後生良可哀試尋鑰匙子一一與重開

別後寄珪粹中

一作鼓山

海上相逢兩過秋飄然乘興亦悠悠送行百里還歸

去同是江湖不繫舟

哭王元邁

紛紛舉手爭毫末砥柱當河獨不流一夕便隨波浪
沒天涯黃葉更悲秋

別林氏兄弟

二年住閩嶺所閱足青紫那知萬衆中得此數君子
相從不我厭但覺歲月駛高論脫時俗如風濯煩暑
出處雖未同氣味固相似人生有離合一作昂所畏爲
物使要當啜英華不必計相滓它年肯相尋在彼不
在此

本中欲謀它日復來福唐之東山林少穎請

作詩以記因成兩絕

老大馳驅百不宜敢將筋力蹈危機它年更欲眠雲
住同過東山嘗荔枝

更作東山住尋盟尚有詩看君騰踏去及我未歸時

謝人惠陳家紫

煩君惠我陳家紫萬里漂流合得嘗莫道聞名不相
識舊隨邊實到吾鄉

閑居感舊偶成十絕乘興有作不復詮次

四海交游一信民後來情分更誰親可憐相伴谿堂

老一去塵寰三十春

汪信民謝無逸

一世聲名高與關亦知不合注人間不令整頓乾坤

了虛逐松聲半夜

高茂華秀實閑沼止叔

壁老投冠去學禪堂堂

一作

鼓陣無前平生老伴

唯均父馬病途窮不著鞭

節德操真似均父

屏醫卻藥病良已絕學捐書我又休卻到舊時行復

處五湖煙水上漁舟

萬里飄然不繫舟老來專憶舊交游西風日短中原

路虛度江湖數十秋

唐子直心絕可憐夏侯苦節更誰傳諸是事業風流

在各有殘詩數十篇

唐廣仁充之夏侯髦節夫是載伯禹詠之之道貫之季一謂

之季此冲之叔用

平生親愛獨諸是叔也相親共寂寥半日不來須折

簡暫時相遠定相招叔用

病夫長病合長飢豈復輕隨世上見雲雨覆翻渠有分江湖潦倒我無知

曾郎學行冠姻親趙子才能又絕倫仲弟故應同二妙一時先後委埃塵

曾元似趙子仲及余仲弟也

便欲長休老未能爾來頻愧住庵僧直須棄盡人間事始見從來一點燈

溫泉一作福州湯院

海上秋來早晚涼客愁蘇醒似還鄉歸途尚欲撩瘡疥剩乞溫泉一勺湯

將去福州

委曲隨人久未甘脩然午枕睡方酣功名到此終無分身世從來百不堪爲己工夫今粗曉住山活計舊相諳它時不用求三徑投老才須住一庵

初秋

涼風驚木葉意欲作深秋客病渾如昨囊空却自由因閑得飲酒端坐勝封侯寄語平生友當能爲我謀

奉呈鼓山雲門二老

汝水相逢今幾年只今同住海南偏月明本自無虧缺山色何嘗有變遷它日會逢兄弟語一時驚散野狐禪儻因居士閑開口却作冲和二月天

從叔巽叔覓茶

疾病侵凌轉不堪時思一室奉清談嗣宗已餉兵厨
酒當有新茶惠阿咸

福建界首寄福州親舊

海上秋風吹客衣
婁煩親舊送將歸
今朝更入江東路
便恐書來即漸稀

嚴州九日坐上贈胡明仲常子正

今年得交舊九日會嚴州城角風雲暮天涯景色秋
功名有長缺行李付扁舟苦恨三年別聊因一笑留
病添文字嬾老恥稻粱謀活國須公等吾生便可休
方允迪挽詞二首

已矣儒林老今爲地下郎空山留几杖遺藁漫文章

徑狹風霜遠溪深草木長傷心釣臺路千載闕幽光
惟君好兄弟少小共聲名豈止千人傑俱爲一代英
云何卧丘壑不使至公卿慟哭松風遠悲雲咽莫聲
程伯禹母夫人挽詩二首

父矣閨門秀端如玉在淵相夫成令德教子作名賢
遽逐秋色盡空今莫景遷傷心江左地松栢閉新阡
舊隨賢子後每得孰嚴規未獲升堂拜空成相挽詩
爵頻賜湯沐壽不至期頤它日家聲在流傳世未知

送范師厚宣諭四川

老境侵尋久廢詩送君寧復似當時虺隤病馬猶長
路偃蹇寒松只舊枝想得山川瞻使節便令父老識

家規

唐宣公嘗使成都

聖朝本意惟寬大網漏吞舟始合宜

王導嘗遣八部從事之部顧和在傳還從事見導人人各言二千石長短和獨無言導問之和曰明公爲政當使網漏吞舟之魚豈可抹聽風聞察察爲政導咨嗟其言

贈了老

前年見公滄海上法會堂堂萬騎將今年見公浙河東猶是當時舊老翁送行更有天童老騏驎齊驅獵霜草野狐射干膽欲破不但獨噴羣馬倒我衰且病百念絕便得從公不爲早忘情遁跡亦未是言與不言俱一掃世人擾擾不歸家公行問渠有何好

東萊先生詩集卷第十五

東萊先生詩集卷第十六

呂本中居仁

送楊晨當時赴夔漕

楊侯從舊名籍籍吳中一見如舊識憐我衰頽病已侵怪我辛勤百無益今君遽作巴蜀行江頭宿昔春水生路經三峽不難阻通與疲氓問疾苦隨身長劒莫輕舞試伐蛟鼉斬豺虎北來人士衆如雨得君此行尉羈旅君但垂情一笑許勝使區區入州府百城因之遂安堵亦勝無事閑坐否

送徐林稚山赴江西漕

總角相從四十年如今衰病已華顛父無耆老可訪事尚喜交游不乏賢未使從容持從橐却令辛苦上

江船百城編戶皆疲瘵日望公來與息肩

將發金陵奉懷張彥實

老矣君何往翩然我欲歸文章晚未用歲月事多違
江接鄱陽路風吹游子衣不應遽伯玉獨悟昔年非

初離建康

一云鍾山寄范十四弟諸人

嘗憶它年出舊京汴隄榆柳與船平寧知此日鍾山
路亦是東行第一程

紛紛車馬未言還我獨支離便得閑尚有同門二三
子肯同今夜宿鍾山

寓會稽禹迹寺

陰雨靜不出端居還自由客衣從短褐天氣已深秋

所在兵猶闔中原亂不休廟堂如有意更與萬人謀

會稽初秋四首

今來留滯浙河東想見閩山荔子紅雖有故人家在
彼可無方便託西風

張侯問舍復何時我亦留連去未期便欲爲君草堂
客幾時先寄落成詩

故園回首但斜陽所至奔波避賊忙天下何曾有定
處越南燕北是中央

病來每有居山興老去初無住世心三尺枯桐無舊
譜始知三歎有遺音

錢遜叔侍郎奉京師舊墳改葬天柱謹成挽

詩一首

錢氏霸吳越功德在斯民遜王早退居身退道益尊
至今二百年盛事傳後昆文采震本朝豈惟光一門
後來翰林公又以直聲聞累葉其外家家世悉殊勲
善惡久乃效其報於此分裔孫傑立者迎喪自中原
遂今擾攘後得安父旅魂依依天柱山不必京洛塵
死者如有知當言吾有孫小人託末契所恨老不文
睹此一時盛忍終無一言越水流不竭越山旱不涸
孝子亦不匱錫類到仍雲

重陽日西興寄臨安親舊

我來西興口君在龍山旁如何阻一水不共作重陽

別浦潮猶白深秋菊未黃遊知對杯酌不記是它鄉

范伯言藥隱

一云送范彥行歸西山

烈士故徇名中民但榮官寧知陋巷士堅坐有餘歡
出從聖師游歸坐守一簞出門視天壤密邇心自閒
范侯嬾仕宦決意歸西山西山有藥隱此地可盤桓
誓將從古人上追孔與顏有田可以耕有屋可以安
寧能伴兒曹日夜不得閑我亦倦游者世味更百難
夢寐想君家父子兄弟間便當卜鄰居一生長往還
相依得情話出語清肺肝後生有郢質更爲斲其漫
君行問安否此盟當未寒

題趙祖文盤谷圖

趙郎落筆寫盤谷正是太平無事時今日太行那有此滿川樵採盡胡兒

送胡明仲知永州

君行西遊浮沅湘洞庭岳麓天一方嶽前老人望君又歲晚不嫌歸路長晴天萬里去鴻鵠韞玉未售猶深藏遠行固是君素願多畜奇謀羞自獻後生紛紛了目前大策定非凡所見簿書汨沒渠自忙道里崎嶇吾不倦百川東下倒狂瀾要君巖然如斷山我老無用逢多艱敢復著腳塵埃間留次偪塞良未寬日夜矯首須君還運斤成風君不難不使世人漫臯端

孫肖之短堂

孫郎囊空意自滿自謂身長才則短以短名堂堂未成長短是非俱不管嚴州一見鬢蒼蒼浪贈我新詩如夜光何時到君短堂上更話如今歸興長

贈孫肖之

子窮非一時所歷固長久自從太平時以至戎馬後今茲益窮其所至但縮手遂令甌生塵不止衿見肘未能脫身去且作避地走金盤貯火齊熟視不一取溪船下濤江亦未遠南斗固知松柏生必不在培塿見我嚴州城世事嬾到口念子抱奇才有節空自守簞瓢在陋巷世亦如此不乖離勿重言寒甚且飲酒

朱成伯秀野堂

客愁固多岐我懷亦蕭散連年尋故人見子二水岸
官居少閑暇歲月忽已換有堂名秀野未入俗眼看
得名自君子可當清淨觀未能藝桃李且自飽藜莧
荒涼城一隅初不越門限脫身少年場念此已熟爛
嗟予老病侵閱世蓋多難相逢默無語自足洗憂患
窮冬足雨雪近市乏薪炭時來上子堂尚得一笑粲

次秀亭韻二首

忽見新亭起廢基暮雲疎雨兩霏霏憑欄望長空
遠盤石新開小徑微治世從今可招隱至人何苦累
藏舟車來往開回環今日陪公得暫閑漸喜著身人迹

外勝如隨衆馬蹄間縈紆細數溪頭路蒼翠遙看雨
後山正恐朝廷須舊物不容常此面孱顏

甘棠樓

高樓面面好舉目是溪山急水瀉湍瀨諸峯呈髻鬟
聊爲半日出得伴使君閑作者風流在承平氣象還
身雖住世網心已離塵寰未厭陪游數唯愁覓句慳
高風雖在望逸韻恐難攀咫尺蓬萊路惟公指顧間
師奴病化

伴我閑中氣味長竹輿游歷徧諸方火邊每與人爭
席睡起偏嫌犬近床能與兒童較幾許賢於臧獲便
相忘他生尚欲隨吾在要奉香爐漉水囊

受戒不捕鼠聽經如欲應誰知兩溪畔今日送亡僧
舟行至桐廬

乘舟待潮發一日到桐廬物色寒初甚溪山盡不如
往來真是夢親舊不須書猶勝鳴夷在時容託後車

示兒

忍窮吾有味雕句汝無功客舍置塵裏春愁浩蕩中
初無買山費真與住庵同更想顏回宅簞瓢亦屢空

陳朝奉坐化

東風吹雨欲翻盆杏樹前頭柳暗村試問老人何處
去夜來新月又黃昏

嚴州春曉

居間病常嬰出郭春已老微陰淨新綠轉覺原野好
故人各漂散頗恨來不早尚有壁間詩猶堪寫懷抱
是月足陰晦暮春常苦寒閉門猶疾病春物豈相干
堅坐客已少長貧心自安幽蘭有花在尚肯結餘歡
子將爲三衢之行下塔僧惠道求詩留題因

成絕句遺之

欲過城東病不能飛檐高棟想層層半年夢作嚴州
住一首詩留塔下僧

將適三衢而七弟欲往臨安臨行作詩奉送
弟要題詩別人還勸我留如何南去路更送北行舟
處事須遠略擇交當廣求秋風理歸棹爲我上衢州

椿閣

往時椿閣老盛德傳鄉間至今風流在遺芳殊未踈
有孫仁者靜遠近伏其賢定知建德民祝令如翁年

弋陽魏令賞音亭

高亭已寂寞山水自清音主人去亦久此意誰復尋
夢回還舊觀川上有微吟於焉繼前作因見平生心
建安熊述之爲令建德不言而民治將適三衢留詩美之二首

熊卿治建德隱几心若水民肥吏乾枯亦不用管筆
問子何能然此豈力可使建安今多賢於子可見爾
建安固多賢故人劉與胡山川古香潤珠生崖不枯

我病日已懶觸事見迂踈行當脫身去一屢從子居

擬古樂府

高堂陳八音同聽不同樂狂飈送鴻鵠萬里翔寥廓
一去三十年事事非前約當時綠綺琴塵埃無處著
時節非不以此意但如昨

己未重陽

病無佳思只深藏漫遶東籬菊未黃最是二年秋好
處可能無酒過重陽

李城拙軒

念彼巧者勞知此拙者安拙者固無營一生長得閑
子豈真拙者託此以自安何嘗曳長裾領青巾小官

世人極變態，翻手覆手間。子獨如不聞，默坐安如山。
九衢走紅塵，本自不相干。我老始見子，古井久不瀾。
贈子拙軒詩，留子靜處看。當蒙一笑許，敢言愁肺肝。

清

名御軒

清軒中一事無，午窓高枕似吾廬。世人稱意何須道，乃祖風流正不踈。

將往城南觀音阻雨未果

野寺它年別，溪山浪作秋。初涼頗宜出，小雨故妨游。
僧老渾無念，田荒近不收。猶思五更懺，清切勝蠶謳。

余迪漫浪齋

顏子在陋巷，無一當其心。曰惟聖之學，正自惜分陰。

子生千載後，此意尚能尋。齋雖名漫浪，迹豈計浮沉。
文字浩今古，不受俗務侵。端如貯美酒，妙處當自斟。
臨卷忽有得，如奉君親臨。即此是聖域，子行無滯淫。

無題四首

我病無能到處窮，子才安得尚漂蓬。如何共飲重陽酒，相對無聊似乃翁。

重陽共采東籬菊，却似乃翁年少時。顧我無能甘老病，相尋唯有向來詩。

聞鍾即起待天明，客舍無聊坐五更。何日長風破巨浪，看渠萬里出門行。

平生隨我飯脫粟，靜夜不眠尋細書。可見烏衣諸子

弟從來志業不如渠

邊愁

胡人吹短笛一半是離聲想得南飛鴈雲間亦默聽
愁聲晚來急邊塞乍寒時不似江南日愁多只自知

招范四弟

涼風忽滿簾江漢有歸心顧我病如昨憐君窮至今
苦嫌歸夢短不厭酒盃深試問玉川老何時許降臨

衢州路中

今日衢州路師奴不共行阿童渾似汝只是太麤生
憶福州舊居菊花

求趙表之墨

超然堂中墨如戟支撐宗門渠有力參得諸方一味
禪以此示人人不識病夫見之喜折屐便欲投詩恐
無益主人不吝是家風會見琅琅送珪璧

陋巷

陋巷客自稀短日寒未到感君時一來得以尉懷抱
論文有根柢落筆清且奧如歌五弦琴促軫有餘操
黃花開正繁薄酒可相勞請君尋此盟妙處同一道

示聞生

形容落魄猶須酒疾病因循久廢詩忽見聞郎下
句却如汪謝少年時

簡何店厚

我乏濟勝具子懷經世才寒窻得一笑陋巷絕纖埃
白酒難充醉黃花只強開更憐無事日時有好詩來


謝人送酒

它鄉逢故人已覺意氣盛得君雙榼酒起我終日病
清如兩龔潔氣出徐邈聖乃知無功鄉欲往有捷徑
一盃吾已足不必待歷聘扁舟下東陽此計或未定
尚欲尋舊盟短拙恐未稱先生肯降臨時掃一室靜





東萊先生詩集卷第十六

文正公



東萊詩集 十七之廿



0 1 2 3 4 5 6 7 8 9 10

A 1 2 3 4 5 6 M 8 9 10 11 12 13 14 15 B 17 18 19

Kodak Gray Scale

C 1 M

© 2003, 2007 T.M. Kodak



東萊先生詩集卷第十七

呂本中居仁

聞蔡九弟十四弟到行在

苦懷吾表弟別久費相思愛客能忘酒長貧不廢詩
每蒙高士喜終少貴人知試問遊吳興何如在蜀時

贈蔡九弟十四弟

年來疾病日衰頽忽報山中兩弟來徑欲相從營一
醉未湏辛苦便輕回

病中

貸米供晨炊尚欠數東新平生甘此味此去未爲貧
新霜已嚴厲況我病經旬但守此心足無爲思古人
病中曾端伯見訪

不見倉曹十五年江城相遇各華顛何時更踐隣居
約判斷諸方五味禪浮生擾擾亂初定又病昏昏閑
始便欲問小童尋大隗勝於猛將畫凌煙

無題

一任衡門可雀羅時容欹枕聽懸河因君小試屠龍
手要與午窓降睡魔

送曾吉父

吾道從來到處窮八珍常與一簞同子房故是青雲
士圯上乃逢黃石翁聖學有傳爲可喜宦遊少味自
無功亦知湖嶺如江剡盡在先生指顧中

次曾吉父蘭溪三絕

夜窻相對不成眠苦爲離愁定不然政以蒼生未蘇
息思君日夕望回船

春信先尋嶺上梅兩年零落待君開非關使節須重
到自是溪山未遣回

以覺藏身不厭深舊遊風物要追尋書來肯附銅魚
使記我今年病不禁

窮臘有懷

冰霜底窮臘伏枕久亦倦思公如和風咫尺未得見
人生無賢愚各自有志願但得所趣同公固不我賤
荷須肱九折始見金百鍊平安望中原棲息各異縣
尚欲從公遊衰年保窮健

病中聞諸范日赴飲會

諸公相隨日酣飲我病昏昏困衾枕人生苦樂故不同
世味再尋如拾瀋良醫更在肱九折曾子從來日三省
不離方丈走諸方萬事只如驢覷井

深居

深居如山林初不遠城市塵凝喜事少犬吠知客至
生涯付衰疾日力破昏睡欣然一笑足自省甘若薺
收身當在早過是恐少味

慶大悲閣成

自離闕嶺罷叅禪疾病深藏不計年尚得閑人相印
可隔門惟有白衣仙

贈人

堅卧因循欲過冬故人無復馬牛風得君好句能忘
病笑我長飢不諱窮清夢肯嫌齋舍冷破囊常伴酒
盃空新正所願長窮健剩作歌詩準備公

送廣東漕范子儀

我爲三衢居君作番禺行君行我方病歲序仍崢嶸
嶺海未寂寞斯民則憔悴得君鎮臨之固可以卒歲
嗟君盛德後窮獨與我同比年數見之長在寒苦中
番禺盛賔僚莫如元帥賢君行問安否道我如昔然
夜聞諸生讀書因成寄趙十七姪

紛紛藥裹了新立北望蘭溪不數程且喜諸生會

苦夜窓如子讀書聲

夜坐

所至留連不計程兩年堅卧厭南征荒城日短溪山
靜野寺人稀鶴鶴鳴藥裏向人閑自好文書到眼病
猶明較量定力差精進夜夜蒲團坐五更

簡李巽伯

愛酒舊無敵能詩新有聲荒城時過我長句屢尋盟
厭病時招客因行不計程祇應有餘暇未肯賦閑情

一本後四句云往事十年夢生涯
三尺檠却憐陶靖節著意賦閑情

追記昔年正月十日宣城出城至廣教

肯憶它年在宛陵好山松竹面層層江城氣候猶含
雪草市人家已掛燈每怪愁腸難貯酒時隨拄杖出
尋僧如今轉覺衰頽甚病坐南窓冷欲冰

病中上元

病久仍多事深居未識春慙慙今夜雨且爲阻遊人
三衢上元

俗事紛紛避作煩夢中時厭雨聲喧但看閑客時來
去勝說群兒手覆翻事業不同俱可笑形骸如此尚
何言他年更有相逢話同是三衢過上元

贈人

剽作閑官不計年得公相近轉翛然飽諳文字能生
病始信虛空不住禪水滌船回休進棹路長馬倦莫

加鞭漫感拙句爲公壽要在新正第一篇

官閒贈人

自喜閑官不計貧月叨微祿勝歸田藥囊往往充詩
囊米券時時當酒錢忍病作勞吾不厭對人無語子
差賢不湏更見盧溪老會得安心即是禪

正月十七日

令節今安在晨鍾奉夙興空庭留素月廣殿有殘燈
笑語已難記經遊如未曾吾耄得堅卧差勝住房僧
病中得舍弟信

頻通發女訊兼得會稽書歲月呻吟裏文章困睡餘
百年判憔悴萬事付迂疎尚欲身強健相從得定居

疥

瘡痒撓膚無春冬爲害略與惡疾同只有瘡痂不相
負夜闌長蒲侵衣中

正月十九日暴熱

一夜飛蚊遶鬚鳴都忘時節是新正祇應朝暮須風
雨便作踈簷瀉竹聲

即事

十年不調張廷尉一字拔人山巨源萬事重尋已陳
迹此公相對可忘言故入久已音書絕古寺終嫌市
井喧更欲移家近深僻漫留書冊教兒孫

送向仲吉往江西

紛紛車馬鬧如雲膏火煎終祇自焚亦有古人來問
疾苦無佳思與論文江湖老矣頻搔首毛髮脩然改
似君它日卜鄰猶有約靜中風景要平分

寄臨川親舊十首意到輒書不復次序

偶從行李轉江湖所至脩然一物無
午枕夕拚閑事業夜窻新有靜工夫

少小交游不乏賢二三豪俊聚臨川
自從老大飄零盡獨有殘詩數百篇

屢試吳中千里幕閩中荔子亦嘗新
獨遊每恨無佳思正好溪山少故人

故人自失嵇中散疾病衰頽轉不堪
酒喜閑居有賢

第且隨長鋏住江南

季平

張卿別後且郊居無復黃公舊酒壚
試問今年有閑暇亦隨書劍入城無

文叔

交遊疇昔住臨川博士高風世不傳
饒謝得名三十

載當時已道小汪賢

叔野

故人子弟惟汪謝每一思之忘寢興
莫道臨川復寂實後來相繼有諸曾

吏部聲名動一時中原人物未全衰
低摧不用還歸去坐守遺經可療飢

子禮

金谿比歲復何如二董風流却未踈
聞道移家遠城市欲携書藉更深居

先唐速

愛賢如渴吳夫子不深世間兒女塵老病不逢終不
悔後生誰復記斯人 吳迪吉

奉懷李平范文獻成兩絕句錄呈

形骸已病尤宜懶歲月長貧屢有詩猶得深居小塵
事只如同在領南時

新年爲況復何如尚有心情打酒無只恐後生行樂
處轉嫌吾輩白髭鬚

病中寄胡原仲劉致中

累月不寄書我病亦在牀仰視出林鶴如覩二子判
冰壺貯秋月所至有輝光僻郡足風雨深春猶雪霜
聞水遠而清聞山深且長何時一尊酒更復議行藏

本元相過三衢偶成近體詩一首奉呈

紛紛俗事起如毛病起南窓默作勞正欲往來求飯
飽敢將辛苦治名高長閑似稱三冬卧舊學虛蒙一
字褒它日相逢有餘地尚容衰晚闢堅牢

無題

衾裯尚冷知春早意緒無聊覺病深夜半改詩總底
事向來餘習正關心

寄人三首

世久無高識斯人我獨知子行吾義子雖病敢忘詩
念昔無事日同升夫子堂江湖晚相見猶喜共行藏
世久趨浮末於時爾獨賢閑遊衆目外却立萬夫前

老驥空伏櫪長琴有斷絃傷心共隱地回首更茫然

寄祁居士

聞道祁居士抄書手未停艱難走異縣辛苦抱遺經
野寺猶堪隱人言懶復聽十年事夫子今日得儀刑

贈人四首

病欲相尋久未能虎丘山下在家僧諸方本未須君
記拈出叢林舊葛藤

昔年曾侍老姑旁誨我全身只退藏長恐風流便踈
遠子猶它日及升堂

跬步無功已厭遲後生誰復肯從師無人識子閑居
意手今來藏只自知

三江古處更深居白首窮經一丈夫借問新年入城
市亦曾頻到虎丘無

寄朱希真

幕下諸侯老微言衆不聽祇應有餘論時復注前經
郡古踈還往官閑任醉醒主人鵝可換更爲寫黃庭

寄向縣丞

念子它時兩頰紅十年奔走變衰翁耐官丞相風流
在坐守簞瓢不訴窮

病中

藥裏關心老不宜只今筋力已全衰何由更得身無
事却似它時把酒時

山城

山城雨雪繁春氣來不早思君如和風未見意已好
時蒙枉車騎笑語得傾倒我能知子賢子亦憐我老
舊交半鬼錄在者迹已掃慨然念平生令人惡懷抱
相從飽喫飯此計或未保東遊有前約預恐別草草
豈無一言贈妙句寫默藁出戶仰高山猶堪覩姑稿

病夫

病夫坐穩嬾出門底事逢春作癯瘦故人相尋不憚
遠欲以一盃爲我壽鋪張古昔引大義勸使忍窮如
忍詬感君意氣但如昨顧我情懷已非舊平生甘作
蟻旋磨萬事只如船放溜十年參差故鄉夢一心守
待靈芝分犀身竊比柳下惠差惡幸逢朱伯厚它時
城市望雲山歲晚何由數相就

無題

心廣體故胖意肅氣自屏頽然萬物表樂此一室靜
念君久安坐轉覺此味勝踈籬過野馬破牖行日景
但今此意真不必費譏評想當溪山橫更有松竹映
隱几得書眠此固可補病

偶成兩絕句奉寄文若庭列

強欲馳驅老不宜故人雖在費相思祇應天府多還
往職事雖忙不廢詩

夏子經時不寄書十集奔走尚窮途不知自到高安

縣亦有心情記我無人

寄閩中親舊

濃陰蔽烈日小院有餘涼頓覺枕簟好時聞芰荷香
秋成今可必衰疾未相妨徑欲閩中去尋僧不裹糧

廖用中世綵堂

廖氏居七閩土俗變齊魯子孫仁且壽每繼先父祖
作堂名世綵此意天所予近者得矜式遠者快先觀
今公懷直道邪正有區處還家上此堂父祖當笑許
小人慕清風想像濯煩暑孰知少年場有此毛髮古
何時望世綵得聽公笑語老松卧歲寒亦以蔽風雨
人或不了知亦莫予敢侮

劇暑

劇暑先庚伏經旬在炮燔今夕驟雨過我病亦少安
涼風醒病骨好月上更闌尚恐賊報急凌風無羽翰
閩中故人書日夜望我還無車載家具欲往故不難
所恨去已晚不及荔子丹家家有白酒自足解愁顏

即事

經旬困炮煮今夕有微風市井置塵外溪山嘯似中
涼秋亦不遠吾道恐終窮準擬閩中士今年一笑同

秋日

斟酒莫辭酒殘寬酒殘少寬令心安客遊無聊思舊
歡舊歡新愁千萬端如何不飲空長歎歲云秋矣風

落山白露應節衣裳單南遊並海當不難雨雪欲下
何時還

懷秋

秋風日夜至念我少年時新涼喜欲舞至今心未衰
心雖未遽衰老病則已甚頽然坐前階乃若兩鳥噤
子病少則尔衰羸非獨今徘徊以傍徨何以異夙心
死者各已死空費子百慮在者亦已老契闊少相遇
洗心西方觀子復未肯然胡然競日力今年如去年

贈范十八

君去留不得我窮前未聞如何出籠鶴更送離山雲
歲晚逢同志人稀莫離群肯_臨別語只用十年勸

秋日

少年固長貧長歲復多疾閉門取堅坐到此多事日
不嫌冷如漿所要甘似蜜舊書堆几案老眼厭塗乙
不如壁角坐萬事付以質況今兩澤足已覺憂患失
秋成日在望所至有梨栗賊報雖未衰一飽良可必

讀書

老去有餘業讀書空作勞時聞夜蟲響每伴午_坐號
以靜能忘病因行當出邀胡爲良自苦膏火自煎熬

宿昔

宿昔尚煩暑平生悲遠遊長貧不肯酒雖健嬾登樓
晚節勞千慮經年走數州新涼筆事好只是迫防秋

謝人送詩

堅坐少愉樂欲行還滯留時蒙七字句可尉十年心
歲晚日晷短天寒霜雪侵主人不厭客敢辭酒盃深
辭一作避

水仙 二絕

澹綠衣裳白玉膚近人香欲透衣襦不嫌破屋颼颼
甚肯與寒梅作伴無

破臘迎春開未遲十分香是苦寒時小瓶尚恐無佳
對更乞江梅三四枝

東萊先生詩集卷第十七

東萊先生詩集卷第十八

呂本中居仁

處暑

平時遇處暑庭戶有餘涼一紀走南國炎天非故鄉
寥寥秋尚遠杳杳夜先長尚可留連否年豐秔稻香

教授鄭國村挽詞

松桂在荆棘所趨故不同雖云被剪伐所至仰青風
念子行古道簞瓢生婁空我來則已病不復能從容
平生務躬行聖處久收功堅坐想顏子欲往吾其從
丹旄忽已遠暮靄千山重論文一尊酒堅坐更誰逢

無題二首

柴門羅雀賴頻開喜有新詩到眼來聞道繁丹城脚

底莫乘溪漲便輕回

入秋多病渾無酒學道無成却讀書
莫謂窮居便寂寞天涼猶枉故人車

潘義榮惠木犀二首

年年無酒對新秋辜負涼天懶出游
想得故人憐我病故分巖桂洗窮愁

掃除炎暑脫氛埃色似菊花香似梅
知是西風要清賞少留陰雨候晴開

次潘都尉富季申冬日探梅韻二首

暑退園林物物新過溪風好月初晨
酒壺茶具偏宜坐細草殘花別是春
但得主客醉不辭秋冷和詩頻從來
禮節空疎放見我江歌意自親

開府新從日下歸却尋山水對煙霏
剩披詩律留花住不使親知到眼稀
但見鯢鵬常遠舉應憐蜩鷃只單飛
此游尚恨還家早未許溪頭送落暉

次韻木犀二首

折送幽花與做秋溪頭風物未重游
已憐多病連三益更喜成詩擬四愁

洛陽車馬走塵埃一歲顛狂自探梅
還識此花風味否年年秋後兩番開

謝潘義榮送菊二首

經旬霖雨足莓苔忽喜雙盆送菊來
已似風霜憔悴

損主人云是待晴開

漸開粉白間微黃肯與新橙一例香
與衰翁元來稱且留青藥作重陽

畜犬

主人長年閑柴戶終日閉雖云伴我懶常有跋扈志
端如在籠鶴又若伏櫪驥舉首望道路又欲從此逝
恨無陸探微寫此師子戲如何尚搖尾更作求食計

疥

刺刺齷齪疥欲作今年去年只如昨人生縱病莫病
此此病雖微更作惡寒窓夜長燈燼落敗人禪觀妨
人樂安得壯士挽天河盡洗此瘡閑處著

潦倒

潦倒心猶在衰遲分獨深如何一朝淚空費百年心
好月思同步清樽懶獨斟惜哉王子敬誰復數人琴

贈人

它年好兄弟見我嶠南時相對能忘病清言可療飢
後生寧復有末俗漫相疑尚想閑居處踈燈守破帷

無題

疾病侵凌我亦衰後生誰復更相知可憐日落長安
路不見驂騑整轡時

寄京口使君

使君鎮京口隱若一長城詩律有同杜溪山聊主盟

囂塵不掛念鷗鳥自忘情曾記貧交否衰頽判此生
再贈

嬖女勝京口公來歲已秋閑雲出山寺好月掛星樓
往事付情話故人多倦游十年浪奔走今日爲公留

贈友

子來已冬深僅得數夕款寒窓聽談道未厭白日短
從來不飲酒萬事付茗盃別去今幾日荒堦月猶滿

歲暮

歲暮少懽愉况復嬰病苦閉門每厭客幸此連日雨
寒爐火復熖乃若相媚嫵披衣坐壁角妙處時一睹
風聲耿初夜有句或未吐還書問故人可復一笑許

戲成二絕句

老讀文書懶不前亦無餘地可逃禪閉門省事群囂
遠唯有羶奴附日眠

病犬虺隤唯附日懶猫藏縮尚逃寒寧知兩馬霜風
下更有長途不道難

久病二首

久病畏人事長閑增道心寧貪風日好不避雪霜侵
跼躄身猶在高低手自斟酒盃休厭滿茗盃向來深
未愈俱生疾空懷宿昔憂時因發孤笑尚足尉窮愁
月落初無念花開不自由如何鴈南鄉不共水東流

偶作二絕

不嫌羸病守繩床。世念紛紛久已降。一夜月明如白日。驟聞急雨打天窓。

膏火從來只自焚。何曾野鶴駐鷄群。如何死亦無公論。地下猶存衛府勲。

謝滕尉送梅

破帷冷落不禁風。疾病深藏稱懶慵。忽有梅花來陋巷。喜聞春信出初冬。未須趁雪爭先睹。尚恐衝寒不滿容。會約君家好兄弟。他年尊酒更相從。

遊山

世味日可厭。茲游那得忘。稻田疏宿雨。木葉犯新霜。潦倒交游在。追隨氣味長。僧窓有淨供。茗盃有爐香。

李丞相挽詞三首

舊學邈難繼。繼相期從少年初。看驥伏櫪遽作鶴冲天。烈所平生志高名。萬代傳如何事未濟。此老下黃泉。兄弟俱英妙。聲名萃一門。論才無不可。於道獨爲尊。未定千年策。終嫌萬丈渾。天乎乃如此。不使拯乾坤。事業懷蕭相。曾襟識謝安。流風有餘烈。志士只長歎。淮海他年竭。冰霜此夜寒。向來交友淚。南望不曾乾。

以一縑寄范四弟

中原厭胡馬。所至是賊窟。念君室縣罄。何以備倉卒。窮冬霜雪繁。欲救乃無術。見號君莫賦。婢怨君莫恤。平生師顏子。於此見髣髴。此縑君所知。自我機杼出。

江梅

江梅消息未真傳微露芳心几杖前不信冰霜能作
惡要令桃李便爭先斜枝似帶千峯雪冷艷偷回二
月天準擬從君出城去竹輿仍勝百花韉

鼓山頌法眼語在裏即求出云大家合眼跳
黃河戲成四韻奉答

合眼跳黃河未有過得者豈惟不能過身亦須判捨
告君過河妙正要具船筏乘時等風去過此無別法
夜深歸家聞鄰家小兒讀書可喜有作

還家更寒三鼓餘鄰卷小兒猶讀書侯王將相乃無
種紉袴綺襦寧似渠北風颭颭霜被草聽汝讀書聲
轉好莫言翁媿惜膏油有兒如此可無憂

梅花

野水依城竹映沙江梅開處又人家天晴徑欲花前
醉只恐衰顏不稱花

無題二首

德盛不狎侮玄談多類俳居然少莊語無乃近齊諧
恨此達者趣猶乖壯士懷故當先復禮方得盡梯階
聖學邈難繼斯文當望誰還能養志氣且務攝威儀
曾子但三省子長徒愛奇從來要功處本不在多知

贈李元亮之子季子

往時諸季在江都文采風流一代無每得清詩如鮑

謝已聞前輩許封胡好松久已埋深澗老馬今猶憶
舊途今子相逢初未識尚容裏晚見規摹

二月七日與群從遊陳氏園

平居羸病每相妨今日尋春有底忙何似主人常不
出看人衝雨度浮航

橋北橋南花亂開小園和雨掃莓苔不嫌拄杖衝泥
入更許乘閑着屐來

懷許子禮

寒松猷庭院老馬倦維繫脩然出塵去粗免朝夕急
我友隔湖嶺尚作一日葺平生學道心擇善有固執
豈不在行路自遠霜露濕百川灌河來砥柱乃中立
何時一樽酒更與交舊集

雪

窮巷無人對雪小詩自可逃禪看取一年三白喜歡
共入新年

堅坐正宜養病開門便當幽尋一夜雪深一尺與誰
取酒同斟

報暉庵

寸草仰生活春暉常照臨不知欲報德何以見此心
江漢有時竭此心無淺深魏氏有令德傳家非獨今
結庵在山阿日瞻松柏林仁風被遠邇猛獸不敢侵
令子守直道意往無崎嶇遂令此鄉人得聞金玉音

我行時序晚回望西山岑延頸長太息聊爲純孝吟
贈莊季裕

老矣莊夫子居閑肯厭貧盛時更讀易憂道不無人
記往詩猶在相逢意倍親尚期香火社文字約遺民
李尚書挽詞

李氏三吳秀尚書一代英立朝惟直道守已但純誠
報國心雖在憂時病已成入推四兄弟氣壓百公卿
未就養生術獨收強諫名傷心舊遊地城郭漫溪聲
李器之履齋

人履履險巇君履履平地平地信可履行穩居亦易
貴已不貴人爲道不爲利熟視履險者豈不心有愧
君家天台守學固有餘味微言化子姪自足警一世
初無舉足勞寧有半塗滯君能識其然我亦從子逝
野寺

曉窻日未融野寺雨欲作經旬少客到靜坐差可樂
平生遭病擾今更不如昨囊空畏高醫何以致良藥
所幸秋已至所在身可着洗耳聽涼風不待一葉落
辛酉立春

中原擾擾尚胡塵堅坐江南懶問津漫讀舊詩如昨
夢都疑往事是前身子桑自了經時病原憲長甘一
味貧剩忍雪寒君莫厭土牛花勝已迎春

雪夜

破屋除燈雪自明案頭無用讀書檠老慵已慣跣趺
坐昏夢尤便松竹鳴知有故人來問道久無佳句與
尋盟明年更有閩山興但辦行纏莫計程

謝方倅惠炭

寒壓新春雪不融布衾如鐵坐衰翁煩君又送南山
炭更放殘爐一夜紅

即事四絕

老來於世轉無求事業聲名種種休伴得鄰僧忍飢
慣閉門無飯讀春秋

忽忽和夢別星樓擾擾隨緣住信州尚笑長江少方
便只教溪水暫西流

問柳尋花懶不知登山臨水病難爲日長客去松陰
靜強課兒曹學和詩

經旬却怕酒盃深野寺雖閑病至今莫謂閑居厭醫
藥未妨隨證檢千金

贈人

中表多離隔情親子獨賢心遊衆目外氣出萬夫前
米賤猶堪飽官閑不記年春風上巖瀨爲我略回船
辛酉之冬周提宮墮惠竹隔

深冬坐窮閭未厭風日惡今晨起濃陰正恐雨雪作
故人憐我寒垂意到丘壑虛堂排竹牖已覺煖勝昨
初無管室勞漸有閑適樂我生甚易足所至況旅泊

不爲御寒計敢復備墮纒偶蒙仁者念僻處未蕭索
從今作新年對酒且斟酌

計一作具

寄張仲宗

聞道張夫子今年已定居偶緣荔子債遂絕故人書
歲月足可惜溪山莫負渠它年得相近不必遠庖厨

周仲固尚論齋

周侯不出何所爲閉門讀書心自知簞瓢陋巷君不
厭讀書萬卷能忘飢上叅羲黃下秦漢采取英華幾
脫腕是非榮辱姑置之忽若乘船到彼岸古人之學
有傳授君生寂寞千載後問君何以識古人袖手無
言坐清晝以此讀書爲尚友是事渺茫人信否人信
不信君不問松栢固難生培塿朝來落葉滿荒城青
山照人溪水橫往來車馬作塵土想君深夜讀書聲
吉州段秀才栗庵

大千非有餘一粟豈不足須彌納芥子豈復論盈縮
今君住世網何以得此獨始知陋巷居已悟不遠復

復一作此

自如齋

朝爲事所奪莫爲飢所驅不知六合間何人能自如
永新段夫子屋小心有餘教子有家法逃禪猶作書

醉經堂

紛紛入醉夢一語令渠醒段子開門居云何猶醉經

其醉蓋非醉初無能解醒問經何所說明善故能誠
題焦寺丞詩冊三絕

一卅奔波在別離君家孝友獨天知己今好夢傳消
息更有賓鴻効羽儀

路旁來報定何人物理潛通自有神想得三衢相見
地至今草木亦長春

河朔家人墮渺茫江南風日正舒長已知原上鵲鵲
處更入雲間鴻鴈行

暴物

暴物看日景頃刻未嘗停隨景移暴物目示令心驚
寓此不停景乃復望長生忽忽駒過隙悠悠池沅萍
況茲兵火中而每疾病嬰野寺過毒旱氣浮高城
出門君莫厭宿昔已秋聲

次葉守喜雨

群蠶寂寞已收聲預怯秋房獨夜情忽聽僧簷鳴宿
雨定知田舍舞安甯盡消積暑經時旱不厭新涼數
日晴更喜此邦賢太守樂爲詩頌教諸生

無題

學詩漸老轉銷聲末路蒙公此日情尚有文章能起
疾豈惟田里解蚩氓近郊秔稻成秋熟遠郭溪山入
晚晴剩繞長廊和新句不知庭下薄寒生

次韻曾宏甫木犀

風吹旱暑未成秋，事負江村事幽巖。桂敢煩先折，送好詩仍不待邀。求自憐，疾病常高枕坐想風流。掇此州，它日出門尋舊約，未嫌踈嬾作人不。

贈鄭侍郎二首

便欲深居過一寒，破窻重覓舊蒲團。莫年生活如何做子細，煩公指示看幾時。不過西禪寺，直自初秋到晚秋。聞道主人憐我病，天寒酒未送新篘。

東萊先生詩集卷第十八

東萊先生詩集卷第十九

呂本中居仁

次曾宏甫九日韻

曾園曉色散栖鷗，強起新詩整復斜。正想故人披宿霧，忽蒙佳句洗昏花。舊游往往違心事，老病昏昏漫歲華。辜負重陽一尊酒，且來占雨又朝霞。

九日贈曾宏甫二絕

茶花過雨十分香，山後山前已帶霜。何事東籬數株菊，已將青蘂趁重陽。

漸退中原胡馬塵，溪山未厭往來頻。雖無名酒酬佳節，尚有新詩答故人。

送徐止秀才歸小葉

後生少規摹子學有根源紛然衆說中獨識孔氏尊
古人雖不作此理固常存滄海無津涯寧有衆水分
鑑明不受垢垢盡亦無痕子還訪師友當自得其門
躬行見日用餘事不論文

次葉守韻

新正無所爲出戶亦乘興欲尋林泉幽不避風雪迸
搜腸乞佳語分外若贅癭故知藜藿槃不受珍果飮
清詩洗病目鄙陋知不稱披雪見新月乃悟本來性
溪山况蕭灑復有松竹映何須待醅酒然後有醅酏

送曾宏甫知黃州四絕

雨餘天氣欲嘗橙栗可煨炮芋可羹正是一年秋好
處忍令無酒送君行

口脣白醖未嘗開正始餘音挽復回他日鑪香爲誰
起公曾親見了翁來

宏甫頃常爲諫
議陳公所知

君到江頭不問津雪堂草木幾番新一生未得文章
力要掃中原胡馬塵

騏驎徐行不離群却行江北訪斯文潘何子弟能傳
業當奉遺書與使君

題范子元畫軸後

昔年同過嶺南州曾看湘江萬里流妙手可傳詩外
意亂雲寒木更孤舟

送尹少稷賢良還懷玉山

青松在庭檻乃受衆目憐念彼歲寒姿肯爭桃李妍
不如卧澗壑歲久霜雪前尹侯東州英烟若珠在淵
避地走南荒因循留瘴煙歸來懷玉山草草屋數椽
深居絕萬慮讀書欲忘年偶出到城市頗厭塵囂煎
搜腸出妙語贈我以長篇行潦被注挹朽木煩彫鐫
紛紛車馬間孰能知子賢別歸值短晷肯復更留連
我老百事廢鈍馬難加鞭清霜粲屋瓦白雲常在天
悵望子所居欲去無寅緣

寄題曾黃州重修睡足齋

雲濤際天工北路郡吏稀春復暮平生想像睡足
庵頗見王杜安身處十年兵火庵已壞草莽連崗穴
狐兔使君初來席未暖重就新齋立窓戶踈踈竹
帶泉石歷歷幽花點煙霧竹樓月波不寂寞雪堂東
坡復共住昔者同遭盜賊擾今者定蒙神物護使君
忘言坐搔首抖擻衣襟脫巾屨下簾高枕百吏散一
任江頭風斷渡會思王杜與新詩夢裏相逢得奇句

重陽前一日作

涼風策策旁江城道路猶寬遠去程秋晚情懷常索
漠夜長更漏轉分明未償臍腹三年艾不負膏油二
尺檠明日黃花一尊酒苦思親舊與同傾

春晚

春色忽已晚悠悠留此心深居有閑暇令節廢追尋

更老愁何在長貧病亦侵一盃聊自勸不爲落花斟

寒食二絕

梨花雪白柳深青也似中原舊驛亭猶記往來寒食
下客房無酒卧空餅

今年春物更忽忽野杏山桃取次紅底事無錢作寒
食可無新語記車公

白樂天與河南尹詩云明朝欲出須謀樂不泥車公更泥誰

閑居即事

新舊音書寂不來略無一事可縈懷春風寂寞花侵
路野寺荒涼草上堦剩欲出閒留客坐不妨扶杖看
僧齋無人會得龐公意只道淵明是匹儕

偶出謁客

才過清明日更長竹輿頻出度浮梁雨侵田水連溪
白春入山花帶蜜香數有故人相勞苦不嫌俗事且
窮忙今年尚有湖湘興不待秋風便促裝

蔬食三首

殺物以活己肉食固多慙况無一事勤敢於滋味貪
今晨病少間調羹有酸鹹居然飽筍蕨自足慰清饒
磨刀向猪羊渠有千種苦厨人盡心力博汝一笑許
此道在忠恕觀彼更觀汝聖人雖未言寧可自莽鹵
夫子釣不綱於理已不隱浮屠斷食肉此語說始盡
人生慣便習奉法乃不謹要當守淡薄萬事可堅忍

戒殺八首

勸君勿殺犬犬有爲主心爲主反見殺君何無淺深
君貧犬不去君富犬分憂執以付鼎鑊於君心穩不
畜犬被縛時猶爲主人吠吠聲未絕口湯沸毛已退
主人調醢鹽欲以作滋味持此望身安世間寧有是
犬雖有小過未至不得沽賣錢與屠宰使得恣鬻割
君兒小不安君夜不得眠何獨於此犬如此安忍然
勸君勿殺鷄鷄能伺昏曉聞鷄君即起一家事了一
一朝被烹煮不念前日功主人取暫飽鷄苦固無窮
縱犬使殺鼠鼠窘生百畏其飢使之出此亦有何罪
犬鼠俱勿殺莫計有無功苟以無功死還與殺犬同
願君普斷殺能益君壽數子孫亦長年皆以不殺故
君子遠庖厨非有意於善但能觀自身此理即可見
商臣殺其父身亦享楚國世民殺其兄亦未妨大福
以此知報應未必在此時此時雖無他終久君試思
虎狼非不仁天機使之然蛇虺肆百毒此亦受之天
願君勿憎怒憫此心謬用仁氣苟薰蒸終皆變麟鳳

寄祁居之

苦憶均陽祁處士只今全是住庵僧何時更得相從
去細話叢林舊葛藤

送韓念八迪功

君去留不得我行還未忙漂零更遠別衰疾且深藏
野水千山綠荷花一路香猶思往還地相望隔浮航

謙上人清湍亭

道人結庵殊未就先起小亭山左右不將溪水濯塵埃且以清湍爲客壽雲煙晦靄作春濃草木堅枯辨秋瘦客來相對兩無語豈有浮辭問時候一生行脚如夢覺天意似於君獨厚我今留滯未得往想像此亭如故舊再三伸紙誦清詩已勝開尊飲醇酎

上人錄寄

彦禮彦冲原仲諸公題詩

簞瓢可樂不淡薄蘭菊重生足滋茂他

時有暇更分題此遊未落諸公後

送韓臨亨提舉

君有千里行我獨留此居君行赴何許沅江隔重湖我留此山中欲去尚躊躇沅江道里僻罷民待君蘇君亦憐其民涇沫勤煦濡涼風促君旆小雨膏君車漸去囂塵遠及此夏景初野色望行路東門初首涂風土日已好誰能懷舊廬舉手謝拘束有若縱壑魚路逢舊交游相見問何如道我且貧病因風時寄書和伯少穎迂仲將歸福唐偶成數詩欲奉寄無便未果也辰叔常季南還因以奉送

紛紛走道途擾擾雜泥滓旣爲風俗移又以血氣使百川灌河來夫豈有涯涘故人林與李始可與語此方子獨立士

德順

歲莫亦深居林李從之游欲出更

躊躇紛華晚不顧浮湛同里閭時從陸丈人共此一

篇書

諸公皆從陸亦頗游

聞山固多奇聞士亦多傑弱水不勝舟有此積立鐵
胡劉守節意亦豈待言說原仲致中堂堂混衆流此固不
得折

經時望子來尉我終歲病西行道路迂欲見復未定

秋毫論得失此豈不有命嘗聞安身要其本在無競

王輔嗣卦解云安身莫若無競修己莫若自保守道則福至求祿則辱來實法言

才叔策名時已自能不動中年謫南荒與世作梁棟
生平所踐履自待九鼎重失固不足言得亦何所用

才叔諫議張公也初登科時已無喜色矣

送范才元

胡塵犯中原冠蓋走東南同時辟地人十不存二三

相逢各衰病豈復能清談君今尚行役未暇脫征衫

聲名自宿昔文字性所耽誰能隨少年下筆令人慙

並海雖名邦嗜愛殊酸鹹君但撫罷民未須嚴轡嚼

開堂宴賓客清詩消半酣時寄荔子來尚能憐我饒

自餘君不問只向臯端參

贈魏邦達張彥素

公更深居我更衰山林膏壤偶同時兩年疾病略相

似二老風流應自知苦學養生猶有累不知閑過是

無爲初冬寄遠無他物半夜才成一首詩

送南上人

閑居病益侵俗事初一掃南公犯寒來爲我略傾倒

論詩已得妙不必在窮討我懶百慮廢識子恨不早
歸途見徐董明叔更問此二老所恨聊復翁向者骨

已槁

彦速

拭目看遺文令人惡懷抱

南上人收二董時與明叔墨妙甚富

贈曾吉甫

荒城少還往居處喜相近欣然得一笑渠敢有不盡
詞源久欲竭此道或少進作氣在一鼓軍士況未愁
涼風動高梧塵土朝作陣臨溪惜暫別溪淺雨復吝
豈無一言贈以當百鑑驢沉綿我未瘳行李君更

名御

贈魏邦達張彥素

橘綠冬未黃菊老霜變紫不知風土佳但覺日月駛
間居得養疾調氣實在此從今便休去敢復爲物使
誰能明吾心旁邑有君子

次韻汪教授木犀

治藥呼醫懶出門每聞樂事漫消魂秋花帶雨寒由
在老病尋詩目更昏但見晚霞翻雨脚不知山石是
雲根主人有意留崑桂要使貧交奉一尊

送詹慥秀才

子來今幾時歲月忽已晚今當別我去道里初不遠
家山霜正濃馬草寒更短何以奉親懽一笑和氣滿
邇來游學士已見如子罕讀書要躬行俗事不厭簡
故鄉多老儒歸日正可欵時能寄餘論尚足起我懶
兩州多使人自可數往反

靜軒

紛紛逐人行擾擾與事競不知一世間能得幾人靜
公今默無語種種以靜勝人來漫相接事至聊復應
開軒道院旁足以補我病日高公事散轉與靜相稱
千載師蓋公此理久已證爐煙裊晴窓松聲韻鐘磬
簿書勿勤來公方在禪定

贈吳周保

舊琴無譜亦無絃子獨深求不計年正以安閑有餘
地不因言語悟先天論詩再到新刪後讀易仍窺未
畫前老病相逢聊一笑非關無地可逃禪

毋牆少稷方齋

人圓君方君但方鑿圓袖方君不忙富貴可正君則
忘閉門讀書聲琅琅舊書重疊堆在床點勘同異分
偏傍運精竭思心力強十年足不離僧房荒山野路
秋水長客雖欲來嫌路妨幽蘭無人爲君芳采菊落
英充餽糧客雖不來有餘香

送義先上人歸古田

斷雲無水去無蹤回望關山指顧中何處尋君問消
息古田南路已春風

送范十八

范子閑行定不窮袖中詩卷敵清風野僧道士有餘
意同學故人多近功已辦辛勤十年讀時須談笑一

尊同相看又作韶州客却望臨川是夢中

徐師川挽詩三首

江西人物勝初未減前賢公獨爲舉首人誰敢比肩
時雖在廊廟終亦返林泉今日西州路臨風更泫然
異日逢明主端居不復藏一心扶正道極力拯頽綱
已病猶軒豁臨衰更激昂始知操韞處餘事及文章
念昔從耆舊公知我獨深意猶如昨日愛不減南金
撫事思前作於時媿夙心素琴理舊曲無復有知音

即事六言七首

老來與世相忘尚喜攤書滿床憶得少年無事苦心
更學文章

少年於世無求老覺心情自由放倒文章書多追隨
倦鳥虛舟

不入樂天歡會不隨淵明酒徒看取簞瓢陋巷十分
晝夜工夫

百壯艾能已疾一盃酒便生春熟睡覺時意思罷勞
歇後精神

游夏一辭不措非關未究源流直自孟軻沒後無人
會讀春秋

養生不能延年忘言未是安禪聖學工夫安在重尋
曲禮三千

畢竟學書不成誰道能詩有聲點檢平生交舊幾人

曾是同盟

楊雄

讀易先知未盡前聖人何事絕韋編始知揚子多閑暇更有工夫草太玄

嚴君平

千秋蜀道一君平氣象從來不近名可惜下簾無一事才將老子授諸生

賈誼

孔丘墨翟並稱賢始信先生學未專何事退之傳此謬亦將餘論點遺編

晉二絕

紛紛禮樂付浮埃一取玄虛禍始開但見出言齊老易始知胡馬不虛來

晉朝朝士安知禮盡出紛紛篡盜餘漫使當時辟世士放言高論祖浮虛

畜大雪童點甚勝人壬戌夏暴死作詩傷之它生與我有微因來見防家最後身共住世間均是夢未應心境不如人浮雲屢變本無迹又路多歧莫問津此後窮愁走南北更誰隨馬踏埃塵

伴我走道途直前無葛藤三年貧病裏幾度送亡僧

又作二絕

荒山古寺欲黃昏梁上諸君欲到門雨濕雪童埋處

主向來精爽更誰論

客至書來總不知都緣邇日吹聲稀蛛絲網通常行處猶道奔逃未肯歸

秋日

禦盜犬新死放生羊尚存有書消永日無客到衡門
山色熱猶好溪流雨不渾還須止雜念數息度黃昏

懷雪童

老來於世漫多悲夢幻推移且自知想得開山藏骨
處却如搖尾乞憐時送行識我貧無蓋閑坐思渠悶
有詩從此窮居添寂寞夜長誰復遶簾幮

卽事

畏事成閑獸出遨故人不見如曹逃一寒一暑侵衰
老如夢如幻無堅牢客游衮衮漫南北往事悠悠增
鬱陶此去還能安坐否割雞元不用牛刀

念舊

俛首思疇昔常期不負渠事隨新境轉又與舊情疎
少日猶相憶多年遂絕書況於生死隔寧復似平居

和汪教授

羨君須作綠陂竹飯飽哦詩聲徹屋閉門不出動經
旬坐看禪房花柳簇却記冰霜動地時半夜小園風
折木一尊相對任濁清三徑閑行漫松菊長篇短句
動盈軸想像清香有餘馥問君何以得此妙木潤只

緣山有玉我窮猶敢和君詩不留和氣暖臍腹搜尋
險韻少工夫敢與諸公鬪遲速

癸亥歲正月二首

閑居足因循所至漫冬夏今年忽六十稍覺日有暇
孔子固大聖未害六十化同時蘧伯玉亦豈出此下
莊周與惠施初未識此話何因爲此語百世呈縫罅
不如姑置之以俟一戰霸

孔子六十時入耳心則通所造不可知誰能強形容
當世設梯級聊發百世蒙如何陋巷顏年少兩頰紅
出門請從之便欲齊此翁心知路不遠試用一日功
還家對簞瓢此士正不窮

寄蔡伯世李良宇

兩君羈旅官西蜀我亦江南住僧屋想像平生肺腑
親晴天何處飛黃鵠庾郎故是豐年玉道兒更是見
不足藜羹脫粟有餘味富貴薰天果非福死生契闊
今誰在往事悠悠陵谷改他年乘興下瞿唐見我衰
顏莫驚怪別尋好語和君詩償盡平生難韻債掃除
壁土更焚香下酒如今有鮭菜

贈魏承事二絕

雨漲溪渾欲斷橋水鄉風物轉蕭條煩君下筆留春
住令我寒窓不寂寥

四十餘年別歷陽舊游如夢費思量眼明見此老居

士聽話舊游如到鄉

送魏縣丞之官餘杭

君去我逾靜我病君得知如何便相遠未有再見期
溪橋已春晚紅紫久離披初無一尊酒慰君別後思
君才則甚長所用無不宜但當斂光芒匣劍深藏之
初非擊刺用肯顧庸人嗤平生富事業餘事尤長詩
當官儻見念琢句敢嫌遲上以寄難兄下以愈我飢
葉尚書普光明庵

日月豈不明明乃有昏晝四時所出火更自表新舊
寧知普光明亘古不傳授獨照萬物表不見所成就
遠乃包須彌近不聞圭竇茫茫濁水源我此明亦透
尚書所居庵草木甚癯瘦收藏萬丈光斂退著懷袖
至寶爰不耀却立萬夫後我願從公游昏病方待救
先持此微言遠寄爲公壽

焦復州惟正寄鼎復兩州喜雨詩來以近體
詩一首寄之

聞道復州賢太守只如前在武陵時相逢未說爲州
樂所至先傳喜雨詩行比曾參仍不魯

焦君居宋以孝友稱政

同龔遂更何疑懸知此去長閒暇定是愚民不忍欺

送范十八還江西効白樂天體

與君此別重依然再得相逢又幾年無使人言長似
舊况教人道不如前窮通軒輊皆由命貴賤高低揔

是天只有脩身全屬我少遲留處便加鞭

晁公詩九經堂

人家有屋但堆錢君家有屋定不然一堂無物四壁立六藝三傳相周旋人言君貧君不顧以此辛勤立門戶聖人遺意要沉思暫脫楚騷辭漢賦他年相見問何如且說九經得力處

送瑞印上人歸福州

不須布襪與行纏參得諸方五味禪散盡白雲見明月虛空只是水中天

東萊先生詩集卷第十九

東萊先生詩集卷第二十

呂本中居仁

尤美軒在玉山縣小葉村喻子才作尉時名之取歐陽文忠公醉翁亭記所謂林壑尤美望之蔚然者後數年舊軒既毀復作寺僧移軒山下汪聖錫要詩叙本末因成數句寄之

茲軒在何許遠在洞巖側洞巖山水勝自與塵土隔天以奉幽人寧肯媚過客尉曹昔吏隱到此若有獲名軒曰尤美盡去眼界窄坐令歐陽公餘意轉明白車馬走道路我久度此厄茫茫六合間於此有安宅軒雖有成壞山本無異色舉頭見林壑不必更遠索

金鷄董需彥光凌岑庵

我爲江南游，衰病轉不堪。往來信撫間，未上凌岑庵。
凌岑賢主人，清峻如山巖。避事若荼苦，守貧如薺甘。
平生好交游，十不存二三。今弟又繼往，世不聞清談。
高風故絕俗，想像令人慙。浮生有欣戚，此味久已諳。
請君但高枕，客來睡方酣。茫茫岐路間，與渠爲指南。
乘風本餘事，不向鼻端參。

盛華彥光丘壑軒

盛侯少時偉儀觀，下筆不休人共歎。胸中別自有丘壑，
萬里溪山藏几案。往來車馬鬧泥土，盛侯何嘗著眼看。
較量今古攷同異，料數胷襟別真贗。今朝示我故人詩，
老病窮愁得消散。故人相繼在鬼錄，君雖獨存飽憂患。
且往溪南數間屋坐穩，不憂時節換人言。丘壑殊不惡，
君守一丘只如昨。文章老健氣如虹，不向山巖何處著。

送晁公慶西歸

頃從君家諸父遊，談經語道久未休。死生契闊風塵起，
往事追尋三十秋。疾病衰頽且深坐，喜見後生勤勝我。
臨行索我送行詩，短句長篇無不可。少年學問要躬行，
世人營營勿與爭。閉戶忍窮心自樂，簞食瓢飲殊不惡。
紛紛得失誰厚薄，得此失彼莫籌度。

曾吉父橫碧軒

蠶塵等山林，此理久未盡。君今住世網，於此已自信。

僧居隔長溪屋古柱礎潤不知市聲遠但覺山色近
開軒有餘地草木當夏閨一身船轉頭萬事燈落燼
譬如癢在體搔抑吾已認青山故在眼已絕封閑客
悠然有遐想此語君所印

送邢道州趙邵州歸湖南

相逢不得款奈此離別何長涂已新秋從此風雨多
欣然出殘暑如鳥離網羅我獨此淹留衰病日婆娑
跂足望二子洞庭秋始波道州通家舊口辯如懸河
邵州我表弟玉也保不磨無由得相就相近日經過
黃塵蹴馬足未暇眄庭柯何時寄書來與我消睡魔
天涼不飲酒爲子一高歌

送方豐之秀才歸福唐

我居江東惟信之州子來自南而與我游問其所友
一時之秀其兄韞德亦既有就子學旣立子志甚遠
何以終之止在不倦貧賤勿厭自然無悶富貴勿羨
害德之本彼古之人能聖與仁我胡不能歎其絕塵
今子歸矣歲亦有秋何以告子惟聖之求水流有源
木生有根惟源與根入德之門求聖根源惟正之守
正之不守棄師背友絲毫之僞勿萌於心無有內外
亦無淺深由此則聖舍此則病是以君子所守先正
子以贈別亦以自警爲別後思且以三省

向敦武挽詞

耐官丞相後世固不無人位下能安命身閑不厭貧
還能死異域便足繼前塵此日何山路空悲草木新

向簽判母挽詞

懶作塵寰住虛隨雲雨山人皆欽懿範天不予長年
室靜如歸隱心安勝學禪傳家有令子尚得慰重泉

贈眼醫張子驥郎中

人生所有疾萬種皆眼病由眼不得明故視有不正
指白以爲黑遠邇皆未定如何少翳膜遂失本來性
今君有妙手與世脫機穽病雖有多端但以一理勝
不須望奇功藥病自相應吾觀世間物唯眼爲至淨
不容著纖毫况復計少剩自古大醫王其治有捷徑
不能添汝明但要除此證鏡有塵故昏塵本不在鏡
塵去鏡自明豈必與物競皎潔玉壺冰澄澈秋月瑩
坦然望長途欲往不待倩其說甚易知在汝聽不聽
請君明其然說法我已竟

送晁侍郎知撫州

與君相從四十載老病昏昏君不怪交游太半在鬼
錄一時輩行惟君在前年簪筆侍明光論議風流傳
梗槩邇來同住此荒城笑語瀾翻絕機械薄酒重尋
它日盟新詩未了平生債今君奉詔作鄰郡共喜朝
廷有除拜定知惠政及斯民一洗從來州郡隘甕頭
春色早晚熟遠寄還須例寄出爲君試草德政碑蕭

何自昔文無害

晁留臺劉夫人挽詩三首

自昔聞諸父文章漢兩京

原父侍讀貢父舍人夫人諸父也

風流傳

壺範烜赫振家聲睦族今無匹能書舊得名如何江

左郡今日望銘旌

故家劉與魏我亦忝姻親

夫人劉姓魏出也

久矣思前作居

然愧後塵遺芳接惇史舊德見夫人悵望鵝湖路新

年草木春

留臺無恙日樂善出誠心文采不復見聲名空至今

半生資內助三歎有遺音撫事思前輩於誰覓斷金

贈鄭侍郎

鄭公一勺酒時與故人傾況茲沖和天草木日向榮

山茶逞獨艷著意呈軒楹坐中四五客還來尋此盟

主人久未厭頻得倒屣迎燒燭夜照花知公有餘情

清歌洗俗耳軟語令心醒豈伊鶴頂丹獨自能傾城

要令同二妙相伴作三英紛紛桃李花開謝略不停

誰知此深院別有高世名我老百事廢對此眼暫明

還家不能寐起坐數殘更明朝有新句更欲煩公聽

送宗紀上人歸福州

道人海上來訪我江外寺春風吹行李飄搖不得住

手中主人書足下千里路臨行請一語懇款過外慕

人生不入道所至皆旅寓急參庭斷栢會取末後句

相逢與相別惟此是先務

郡會分韻得蠻字

柳外高樓四面山使君携客共躋攀塵埃不動日方
永桃李無言春自閑未厭簿書時到眼每逢詩酒亦
怡顏夜闌一倍園林勝尚覺清歌欠小蠻

郡會賞牡丹分韻得裳字

敢辭深坐嬾衣裳便欲追陪恐病妨小戶常憂勸酒
滿短才仍怯和詩忙牡丹花在逢寒食群玉山如望
洛陽不是使君尋舊賞更無人會憶姚黃

次蔡楠韻

交舊悠悠西復東建昌南望水連空蔡侯念我有新
句猶似灞橋風雪中

送王提舉赴淮東

七首

君爲千里行我此一室住清風隨畫舸已過江北路
君如暑伏冰所至自清靜脩然接新秋已復天地性
隨行萬卷書旣足以自娛因知君所樂不在使者車
入門雖多塗其究有安宅君能識其然一語在物格
學道貴積習天地故相似不容有私毫髮在曾次
海陵我舊游歲月亦已久不知兵火後尚有昔人不
官閑有新作寄我莫憚速兼書海陵事令我開病眼

送財用歸開化二首

年來相聚欲無言嬾說諸方五味禪所恨歸程太忽

還不收吾骨瘡瘻

疾病支離欲著牀爾來殊不負秋陽頭童齒豁西風裏尚費縈簾一炷香

謝范子儀見寄因次其韻

疾病深藏一事無眼從昏遊廢看書清詩忽覩驚人句遠道如瞻使者車頗放溪山時入座不妨賓客醉騎驢傳家事業風流在早晚還朝得盡摠

謝周侍郎送木瓜

漆以猩猩血綠以刺繡文天生此碩果似是百果君杯槃快先覩便足張吾軍雅宜椽燭照正合侑金樽環橙與大柑其後蓋如雲我病日已衰故人時見存晨興有奇事此果蒙先分開絨見珍異坐使童僕奔把玩不去手舉室生清芬所恨茅屋底著此太不倫瓊琚未足報拙句聊相聞

謝幽巖長老送荔枝二首

年來疾病日衰頹咫尺閩山嬾便回不是幽巖老尊宿更無人寄荔枝來

荔子蕉乾久未嘗今年霜下始聞香幽巖閣略庵前事容得先生爲口忙

撫州俞隱居挽詩

臨川俞處士獨擅隱居名嬾倦不復出風流聞後生自甘長寂寞肯作榮鮮明公栢新阡路傷心秋後聲

贈汪信民字如愚

四海同門一信民近淮來往七經春生平坎廩不如意死去聲名多悞人漫以文章付兒子略無毫髮仰交親請君但自傳家學陋巷簞瓢莫道貧

謝曾台州送梅

不辭深坐轉衰頹養病仍無酒一杯尚喜故人相勞苦臘前先送一枝梅
甕間吏部久不見江東步兵那得知故人憐我太寂寞
莫一枝梅送兩篇詩

送范子儀將漕湖北五首

君行欲何之乃在湖水北湖水多郡縣使者易爲德
其民淳而古其吏朴以直官閑足賓客歲稔少盜賊
得君清靜化用教不以力但自養根苗勿苦厭蠱蠹
許昌無事時地固多英豪況君忠宣子譽望素已高
讀書不出戶俛首自作勞脫身走江南始爲時所褒
每念其先人水靜絕波濤時從文字嬉餘事及風騷
忠宣在朝廷每欲消黨與以我廣大心事使變齊魯
同門有不察平地鬪豺虎君昔住許昌閉口不復語
靜思前人意皆是神所許自守泥塗間肯復計齟齬
今兄守家學曰自文正始惟不卑小官至死而後已
其間有富貴乃是偶然爾人欲學古人豈不識此理
奈何狀貧賤乃不返就已君今又蹈之可爲吾黨喜

我嬾百事廢尚叨舊知時蒙寄書來索我送行詩
我詩老益退久爲人所嗤君獨不見鄙論相不舉肥
送君湖北去無事隔山陂時應有佳句尚足尉相思

梅花二首

白玉花頭碧玉枝水邊籬下雪晴時暗香別有闌情
處却是春風未得知

占得先開不待春風饕雪虐長精神老人不是尋花
看要與尊壘洗世塵

周承務迎來諸已齊

爲腹不爲目貴久不貴速人皆求其餘我獨心易足
人皆重外慕我獨在其獨開門想顏子默坐相追逐

壽夭有定分簞瓢乃其福修身雖多塗要在不遠復

送程伯禹歸浮梁

不見程公二十年以上饒相遇各華顛平生氣節君先
立老去安閑我未然即看歸來上廊廟未容休歇住
林泉飽山閣上憑欄處合得逍遙第一篇

疾病因循嬾出門茅簷終日坐昏昏雨聲點滴松藏
寺人迹稀疎犬吠村時得使君相勞苦勝於書札問
寒溫只應此去添憔悴又次先生酒一尊

寄題王珉中玉通判夢山堂

青山甚不遠每因塵事踈百念攪曾次豈知山有無
君無適俗韻常似山中居出處本無二夢覺固不殊

不知此山堂始往從何途未嘗走道路亦不用舟車
溪流與山色相對若有餘此地甚閑曠觀若心地初
行雲映遠樹中有此田廬如今遂安處始驗實不虛
得非神所相無乃道力扶親朋在左右不待折簡呼
往來一笑樂勝有十輪朱何須從范子辛苦泛五湖
亦不學沮溺遠迹斯人徒從容萬事表在我不在渠
欣然理前夢已勝在華胥

去冬以紙衾遺劉彥冲劉有詩來謝以二絕

句荅之

初無一物獻高人紙被封題意却真想得蒙頭忘百
慮滿山風雪自成春

錦繡堆牀已不宜芳淑郁又成癡心知此被無他
巧能與山翁換好詩

送曾季直下弟歸臨川

老病侵凌重別離爾來瘦欲不勝衣信州城北荒山
寺兩送親知下弟歸曾子不愁歸泥路臨行索我送
行詩頭童齒豁衰頽甚不似京城相別時

送趙十一弟之官南安

君爲千里行我有一罇酒把酒持勸君欲以爲君壽
南安傍庾嶺瘴癘亦時有德人固天相和氣生戶牖
斯民得安樂如我屈伸肘居然變遠俗共感賢太守
我病居上饒忽忽歲月久杜門百事廢亦復厭奔走

得君暫相從感嘆成皓首頗念河朔時相從誦詩否
人生只此是不必更抖數有便即寄書頗來問衰朽
寄劉彥冲兼寄胡原仲劉致中

故人別去兩經冬今歲書來第幾封正以空疎少製
作不因窮約廢過從養生漫說終難效學道無心亦
未逢若問真歸是何處五更常聽寺樓鐘

去歲嘗以紙被竹簡遺劉致中後爲大水所
漂致中有詩以二絕句荅之

念君無愛亦無求一室脩然冷欲秋尚恐深居有餘
念更將衾簡委洪流

紙被公無笑不才兩公相繼有詩來五更睡足天昏

黑也似他人錦繡堆


吳傅朋游絲書

君不見往時文學顧八分中郎之後典刑存又不見
先朝文惠書堆墨大榜濃雲照南北未似只今上饒
守靜寫游絲不停手非煙非雲斷復續緩步徐行不
拘束斷崖一落千丈滑遠望筆行如一髮鬼神竭力
覲不見鐵礦消亡綱作線線舞飛揚不自由縱橫自
在勝銀鈎知君此意非安排妙處不從筆下來心疑
形釋萬事去信手却立無纖埃滿堂回頭莫見猜我
自悟此忘曾懷操舟相馬在事外顏氏哉此由心齋
如君下筆少有意錦繡寧不悞剪裁君准無心故若

此秋毫自可纏風雷鍾王歛手謝不敏長史懷素題
襄顏病夫睹此心目開向來窮愁安在哉

東萊先生詩集卷第二十

終



文悅已巳

